

CHRISTOPHORI SCHRADERI
DISPOSITIONES
ORATORIÆ

Ad ductum Rhetoricæ Aristoteli
concinna.

EDITIO TERTIA.



HELMESTADII,
Typis & sumptibus HENRICI DAVIDIS MÜLLERI
ACAD. JUL. TYPOGR.

ANNO MDCCC LXXIV.

CHRISTOPHORVS SCHRADER
Humaniorum literarum & Eloquentiæ
Studioſis in Acad. Julia.

S. D.

EN vobis & alterum genuino uſui Rhetoricæ Ariſtoreliſ comparatum libellum, priore illo tanto ampliorem, quanto juſta exercitatio progymnaſmate, oratio epiſtolâ eſt operoſior. Intellexeram epiſtolicis diſpoſitionibus adjuſtos ſeſe fateri, qui in ſcribendo nec ingenio, nec conſuetudine ſolum niti, ſed ambobus artem jungere cupiunt. Al- lubuit itaque orationum ad hanc methodum conſcienda- rum rationem pariter commonſtrare, & eò vos ducere per exempla, quò Ariſtoteles noſter vos miſit per præcepta. Uti- nam verò, quæ ipſe ille dicendi maximus magiſter, hujusque diſcipulus & in Lyceo ſucceſſor, Theophraſtus, præceptio- num ſuarum rectè uſurpandarum cauſa, compoſuerant argu- menta, theſium nomine appellata, ad ætatem noſtram perue- niſſent; minus tum laborandum poſteris fuiſſet, peripateti- cam hanc dicendi methodum: ex ipſa humana indole & re- rum natura petitam, ceterùm aut deſuetudine, aut difficulta- tis imaginatione à plurimis dereliſtam, denuo omnibus, & cla- riùs fortasſe, quam ſolertes & peritiſegeant, ob oculos ſtatue- re. Ediderunt ſimile quiddam dudum & alii liberalis hujus doctrinæ Profeſſores, & cum laude quidem ſua, neq; ſine pro-

festu studia isthac æmulantiam ingeniorum. Mihi verò Aristotelis nostri vestigia pressius sequi fuit propositum, quod non M. Tullio tantum, sed & tot annorum experientia teste certus sim, hunc doctorem, eadem acie mentis, qua rerum omnium vim naturamque viderat, hic quoque aspexisse, quæ ad dicendū autem pertinebant, & quidem penitius, quam non tantum anteriores, quorum omnium præcepta, magna cura conquisita perscripsit, fecerant, sed &, quod mirere, luculentius, quam quisquam omnium qui bis mille annorum spatio illum sunt insecuti. Partes equidem nonnullas, illam cum primis *proposita* ab aliquibus postea latius didicis & pluribus explicas, haud diffitear, at qui ex quibus, quo ordine & quomodo sit dicendum, hoc est, integram orandi scientiam accipere, plenius docuerit, adhuc vidi neminem. Merito igitur hoc veluti saxum perpetuo volvo, ut Aristoteleorum de arte dicendi librorum, & sensum & usum cum capiant recte, tum id rem legitimè conferant eloquentiæ studiosi. Et sententiæ quidem illorum illustrandæ paratas habeo annotationes, quas, ut auditoribus meis jam tum tradidi, ita, simul ultima manu elimavero, cum omnibus communicare, haud desuegiam. Interea Vos, PRÆCLARI JUVENES, quibus Rhetoris nostri de dicendi sapientia doctrinam publicè privè, varièque, mediocri industria, fide optima adhuc proposui, accipite prompta manu & hunc libellum, quo istis, quæ in doctore nostro legitis, rectè utendi rationem propius cognoscatis. Perscripsi hic & hypothesium, & thesorum variarum formulas, eo ordine quem ipse Aristotelis liber prævit. In hoc enim primùm omnium loci singulis causarum generibus, hoc est, hypothesebus, proprii, & tum demum communiores, thesi deservientes, exponuntur. Atque ut isti

hic deliberativi generis loci præcedunt, inde demonstrati-
vi, & hos judicialibus causis proprii sequuntur, ita hinc
quoque primum sessionum & dissensionum, subinde verò
laudationum & vituperationum, ac tandem accusationum
defensionumque luculenta exempla, sum commentatus, ea
serie, ut primum è sacra, mox è Græca, tum è Roma-
na, & denique è Germaniæ nostræ historia causas, (hoc
verbo hypothèses Cicero appellat) in generibus singulis
deprompterim. Hypothesibus, thesibus sive questionum in-
finitarum exempla viginti subjeci. Marci Tullii de his ver-
ba sunt in Oratore cap. xiv. *Quæstio à propriis per-
sonis & temporibus ad universi generis orationem
traducta appellatur thesis.* Pergit Cicero: *In hac
Aristoteles adolescentes non ad philosophorum
morem tenuitur differendo, sed ad copiam Rhetor-
um in utramque partem, ut ornatus & uberius
dici possit, exercuit. Idemque locos, quasi argu-
mentorum notas tradidit, unde omnis in utramque
partem traheretur oratio.* Hæc de Aristotele Cicero.
Quando igitur, à optimi juvenes, & loci isti Aristote-
lici haud segniter à nobis illustrati, & ad horum usum ma-
noductiones præsto vobis sunt, artes verò operis causa ad-
ducuntur, agite: urimini occasione, & ad hunc ductum
concinnè scribere allaborate. Novistis monita sapientum:
*Inexercitatus miles semper est tiro. Solus & ar-
tifice qui facit usus erit.* Nulla res tantum ad

*dicendum proficit quam scriptio. Stylus optimus
& praestantissimus est dicendi effector de magister.*
Hujusmodi commendatissimarum exercitationem amatoribus atque æmulis patet domestica mea Eloquentiæ Schola. ad quam denuò invito omnes qui ducis se egere non ignorant. Non expectabunt, dum hederam, quod dici solet, suspendam. Opera enim mea, ut adhuc nunquam non fuit, ita porro, dum animi & corporis vires Dominus sufficiet, obvia erit iis, qui non audire tantum, sed & discere, & cum nostra suam industriam impigrè & constanter sociare cupiunt. Quod quidem si vel pauci contestabuntur, hujus quoque libri, vestro, mihi carissimo, nomini dicati dedicatique fructum satis amplum mihi videbor percepisse. Dominus spiritu suo mentes vestras inflammer, ut juxta pleratem id, quod virili ætati vestræ usui erit, juvenes rectè atque feliciter Dei gloriæ, bono patriæ, bono vestro addiscatis. In Academia Julia Helmestadii postrid. Id. Octobr. Anno c 17 10 c LXIII.

CORNIF. AD HERENN. I. I.

Nunc, ne nimium longa sumatur oratio, de re dicere incipiemus. Sed si te unum illud monuerimus, artem sine assiduitate dicendi non multum juvare: ut intelligas, hanc rationem præceptiones accommodari ad exercitationem oportere,

IN-

I N D E X

DISPOSITIONVM ORATORIARVM.

- I. *Abraham suadet suū discessum e patriā in terram Canaanam.* Pag. 1.
- II. *Noachi ad mundum diluvio periturum oratio.* pag. 4.
- III. *Miltiades hortatur Iones, ut ponte Istrī rescisso patriam liberent.* pag. 7.
- IV. *Histiā Milefii oratio pracedenti contraria.* pag. 10.
- V. *Polemarchi Atheniensis oratio Miltiadem adversus insulas, quas Darium adjuverunt, mittendum suadens, ad exemplum Manilianæ Cicerinæ.* pag. 11.
- VI. *Archontis Atheniensis oratio pracedenti contraria.* pag. 13.
- VII. *Oratio Publij Valerij Tarquinio Superbo regnum abrogandum suadens, ad imitationem tertiæ Philippicæ.* pag. 15.
- VIII. *Menenij Agrippa oratio ad Pop. Romanum in monte sacro.* pag. 16.
- IX. *Catonis Censorij oratio in senatu suadens Carthaginem esse delendam.* pag. 17.
- X. *Scipionis Nasicæ oratio Catonianæ contraria.* pag. 19.
- XI. *Carolo M. suadet Sēnator, ut è Danubio in Rhenum navigationem procuret ductā fossā.* pag. 20.
- XII. *Oratio pracedenti contraria.* pag. 22.
- XIII. *Laudatio Iohannis Baptista.* pag. 23.
- XIV. *Elogium Moysi.* pag. 26.
- XV. *Laudatio Herodoti.* pag. 30.
- XVI. *Vituperatio Themistoclis.* pag. 31.
- XVII. *Laudatio Themistoclis.* pag. 38.
- XVIII. *Laudatio Romanæ morum censura.* pag. 34.
- XIX. *Laudatio Scipionis Africani posterioris.* pag. 44.
- XX. *Romuli vituperatio.* pag. 46.
- XXI. *Romuli laudatio.* pag. 49.
- XXII. *Encomium Caroli M.* pag. 51.
- XXIII. *Caroli M. vituperatio.* pag. 56.
- XXIV.

XXIV. Oratio Iudicialis contra Absalonum fratris sui Amnonis percussorem.	pag. 58.
XXV. Absaloni defensio.	pag. 60.
XXVI. Basilij Imperatoris minister accusatur lese majestatis.	pag. 61.
XXVII. Defensio ministri.	pag. 64.
XXVIII. Accusatio Horatij sororicida coram Tullio Hostilio Rege Romano.	pag. 67.
XXIX. Defensio Horatij, à P. Horatio patre instituta.	pag. 69.
XXX. Thomæ Munceri perduellium ducis incastris ad Mulbustum captivi accusatio.	pag. 70.
XXXI. Heroum filij noxa.	pag. 71.
XXXII. Fortes creantur fortibus & bonis.	pag. 76.
XXXIII. Pro Astrologia judiciaria.	pag. 79.
XXXIV. Contra Astrologiam judicariam.	pag. 81.
XXXV. Elogium Historia.	pag. 86.
XXXVI. Principiis obsta.	pag. 90.
XXXVII. Contra somni & cibi intemperantiam.	pag. 92.
XXXVIII. Contra ignaviam.	pag. 94.
XXXIX. Silentij bonum.	pag. 94.
XL. Iejunij commendatio.	pag. 95.
XLI. E summis regum ministris, nonnulli interdum male tandem pereunt.	pag. 96.
XLII. Reprehensio voluptatis.	pag. 100.
XLIII. Encomium voluptatis.	pag. 106.
XLIV. Consilia non sunt ex eventu judicanda.	pag. 106.
XLV. Usura non sunt illicitæ.	pag. 109.
XLVI. Usuras esse licitas.	pag. 110.
XLVII. Conscientia summa ratio est habenda.	pag. 112.
XLIX. Contra vindictam privatam.	pag. 112.
XLIX. Turpe est calumniari.	pag. 115.
LI. Ne quid nimis.	pag. 115.



DISPOSITIONES ORATORIÆ.

I.

ABRAHAM SVADET SVIS DISCESSVM E PATRIA IN TERRAM CANANÆAM.

Hema quodcunque confirmaturus, ante omnia indagabit quæ rei de qua dicere cupiat insunt, vel omnia, vel aliqua: nec communia tantum, sed vel maximè, quæ sunt illi propria. Hoc in dialectico studio tradidit Aristoteles l. i. priorum Analyt. c. xxvii. & c. xxx. Idemque in Rhetorica, quæ Dialecticæ propago est, diligenter inculcavit. l. ii. Rhet. c. xxii. §. 10. & seqq. Utrobique per ea quæ insunt intelliges conclusionis demonstrandæ, & quidem cum subjecti, tum prædicati genus, definitionem, partes, causas, effectus, conjugata, adjuncta, subjecta, antecedentia, consequentia. Qui de re proposita pleraque ista, vel præcipua vel omnia, vel his plura cognoverit, huic non poterunt non occurrere multa rei demonstrandæ ac latius explicandæ enthymemata, Atque hoc monitum omnium sequentium dispositionum elaborationibus necessariò prævium, semel hoc loco artis hujus studiosis indicasse sufficiat. Propositam ergo orationem compositurus, primo Abrahami historiam è S. Scriptura, è Flavio Josepho, & optimis interpretibus recognoscat, & ad communia pariter atque propria animum advortat. Commune est, quod in gente idololatriæ na-

tus est, & educatus: proprium quod divinitus inde evoca-
tus paruit Domino, & obsequij sui ingens præmium tu-
lit. Postquam ista probè expenderis, jam ad enthymemata
invenienda accingi erit opportunum. Ingenium huc in-
tentum ab arte juvabitur, si percurras propositionis capi-
tis v, vi, & vii. l. i. Rhet. Aristot. & eas sub quibus subsu-
mere in hoc argumento possis, excerpas. Erunt illæ lon-
gè plurimæ, & multò plures quam quisquam requirat. E-
cūculo itaque horum tria tantum ista nunc adhiberi esto
fatis.

Primum enthymema: *Omnia hic in Chaldaa plena sunt
nefandæ & pervicaci idololatriæ. Ergo hinc quantocius abren-
dum est.*

Antecedens dilaretur, I. per διαπόρευσις idololatriæ
Chaldæorum: *Procidunt passim coram lignea lapideave effigie
manibus ipsorummet formata; precantur stellas, audire nescias;
auxilium à sole, quod præstare nequit, petunt; circa creaturas oc-
cupati creatorem negligunt &c. Adhibe H. Grot. l. i. v. tum de Ve-
rit. Relig. Christ: II. vanitas Idololatriæ ostendatur: Sa-
crificia, lumina, thura, preces offerre nesciunt, cæcus, surdus, custodi-
am ab ijs petere, qui à furibus ipsi petuntur ac violantur, longe ab-
surdissimum est &c. III. Nulla spes est fore ut resipiscant Chal-
dæi, adeo pertinaciter idola suis dediti sunt &c.*

Antecedenti hoc modo dilatato addatur major Syl-
logismi: *Inter tam vecordes & à cælesti veritate alienissimos di-
nitius morari consilium non est &c.*

Probationes Majoris: *Alioqui lumen veritatis in nobis
accensum & ipsi amitteremus & malus quægenti huic imminet pari-
ter involvemur &c.*

Subjiciatur conclusio: *Parate ergo mecum vos, ô caris-
simi, ad fugam in terras alias; neque enim ut Noacho & familia
ipsius*

ipſus arcam providit Dominus in qua ſervaretur, ita nos in calamitatis, quæ nobis imminet, undi mediis tutos præſtabit, ſed id potius eſt ut è medio diſcedamus &c.

Secundum enthymema: *Periculum ingens à popularibus noſtris nobis imminet, Ergo fugiendum eſt.*

Probatio antecedentis: *Nolent ferre diſſidentes in rem gravi: flamma & ferro nos perſequentur, quod Deos illorum ſpernamus. Efficax enim flabellum eſt ſuperſtitio, quæ uli ſemel animos invaſit, ad extrema omnia, in diverſum ſentientes propellet &c.*

Tertium enthymema: *Nequid diſſimulem, Deus me evocavit alloquio ſingulari & magnus promiſſus, Eamus ergo quo ille nos vocat.*

Antecedens dilatetur enumeratione promiſſorum Abrahamo divinitus factorum.

Tribus his enthymematibus interponantur moratæ orationes, quibus pietatem, ac divinis promiſſis mandatiſque debitam fidem promptumque obſequium ſuum, religioſis ſententiis prolatis, item amore in ſervandi uxorem, familiam, ac cognatos eoſque cum è pernicioſis erroribus, tum impendentibus calamitatibus eripiendi deſiderium teſtetur Abrahamus. Poſterius hoc primo enthymemati, prius ultimo ſubjici poterit.

Denique & *νῦν* adhibetor. Metus nimirum poſt ſecundum enthymema, ſidentia poſt enthymema tertium. Vtrumque è l. 11. Rhet. c. v. Exordio primus quidem in oratione locus, ac manus poſtrema ut plurimum convenit, totâ enim dicendi materiâ inventâ ac inſtructâ, proœmium repertu facilius eſt, præſertim locos illius lib. 3. Rhet. cap. xiv. commonſtratos adeunti. Cicero lib. 11. de orat. c. p. 77. *Hiſce, inquit, omnibus rebus conſideratû, tum denique id*

quod primum est dicendum, postremò soleo cogitare, quo utar exordio. Nam si quando id primum invenire volui, nullum mihi occurrit, nisi aut exile aut nugatorium, aut vulgare aut commune. Principia autem dicendi semper cum accurata & acuta & instructa sententiis, apta verbu, tum verò causarum propria esse debent.

II.

NOACHI AD MVNDVM DILUVIO PERITVRVM ORATIO.

CVM Noachus ejusque filii & administri multis ante diluvium annis arcæ divino jussu ædificandæ insudarent, & illius ævi homines, ut existimare par est, fabricam hanc mirati, rogarent, quid operis, & cui fini struerent? Noachus & peccata illorum arguit, & pœnam, quæ, nisi resipiscerent, cœlitus impenderet, denunciavit. Inde enim præco justitiæ dicitur 11. Petri c. 11. 5.

Hujusmodi orationem Noacho convenientem formaturus, ante omnia Noachi historiam & elogia è veteri & novo testamento pensitet, & omnes ejus circumstantias, optimis interpretibus consultis, rimetur: hæc enim prævia meditatio aperiet fontes enthymematum.

Exordium, cujus loci plurimi recensentur l. 111. Rhet. c. xiv. hîc ducatur è duobus illis, quos habetis, citati capit. §. 20. nempe *ix* *α τῷ λέγοντος καὶ τῷ περὶ γματος*, ex dicente & exre. Hoc feremodo: *Demiramini, Convenæ, quid ingens hac lignorum strues, & ista inusitati operu cæpta compages sibi velit &c.* Equidem quinquaginta amplius annos cum sociis meis, machina huic fabricandæ impendi, nec ante quinquaginta annorum aliorum decursum labore isto potero desungi: &c. Neque vero vel rerum novarum studium, vel gloria alicujus cupiditas, vel domesticarum rerum fastidium, aut inconsulta qua-

dam

dam temeritas, ad hoc quod videtis, opus tanto vixu struendum me impellit, sed summi rerum omnium arbitri qui stupendam hanc, quæ supra atque infra nos est, machinam, condidit, mandatum, improbo huic labori me destinavit, hac fini, ut & mihi qui majestatem ejus veneror prospiciat, & vos qui eundem, tam protervè, tamque pertinaciter adhuc laesistis, si fieri queat, ad saniores mentem revocet &c.

Proœmium in hanc sententiam, at phrasibus commutatis, conceptum sequatur 1. acris quædam delictorum illius ævi cum amplificatione incusatio 2. Comminatio pœnæ, & 3. ad pœnitentiam exhortatio.

Duo anteriora ut rectè tractentur, ob oculos sunt 1. Tres generalissimæ *orations* generis demonstrativi, l. 1. Rhet. ix, §. 6, 15, 16, sed in contrarias mutatae, nempe & vitia & horum causæ & opera turpia sunt: Deinde varii amplificationum loci, quos habetis l. 1. Rhet. c. vii, integro c. ix. §. 57. & seqq. c. xiv. per totum, tum l. ii. c. 7. & 23. l. 3. c. xvii. §. 18. & 19. Prima ergo orationis hujus pars exprobrat, illius ævi hominibus 1. luxum, 2. scædas libidines 3. rapinas, & tandem 4. rerum caducarum unicam curam in universum. Horum omnium turpitudinem, è cujusque definitione, causis, effectis, contrariis, exaggerare ingenio ac industriæ auditorum committitur.

Inde secundæ propositionis demonstrativæ, antea citatæ, monito fontes horum criminum, duo imprimis isti ostendantur, 1. supinus Dei neglectus, ad cujus imaginem se conditos, hujus mandatis se devinctos, hujus cœlesti regno se destinatos esse, cum plane sint immemores, mirum non esse si in varia ruant flagitia &c.

Secundo, Quod piis licet parentibus editi, impiorum

se connubiis inquinabant, formæ, gloriæ, & potentie vesano amore. Et hinc enim omnimoda illa corruptela.

Hic inducatur Noachus, commemorans, è patre suo sæpius se audivisse, quam fuerit Adamus de Sethi posteris sollicitus, ne forte à Caini perversa progenie illi corrumpere, quod tamen postea factum, Adamus ipse & Henoch & Mathusalem questi fuerint, quorum hunc Noachus, illos Noachi pater per ætatem convenire & audire potuit.

Secundâ parte Noachus promulget oraculum divinitus sibi factum, de perniciæ quæ orbi universo à diluvio immineat. Extat Genes. vi, vers. 3. & 7. Primo itaque calamitatem prædictam certo eventuram esse demonstratur è quatuor principiis, quæ Aristoteles suggessit l. 11. Rhet. c. xix. §. 33. & seqq. Primum est §. 33. Deus & potest & vult diluvium immittere, ergo certò illud est eventurum. Probatur antecedens: *Qui cum crearet mundum terram ab aqua determinavit, eadem illa denuo confundere & alterum altero obvertere, utique potest. Velle autem se id nunc facere, ex edicto ipsius constat, certo voluntatis indice.*

Secundum §. 43: *Neque vero aliter potest: tam enim multa sunt flagitia vestra, & tam enormia, tantus majestatis ejus contemptus, ut non possit non tandem excandescere, & patientiam vertere in furorem &c.*

Tertium §. 36. Peccata pœnarum & quidem gravia gravium sunt prænuncia. Vestra autem jam ad summum pervenire, ergo pœna ingens est in propinquo.

Quartum §. 37. *Ea causa est cur hanc fabricam mihi Dominus imperaverit; Quod si ulli angulo terra, parcere ille superet, me cum meis istuc potius amandares &c.*

Proximum his est, ut magnitudo cladis imminetis ostenda.

stendatur. Fiat id cum è locis amplificationum aliis supra citatis, tum è 1. Rhet. vii. §. 50. & Genes. c. vii. §. 4, 11, 12, 19: *Rumpentur fontes magnæ abyssi, & cæli catarracta aperientur, Veniet imber, & terram perpluet ut operiantur omnes sub cælo montes & deleatur omnis caro &c.* Hic & verba & res quasdam suppediabit Ovid. fab. 9. l. i. Metam. Inspersgantur passim sententiæ, quæ reverentiam divini numinis, detestationem flagitiorum, amorem sanctæ vitæ & flagrantem cupiditatem servandi gentiles suos spirent.

Tertia eaque ultima orationis hujus pars exhortationem contineat ad seriam vitæ emendationem, ubi duos affectus pudorem & metum commovere crit opportunum: *Redite ergo in viam gens perversa, parete Domino è sordibus vos evocanti. Nimum jam voluptati datum, nimium violentia. Pudeat tandem vanitatum, pudeat rapinarum, pudeat tot flagitiorum quibus animus pariter ac corpora vestra contaminastis.* Adhibete l. 11. Rhet. c. vi. §. 5. & seqq. *Deum, angelos, sanctos majores vestros cogitate*, ibid. §. 22, 28, 29. 44.

Post pudorem, metus excitetur, quod fiet si periculum ingens & internecinum à Deo irato, & contumeliam passo imminere demonstres; huc faciet l. 11. Rhet. c. v. §. 1. 3. 4 6. 8. &c.

Epilogus addatur è locis perorationis, qui extant l. 11. Rhet. c. ult.

III.

MILTIADES HORTATUR JONES, UT PONTE ISTRI RESCISSE PATRIAM LIBERENT.

ERgo conclusio hic demonstranda est: *pons Istris nobis est rescindendus.* Hujus & subjectum & predicatum ac quæ in his insunt ex Aristotelis præcepto, primo omnium studiosè

diosè erunt indaganda. Nempe quis, cui fini, qua conventionione, pontem struxerit, quinam appositi ei sint custodes, & an eum rescindere non utile tantum, sed honestum quoque ac licitum sit. De his ergo priusquam manum orationi scribendæ admoveas legendus est Herodotus l. iv. Corn. Nepos in vita Miltiadis c. 3. Justinus l. ix. c. 5.

Hi autores de argumento isto ita sunt legendi, ut *mè-jurà*, h. e. ea in quibus vis persuadendi inest, observentur studiosius, ac in orationis componendæ adversaria referantur. Præterea & de obsequio tyrannis debito, de fide hostibus servanda, de patriæ & libertatis justo amore è morali philosophiâ quod huc facit recognoscendum est. Partem horum aliquam docuit Grotius, l. iiii. de Jure pacis & belli c. 19. & 24.

Hac meditatione præmissa demum ad scribendum accingi fuerit tempestivum.

Exordium quod aut omitti hic aut perbreve præmitti potest, criminetur inexplebilem dominandi libidinem Dario Hystaspidis. Primus hic est deliberativorum promiorum locus iii. Rhet. c. xiv. §. 44.

Confirmationis primum enthymema esto: Libertatis obtinendæ adest opportunitas, ergo illa arripienda est.

Dilatetur I. Majoris intellectæ probatione, è principio quod extat l. i. Rhet. c. vi. vers. 3: *Nullum est animal sui tam incuriosum ut libertatem offensam negligat &c.*

Secundò exaggeretur oppressio ac servitus Græcarum in Asia civitatum, illata à Persarum Regibus.

Tertiò probetur ipsum enthymematis antecedens: *Vel enim ferro hostium, vel inopia, peribit Rex cum exercitu suo, si ponte rescisso redditus prohibeatur. Hoc autem everso salva erit libertas, &c.*

Secun-

Secundum enthymema, à facili: *Nullò negotio, citracon-
fluum, brevis tempore hoc modo Regem cum omni exercitus sui ro-
bore delere possumus, &c.* Extat hic locus l. i. Rhet. cap. vi.
§. 35. & 36.

Tertium enthymema: *Nec vestra tantum, viri lones ac
Æoles, in Asia civitates, nobis consanguineæ, servabuntur, sed &
Gracia ipsa, mater vestra, hac ratione à tyranno illo erit tuta.*
Principium hujus enthymematis extat l. i. Rhet. cap. viii,
§. 2. & cap. vi. §. 7.

Quartum enthymema è loco communissimo conse-
quentium l. ii. Rhet. c. xxiii. §. 55. l. i. Rhet. c. vi §. 6 &
vii §. 63. *Ponte rescisso, & excluso ex Europa Dario, multa nos
manebunt bona: Securitas possessionum, vigor commerciorum, rei
pecuniaria augmentum, sociorum & amicorum conservatio, &c.*

Post enthymemata δεικνύα, sequantur ἐλεγχνύα, alte-
ra enthymematum species. Videt. l. ii. Rhet. c. xxii §. 30.
& l. iii. c. xvii. §. 21. & l. ii. Rhet. c. xiv. §. 1.

Primo ἐλεγχνύα: *Non violabitur hac re nostra fides. Tempus
enim à Dario nobis constitutum efflaxit, &c.*

Deinde ἀντιρρονομία: *Attuendum est ne Scythæ victo-
res, ponte hoc ad transitum in ipsam patriam nostram abutantur;
at cum patria pernicie tueri pontem, nec promissimus, nec promitte-
re debuimus.*

Moratum erit, si patriæ, & publicæ omnium libertatis
amorem, privatæ dominationi & singulorum commodis te
anteponere, fidei interim datæ memorem esse, nec nisi in re
licita, à pactis conventis recedere contesteris.

Ex aff. tribus primo metus erit excitandus, nam & Da-
rius si per pontem revertetur, aut, si ille forte pereat, Scythæ
victores, quin si hi illum huc usque insequantur, ambo nobis
erunt formidabiles.

Deinde confidentia, affectus metui contrarius, commoveatur: *Quin ergo aggredimini mecum opus, principes Græcorum, & pontem rescinditis: nemo nobis concordibus poterit resistere: causa honesta est &c. Asia & Græcia factum approbabit &c. Si Scythæ, quibus numero impares, at fortitudine & scientiæ rei militariæ superiores sumus, Darij impetum sustinuerunt, multo magis id nos poterimus &c. Favet divinum numen proposito nostro &c. Loci utriusque affectus, prostant l. ii. Rhet. cap. v. Huiusmodi plena affectus oratio Epilogi vice esse poterit. vid. l. xii. Rhet. cap. ult. §. 7.*

IV.

HISTIAI MILESII ORATIO PRÆCEDENTI CONTRARIA.

CVM Histizus posteriori loco dicat, ex præcepto Aristotelis, l. iii. Rhet. xvii. §. 24. primum solvere rationes Militiadis, & tum demum suam sententiam confirmare debebit.

Primum enthymema: Fidem regi debitam utque promissam violabimus, si pontem rescindemus. Ergo id faciendum non est. Dilatetur additione majoris & probatione minoris.

Secundum enthymema: Pontis rescissio nobis Asiaticis servitutem asseret acerbiorē, vobis in Græcia libertatis reliquum everteret. Etenim hac injuria & perfidia irritabitur Rex ut sævius regnet. Adhibet l. ii. Rhet. cap. xix. §. 33. & 34.

Tertium enthymema: *Nec facile factu est quod moliris. (vid. l. i. Rhet. c. vi. §. 36.) Rumoribus enim de regij exercitus calamitate temere credendum non est: sorte sparsit illos consilio Rex, ut fidem nostram periclitetur &c. Resciet pontem, &c. Aut per loca vadosa remeabit, & tum clementiam vertet in furore.*

Quar;

Quartum, *δεῦτε*, à felicitate & partibus ejus, è l. i. Rhet. cap. v. §. 3. 17. 23. 41.

Divitias, honores, fortunam omnem, quin vitam ipsam perdemus si Darius peribit. Ergo ponservandus & incolunitati Regis nobis erit studendum.

Antecedens probatur, Darii enim regno nititur omnis nostra fortuna, vid. Corn. Nep. in Milt. c. 111. §. 5.

Τὸ ἡθικόν hic erit si ostendas, fidei datæ ac debitæ religionis observationem tibi cordi esse.

Τὸ παθητικόν, erga principes Græciæ viros, beneficii regij amplificatio è l. 11. Rhet. c. vii. §. 3. & metus Regis perfidiæ suorum irritati. Adite l. 11. Rhet. c. v. §. 6, 8, 9, 12, & ex his patheticam hujusmodi orationem concinnate.

Epilogus vim argumentorum brevitè repetat, l. 111. Rhet. c. ult. §. 9.

V.

POLEMARCHI ATHENIENSIS ORATIO MILTIADEM ADVERSUS INSULAS QUÆ DARIUM ADJUVERUNT MITTENDVM SVADENS AD EXEMPLVM MANLIANÆ CICERONIS.

Miltiadis res gestas primum cognoscere oportet, ex Herodoto, Plutarcho, Corn. Nepote, Justino, Valer. Maximo & aliis.

Exordium ex dicente, ex re, & ex auditore petatur l. 111. Rhet. c. xiv. §. 20. Ex dicente: *Officium Polemarchi est de bello curam suscipere &c.* Ex re: *Ni insula quæ defecerunt ad obsequium reducantur, Athenæ non possunt esse tutæ &c.* Ex auditore: *Vestrum, cives Athenienses, est decernere &c.*

Narratio commemoret insularum ad Darium defensionem.

Propositio per partitionem, Primum de genere bellum de imperatore dicendum esse ostendat. Genus est ejusmodi, ut omitti bellum nequeat. Probatur quatuor enthymematibus, à partibus humanæ felicitatis l. i. Rhet. c. v.

Primum enthymema: Agitur in hoc bello gloria Atheniensium, ergo omnino est suscipiendum.

Antecedens probatur è loco communissimo contrarium: *Dedecori nobis est quod incolæ insularum, subditi nostri, commeatum & triremes hosti suppeditarunt, atque ipsi etiam contra nos in aciem sunt profecti, quos nisi quantocius ad officium redire coegerimus, nova auxilia Dario submittent &c. Illic autem non regno suo sed agro tantum nostro pulsus est &c.*

Probato antecedente, inferatur conclusio per comparisonem à minori: *Majores nostri ne unius quidem civis defectionem inultam reliquerunt, vos tot insularum &c. Ægineta, quod unam navem nostram in Sunio diripuerant, acriter à nobis sunt multati: Vos iis qui ad totius Atticæ, imò Græciæ vastationem cum Persis conspirarunt ignoscetis &c.*

Secundum enthymema: Agitur salus sociorum & amicorum, ergo bellum hoc necessario est suscipiendum.

Antecedens probetur enumeratione: *Jones, Æoles, Delij, Lesbij, Euboici, Thraces &c.*

Conclusio per comparisonem à minori: *Si propter socios majores nostrorum Peloponnesi cum Megarensibus &c.*

Tertium enthymema: *Agitur de maximis proventibus nostris. Atticus ager vix incolæ suos alere potest. Cycladum autem insula tam sunt opimæ &c.*

Quartum enthymema: *Aguntur bona multorum civium, qui ista insularum ad Persas defectione prædialia, naves, pecuniam, armenta, & varia vitæ subsidia, quæ in insula istâ habebant, omnia amiserunt.*

Repetita

Reperita conclusione, transeat ad alteram partem & Miltiadem præ omnibus aliis ducem classis esse eligendum svadeatur quatuor enthymematibus.

Primum: Miltiades peritissimus est rei militaris, ergo ille potissimum classi est præficiendus. Probetur antecedens: 1. Apollinis ipsius responso 2. Inde à puero miles fuit, 3. *Bella, Thracicum, Lemnium, Persicum, gesta feliciter, nullam rem declarant, in usu militari positam, qua hujus scientiam sugere possit.*

Secundum enthymema: Miltiades est virtute militari præditus. Testis est Chersonesus, testis Lemnos, testes Cyclades; testis ager Marathonius &c. Idem justitia, æquitate, humanitate, facilitate, præcellit.

Tertium enthymema: Valet autoritate, hanc enim illi conciliavit oraculi responsum. Eadem patuit in Lemno, ubi Cares resistere ei non sunt ausi. Item cum contentio inter nostros Prætores esset, utrum mœnibus nos defendere-mus an hosti iremus obviam, unius Miltiadis autoritas plus quam cæterorum omnium valuit &c.

Quartum: Felicitas ejus maxime patuit in pugna Marathonica, ubi decuplicem numerum hostium profligavit.

Epilogus fidentiam moveat è l. 11. Rhet. cap. v. & suum in reip. amorem testetur.

VI.

ARCHONTIS ATHENIENSIS ORATIO PRÆCEDENTI CONTRARIA.

EXordium è secundo deliberativorum præemiorum loco l. 111. Rhet. c. xiv. § 44 amolitur calumniam, & moratà oratione utatur: *Neutiquam ego viros de rep. bene meritos præmiis suis privare, aut de gradu dejicere cupiam &c. Patris salus*

lus & tranquillitas cordi mihi est, qua quidem tuta esse nequit si
unt civi toties imperia committantur, &c.

Primo igitur ostendat bellum hoc neque necessarium
esse, neque justum; non necessarium quidem, quod insulæ ad
obsequium sponte sua sint reddituræ &c. Injustum vero, 1.
quia per vim à Dario in bellum sunt protractæ &c. 2. quia
Miltiadis privatum in quasdam insulas est odium, de quo vi-
de Herod. l. vi. in fine.

Cæterum dotes Miltiadis priori oratione recensitas o-
mnes agnoscat Archon, sed inde contrarium concludat. Sic
ergo primum enthymema: Miltiades jam tum autoritate
& potentiâ nimium eminet. Ergo ulterius evchendus non
est. Dilatecur 1. probatione antecedentis per enumeratio-
nem & exaggerationem imperiorum à Miltiade adhuc ge-
storum.

Deinde addatur major: Qui potentia & autoritate jam
tum omnes cives supergreditur, novis honoribus mandandus non est
&c. Inequalitas enim nimia civium, gravis est libertati &c. Ne-
que temperant sibi potentiores quam plus quam licet affecerint &c.

Secundum enthymema ducatur ab exemplo Pisistrati,
cui cum nimium potentia à civibus nostris indultum esset,
verrit illam in tyrannidem.

Tertium enthymema: Præsto sunt alij, quibus citra me-
tum nimia potentia hoc bellum queat committi.

Mores dicentis arguet, si libertatem prædicabit Archon,
atque ejus conservandæ studium singulare præ se feret.

Denique affectum invidiae movebit, ostendendo,
fortunæ potius quam virtutis esse, quod gessit Miltiades, 2.
esse inter cives, qui merito & ipsi expetant imperia, quippe
scientia militari, ac animi magnitudine Miltiadi pares. Nec
sine opprobrio hos præteriri. Ad l. II. Rhet. c. x § 9, 10, 16 &c.

Epilo-

Epilogus Conclusionem principalem denuo inculcet, & sincerum esse consilium suum, citra odium in Miltiadem, citra gratiam in ullum alium, in publicum tantummodo bonum intentum, l. 111. Rhet. c. ult. §. 9. & 3.

VII.

ORATIO PVBLII VALERII TARQVINIO SV-
PERBO REGNV M ABROGANDVM SVA-
DENS, AD IMITATIONEM TER-
TIÆ PHILIPPICÆ.

DE Tarquinio superbo scribunt Livius l. 1. à cap. XLVI. usque ad finem libri. Dionysius Halicarnassensis l. IV. à cap. XLIX. usque ad finem libri. Florus l. 1. cap. VII. Eutrop. l. 1. Sextus Aurelius Victor cap. 11X. Ex his scriptoribus tyrannidem & exilium Tarquinij Superbi recognoscere, & mox tertiam Philippicam Ciceronis perlegere ac utrobique *ra mura* studiose confectari in antecessum oportet.

Proœmium animos præparet metu & fidentia, é 11. Rhet. c. v. proposito nimirum periculo quod ab excluso jam urbe Tarquinio omnium capitibus & fortune immineret, cum allegato breviter, non deesse præsidia, quibus rem bene cessarum confidere debeant.

Propositio hortetur populum, ut Tarquinio regnum adimat, eumque, cum liberis, jubeat exulare.

In Confirmatione laudentur primo Brutus, qui contra Tyrannum primus signum sustulit, deinde populus ipse Romanus, qui portas Tarquinio clausit, tertio exercitus, qui in castra venientem Brutum læti acceperant.

Post illa hoc enthymema tractetur, assumptum è genere demonstrativo:

Infinita sunt quæ superbè, crudeliter, avarè, injustè
gessit

gessit Tarquinius, nec ulla apparet spes emendationis, Ergo æternum excludatur urbe & regno.

Ante cedens probetur, enumeratione flagitiorum ejus ex autoribus citatis, & tandem stuprum à Sexto Tarquinio Lucretiæ illarum amplificetur. Tandem exhortatio fiat, primo pudorem Romanis, inde fidentiam movens ad exemplum Tullianum.

IIIX.

MENENII AGRIPPÆ ORATIO AD POP. ROMANVM IN MONTE SACRO.

Legendi sunt Dionysius Halic. l. vi. cap. lxxv. & seqq. Liv. l. ii. cap. xxiii. Florus l. i. c. 23. Valer. Max. l. viii. cap. ix.

Exordium attentum reddat populum jucundo illo Apologo de membris humani corporis à ventre dissidentibus, & citatis autorum locis.

Propositio plebem è monte in urbem invitet.

Confirmationis 1. argumentum esto integer hic syllogismus, è propositione Aristotelica l. i. Rhet. cap. viii. §. 2. Quod civitatem conservat à civibus vobis est faciendum.

Reditus vester civitatem conservabit. E. redeundum vobis est.

Conclusio primo loco ponatur, est enim ipsa orationis propositio.

Sequatur major propositio, duplici hac probatione dilatata; 1. Neque enim absque eo vel nomen vestrum vel illam tot præliis partam gloriam tueri potestis 2. In rep. ut in navigo, non nauclerus tantum, sed & remex, & quisvis nauta, communem juvare tenetur navis salutem.

Mox & minor his aliisque probationibus explicetur:

1. *Absentibus vobis: caput erit sine membru*, 2. *Volsi alique hostes finitimi partum vestro & majorum sanguine imperium evertent, &c.*

His omnibus adjiciatur conclusio: *Quin itaque revertimini ad lares vestros &c.*

Alterum argumentum sub propositione Aristotelica quæ exstat 1. Rhet. l. vi. 43 esto hujusmodi: *Reversis vobis ex animi sententia omnia indulgebuntur, Ergo revertimini.*

Antecedens dilatetur enumeratione eorum quæ plebs cupivit & consequetur: *Æs alienum omnibus qui solvendo non sunt remittetur: Si quorum corpora, quod præstitutum solutioni diem exceßerint, ex lege jam tenentur, & ipsa erunt libera. Præterita omnia oblitterabuntur, de futuris ex communi vestro & Senatû consensu statuetur. Tuendis vobis peculiaris magistratus erunt Tribuni &c.* Post illa repetatur conclusio primi syllogismi verbis variatis & novo medio termino inserto.

Hæc sive morata oratio, passim interponatur, prolatis ejusmodi sententiis quæ dicentis tres ab Aristotele 11 Rhet. 1. §. 9. & 10. commendatas virtutes ostendant.

Epilogus ductu tertij perorationum loci 111. Rhet. c. ult. §. 7. utriusque partis quæ remansit, quæque secessit, si dissidere pergant, pericula ob oculos ponat 11. Rhet. v. §. 45. & seqq.

IX.

CATONIS CENSORII ORATIO IN SENATU,
SVADENS CARTHAGINEM ESSE
DELENDAM.

ADite Plutarchum in Catone majore cap. L. & seqq. Strabonem l. xvii. pag. 573. Plin. l. xv. cap. 18. Ciceronem in Catone majore cap. vi. Florum l. ii. cap. xv. §. 4. Appianum in Lybicus.

In exordio Cato ex Africa redux è tertio præmio-
rum deliberativorum loco l. xi. Rhet. xiv. §. 44. potentiam
Carthaginis extollat.

Propositio: *Carthago funditus est delenda.*

Confirmationem inchoet morata oratio, qua non ex
odio in illam gentem, non ex insita quadam inhumanitate,
ut malevoli calumniabantur, sed solius reip. ac posteritatis
causa ita se sentire contestetur.

Primum enthymema è l. Rhet. v. §. 4. & 118, 2. *Cartha-
gine deleta vita nobis & nepotibus nostris demum securæ erit, Er-
go delenda est.*

Antecedens probatur quia jugum exequere & volunt
& possunt. Adhibete è l. 11. Rhet. xix. propositiones de
possibili & futuro. *Neque enim post bellum Punicum secundum
finitum collapsa sunt Carthaginienſium res, sed immensum aucta:
sunt illi ingentes divitiæ, copiosa juvenus, armorum instrumento-
rumque bellicorum abundans apparatus, trecentas urbes in Africa
habent, in urbe hominum millia septingenta, Urbs ipsa ultra quam
credi potest est refecta, fabrorum multitudinem tantam publicis
alimentis sustentant, ut singulis diebus centum quadraginta clypei
gladij trecenti & decem, lanceæ quingentæ, mille tela, compingi
& in armentarium referri queant. Mulieres Punicæ capillos ad
funes conficiendos præbere sunt paratæ &c.*

Volunt autem deficere, quia principatum nostrum & impo-
situm tributum ferunt ægerrimè &c.

Conclusio: *Itaque omisso jam Masinissæ negotio nostrum
agamus, &c.*

Secundum enthymema è l. Rhet. vi. §. 29. hac pro-
positione: *Cujus causa multum laboratum est. Quæ
centum hujus & viginti annis à majoribus nostris & nobis magno labo-
re, virtute ac fortuna parigesta sunt, eo omnia pertinebant ut fra-*

Ad Carthaginis potentiam nostram firmaremus. Hic è Floril. II. c. 2. §. 6. breuiter enumerentur Appij Claudij, Caji Duillij, Attilij Reguli, Scipionum resgestæ. Pudeat autem, nos horum vestigiis derelictis, bellum, quod commissum & profligatum est, non conficere.

Peroratio moveat metum, è II. Rhet. v. & non procul abesse periculum inde ostendat, quod tridui tantum itinere Roma absit Carthagine

X.

SCIPIONIS NASICÆ ORATIO CATO-
NIANÆ CONTRARIA.

PROcœmium è primo exordium deliberativorum loco III. Rhet. xiv. §. 44. criminetur asperitatem Catonis. Propositio, *Carthago est seruanda*, Initio uitem confutanda sunt, argumenta aduersarii, ex præcepto Aristotelis III. Rhet. xv. 11. 24. Primum quidem è loco communissimo à maiori: *Carthago integra non erat nobis par, multo ergo minus iam erit, cum magnâ parte potentiæ suæ est exuta.* Secundum, hoc modo: *Non in hoc laboratum est à patribus & nobis, ut funditus deleteretur Carthago, alioqui sub finem primi belli Lutatius Catulus, & sub finem secundi Scipio id præstare potuissent; nec periit noster ille centum & viginti annorum labor, modo in Africa sua Pœnus nostrâ virtute contineatur.*

Inde suæ sententiæ fidem faciat è prima propositione de bonis controversis I. Rhet. vi. §. 24. *Carthagine deleta iuventus Romana degenerabit, Ergo delenda non est.*

Antecedens probetur, 1. simili: *Vt ferrum nisi exerceas rubigine conficitur &c. 2. Exemplo: Epaminonda morte victus Atheniensium intercidit.* Justinus vi. 9. 3. propositione nona de bonis controversis, I. Rhet. vi. §. 32. *Cleomenes Rex*

Spartanus dicentis cur *Argivos* qui *sape bellum susceperant* non *delevissent*, respondit: *nequaquam delendi nobis sunt, ne desint qui juvenes nostros exercent.*

Post hæc inseratur conclusio enthymematis. Sequatur morata oratio, quâ suum in temp. studium declarer.

Epilogus fidentiam moveat è 11. Rhet. v. & argumentum ficulneum Catonis à præcoci ficu desumptum contemnat, cum pomum illud argumento sit, & nos tridui itinere Roma Carthaginem pervenire posse.

XI.

CAROLO M. SVADET SENATOR, VT E DANUBIO IN RHENVM NAVIGATIONEM PROCVRET DVCTA FOSSA.

Annales Francorum ad annum dccxciii. de hac re ita referunt: *Persuasum Regi erat si inter Radantiam & Almonum fluvios fossa navium capax duceretur, posse commodè è Danubio in Rhenum navigari, quod alter Danubio, alter Mæno miscetur: Confestim cum omni comitatu suo eò venit, congregataque hominum multitudine totum autumnus tempus in eo opere consumpsit. Ducta est fossa inter prædictos fluvios, duum milium passuum longitudine, latitudine trecentorum pedum, sed incassum: nam propter juges pluvias & terram quæ palustris erat nimio humore suapte natura imbutam captum opus consistere non potuit: sed quantum interdiu terra à fossoribus fuerat egestum, tantum noctibus humo iterum in locum suum relabente subsidebat.*

Exordium de re magnâ, admirabili & ad Cæsaris maiestatem maximè pertinente se dicturum promittat; his enim argumentis excitatur attentio 111. Rhet. 14. §. 28.

Propositio: *E Danubio in Rhenum navigatio procuranda est.*

Primum

Primum enthymema sub propositione quæ extat 1. Rhet. v. §. 35. & 41. *Fieri hoc potest, Ergo suscipiendum est. Dilatetur 1. illustratione majoris: Absit ut impossibilia suadere institam &c. Inanis est oratio, de iis, quæ humanas vires excedunt &c. 2. probetur minor: Intervallo hant magno distant fluvij, quorum alter in Rhenum, alter in Danubium evolvitur, hi si ductâ fossa jungantur expetita navigatio institui poterit. Neque novum est, aut ultra humanam opem, fossas ducere navigabiles. Fecerunt olim Romani. Vid. Tacit. Annal. xiii. cap. 53. §. 3. fecerunt Franci nostri, alijque. Plures minoris probationes suppeditabit II. Rhet. xix. à §. 1. ad 22.*

Secundum enthymema à partibus felicitatis quæ enumerantur 1. Rhet. v. item è propositionibus quæ leguntur 1. Rhet. vi. 6. & cap. vii. §. 63. *Hujusmodi navigatio, nomini tuo gloriam, incolis divitias, imperio tuo firmamentem ac robur offeret. Probentur singula: Gloriosum utique erit nomini tuo, hac ratione Pontum Euxinum cum Oceano Germanico procul jungere &c. Merces è Danubio in Rhenum & contra, sine magno sumtu transferentur. Commercia autem nova, novas offerent divitias &c. Sed & exercitus tuus, sine quo regnum tibi tutum non est, nullo negotio è Rheno in Danubium transportari poterit &c.*

Tertium enthymema, sub propositione quæ extat 1. Rhet. vi. 39. *Tanto regi convenit, ut res magnæ, admirabiles, in totius Europa bonum cedentes suscipiat &c.*

Quartum enthymema indicio propositionis, quam habetis 1. Rhet. vii. 15. *Non indiges ad hoc opus aliis ministris quàm militibus tuis, qui à Saxonico bello jam quiescentes ni in opere teneantur, enervabuntur, & ad labores militares reddentur inepti, magno regni tui malo.*

Affectus confidentiæ post enthymemata in animo Caroli commoveatur, iis argumentis, quæ extant II. Rhet. v. 36, 39, 40, & 46.

Moratum erit, si animo erga Imperatorem ejusque gloriam ac incrementa devoto ista suaderi, serio contesteris.

XII.

ORATIO PRÆCEDENTI CONTRARIA.

EXORDIUM esto ex dicente, ex auditore & ex re III. Rhet. XIV. 20. Ex dicente: *Nisi me necessitas, & qua majestati tua devotus sum, fides cogeret, non sustinerem, collegæ adversari. Sum enim ab omni dissensione alienus, concordia amans ac quietus.* Ex auditore: *Tui vero, Carole, regni salus, tranquillitas atque incrementa, omnibus nobis meritò cordi sunt, &c. Neque tu libentius audies novas sed inanes spes, ostentantem, quàm eum, qui res tuas jam tum florentissimas, incolumes cupiat conservare &c.* Ex re: *Rheno Danubium immittere sunt qui laborent, consilium primà specie latum, at tractatu durum, exitu, nisi omnia me fallunt, demens ac ridiculum.*

Principiò quatuor enthymemata adversarii totidem oppositis confutentur, vide III. Rhet. c. XVII. §. 24.

Primum: *Fieri non potest quod illi suadent, ergo frustra soadetur.*

Probatur antecedens, I. *Danubius & Mænus cursus habent contrarios, ille ortum, hic occasum versus, nequaquam itaque misceri poterunt, sed alter alterum naturaliter destituet fugietque* Secunda probatio: *Inter omnes conjungendos locus medius longè lateque est palustris, & ob id, ad fossam, quæ consistat, ducendam minimè aptus; quantum interdiu à fossoribus egeretur, tantum noctibus humo relabente concidet &c. plures antecedentis probationes suppeditabit II. Rhet. XIX. II. 12. 13. &c.*

Secundum enthymema: *Eventus frustratus imaginariam gloriam in opprobrium vertet, &c. Mercium & militum sacilius transportandorum spes in risum abibit.*

Ter-

Tertium enthymema: *Tantum incerti commodi ac vanae gloriola cum certo fama dispendio captare, regia majestati minime convenit* &c.

Quartum: *Militum opera sessu ducendi perdi nequit. Imminent enim nobis hinc perfidi Saxones, illinc truculenti Saraceni, adversum quos militum manus armis in campo nobis sunt exercenda.*

Post *ἰλεγκνῆα* addantur enthymemata *δευκνῆα*. *Fluviorum cursus conari immutare, est natura ipsi & Deo, huius auctori, reniti, Ergo illud tentandum non est.* Secundum è loco communissimo 11. Rhet. xxiii, 64. *Pari molimine fortassis & montes postea transferre allaborabis, nam & hoc gloriam & comoda afferre posset, Tertium: Non eget hac fluviorum conversione regnum Francicum, quippe mercium ac militum huc illuc transportandorum opportunitate jam tum abundè instructum.*

Ex affectibus pudor huc pertinet, qui excitatur, si ea agi demonstretur, quæ lædunt existimationem 11. Rhet. vi. 18.

Morata oratio claudat orationem, qua non contendendi studio, sed patriæ & Imperatoris amore se ista protulisse iterum contestetur.

XIII.

LAVDATIO JOHANNIS BAPTISTÆ.

Demonstrativis orationibus, quarum exempla deinceps proponemus, pariter omnibus præmittendum est monitum Aristotelis 11. Rhet. xxi. 9, videlicet de argumento orationis ante omnia ea esse cognoscenda, quæ illi insunt, vel omnia vel aliqua. *Quomodo enim, ait, possemus laudare Athenienses, si non teneamus, si Salamine navalem pugnam & prælium in Marathone, aut quæ pro Heraclidis gesserunt, &c. Eodem modo*

modo dicere nobis licet: quomodo laudate Johannem Bapt. possis, nisi natales, vitam & mortem ejus antè habeas probè cognita.

Johannem itaque Baptistam laudaturus, primum omnium historiam illius, dicta, facta, diligenter cognoscat oportet, absque hoc enim in materia laudationis nulla superet.

Exordium è tertio & quinto procœmiorum demonstratorum locis, 111. Rhet. xiv. 11. petatur. Et tertio quidem sive ex svasione, hoc ferè modo: *Prodest maximè sanctorum virorum exempla cognoscere atque expendere: habet enim hujusmodi meditatio vim haut exiguam excitandæ pietatis* &c. è quinto, id est ex iis quæ referuntur ad auditorem, benevolentia pareretur & attentio. Benevolentia quidem è propositione de amore, 11. Rhet. iv, 24: *Non quidem quod de vestra pietate dubitem, sed ut currentibus, quod dici solet, calcar addam.* Attentio paratur magnis 111. Rhet. xiv, 28. *Dicam de eo viro cuius similem nulla historia, non Græca, non Romana loquitur.*

Propositio itaque pars sit procœmii

Narratio, non sit perpetua sed per totam sparsa orationem, quod in demonstrativis orationibus fieri debere docetur 111. Rhet. xvi. 1.

In confirmatione, naturalis ordo servetur, ut primò ortus, denique vita, denique mors celebretur, eorumque omnium ex evangelica historia notissimorum amplificatio fiat. Est enim demonstrativis orationibus omnium maximè amplificatio accommodata, 1. Rhet. ix, 63. & lib. 111. c. xvii. 4. Hæc autem fit per enthymemata quæ probant rem magnam esse 11. Rhet. xxvi, 3. Istiusmodi enthymematum loci habentur 1. Rhet. vii, ix. & xiv, it. libr. 11. capp. vii. & xxiii.

Primum

Primum enthymema, ex pluribus amplificationum locis petitum, congerie quadam, ea enumeret, quæ circa ortum Johannis magna & singularia contigerunt. Ut quod præcipua quadam Dei curâ misso in eam rem Angelo Gabriele, tum cum Dei cum hominibus familiaria colloquia diu cessassent, è sterilibus & annosis parentibus prognatus, & jam in utero repletus est spiritu S., non obstante parentis incredulitate.

His enumeratis amplificatisque subjiciatur consequens enthymematis. *Ergo natiuitas iohannis plane est singularis, per asyndeton, anaphoram & incrementum: Nihil sanè hic nisi singulare, nisi supra mortalium sortem, nisi stupendum, nisi diuinum &c.*

Cum hoc consequente primi enthymematis, connectatur antecedens secundi, ex octavo amplificationum loco, quem habetis 1. Rhet. ix, 60. *Nihil habet externa historia, quod comparari cum huius viri ortu debeat. Repetisc animo auguria illa, &c. si Diis places, oracula, quibus Pythagora, Alexandri magni, & aliorum natales inclamarunt. Somnia quadam & inanes Pythia aliisque sacerdotis delusiones deprehendens. In diuinis literis nostris quorundam similes natales celebrantur, qui tamen oppido pauci sunt, & si Christi Seruatoris ortum excipias, hinc splendori omnes cedunt &c. Addatur consequens enthymematis per interrogationem. Equis ergo non veneretur pueri huius natales, & cum propinquis ejus summa ab eo omnia non expectet?*

Posthæc vita ejus laudetur, & in illa, primo quidem summa austeritas victus cultusque. Amplificari illa inter alia poterit è XIII^{to} loco communissimo 11. Rhet. xxi, 11, 49. à partium enumeratione, per διατίπωση: *Parentibus relictis in desertum se contulit, ubi victus ejus locusta, vestis, pellis camelina; stratum, humus; domicilium, caverna, &c.* 11. præconium

conium poenitentiae in deserto convenis quibusque factum , per sermocinationem amplificatum afferatur. III. in tam sublimi vitae genere, singularis ejus modestia ex signis demonstratur laudeturque.

Tandem & mors ejus celebretur , addita in thesi laudatione martyrii.

Singulis orationis hujus membris interponatur morata oratio, qua nunc divini Numinis erga mortales providentiam singularem , nunc vitae austerioris & a mundi hujus vanitatibus semotioris studium, nunc seriam morum emendationem, tibi quoque curae ac cordi esse praeteferas.

Ex affectibus misericordiae huc pertinebit : quae ad extremam orationis partem, quae de morte viri agitur, cieri poterit ea ratione, quam Aristoteles docuit II. Rhet. IX, 28, 31, 32 & 33. Pertinebit huc & aemulationis affectus, qui ut concitari debeat à Rhetore nostro ostensum est II, Rhet. XI.

Epilogus imaginem quandam hujus viri breviter repetat, & ad laudabile illius exemplum auditores invitet.

XIV.

ELOGIUM MOSIS.

Mosen laudaturus, & res illius probe recognoscat, & harum magnitudinem animadvertat, monitu locorum amplificationis, & denique de concinno tractationis ordine cogitet.

Res ejus praeter sacram historiam luculenter descripserunt Philo Alexandrinus tribus libris, Et Josephus in Antiquitatum & duobus contra Apionem libris, Gregorius Nyssenus libro singulari, Rabbi Moses Maimonides, in More Nebuchim, parte secunda cap. 33 & passim alibi, Diodorus Siculus ecloga ult. Et è recentioribus Benedictus Pererius proœ-

proœmio commentariorum in Genesin, Antonius Possevinus in Bibliothecâ selectâ l. 2. cap. 4. & seqq. Brevius de eodem agunt Justinus Martyr cohortatione ad gentes, & externi illi Strabo l. xvi. Plin. l. xxx. cap. 1. Justinus è Trogo Pompejo lib. xxxvi. Dionysius Longinus in libello de sublimi genere dicendi, Trebellius Pollio in vita Claudij Imperatoris.

Amplificationum loci, quorum ductu rei magnitudinem advertere, & demonstrare possumus, continentur, ut supra jam tum indicatum est, i. Rhet. vii, ix, xiv^{to} capp. & libri 2^{di} vii. & xxiii. capp. Imprimis autem huc pertinet citatum cap. ix. libri. i. utpote quo propositiones generis demonstrativi propria longâ seriè perscribuntur.

Ordo in hac laudatione vel naturalis vel artificialis eligi poterit. Si artificialem observare lubet, primò erit memorandum, celebrandumque, quantus Philosophus fuerit Moses, quippe eruditus omni sapientia Ægyptiorum, Act. vii, 22. Ægyptiorum autem sapientiæ studia fuere inter alia, Arithmetica, Geometria, Astronomia, Physica, Medicina, belli item ac pacis artes, ut ex Herodoto, Diodoro Siculo, Strabone, Clemente Alexandrino, & aliis constat. Adi & Cl. Collegæ Hermannii Conringii Hermetica cap. 12. & 13. Ita vero sapientiæ Ægyptiorum deditus fuit Moses, ut ab idololatria illorum atque superstitionibus, planè manserit immunis.

II. & Orator fuit, ut cum ex historia Sacra, tum è Stephani protomartyris testimonio constat. Act. vii, 22.

Idem III. & Poëta fuit, ut liquet è psalmis quos scripsit & antiquitas nobis transmisit.

IV^{to} Historicus fuit, verax, luculentus, & orbi terrarum necessarius.

V. Dux exercitus ac bellator egregius.

VI. Politicus insignis, quippe qui legibus sapientissimis remp. Hebræorum instituit.

VII. Quod omnia superat, Dei familiaris fuit, & Prophetæ sine exemplo, stupendorum operum patrator.

IIIX. Tantis rebus cum fuerit divinitus destinatus, mirum non est quod natus atque expositus, à Deo servatus fuit, Mortuus verò, per Angelum, in loco mortalibus incognito sepultus.

IX. Fama vero illius meritò per totum orbem terrarum emanavit, ab externis quoque scriptoribus, supra jam allegatis, insigniter celebrata.

Quod si naturalem potius ordinem juxta seriem temporis quo singula evenere. In oratione observare placeat, primò quadraginta illi anni, quibus in aula Pharaonis Moses vixit, inde quadraginta sequentes, quibus in exilio egit, & tandem ultimi quadraginta, quibus populi Israëlitiçi dux fuit, animadvertendi, & res in singulis his intervallis gestæ expendendæ & dilatandæ erunt.

Ad primam quadragenam pertinent Moïsis majores ac parentes, natalis, conservatio in scirpea fiscella, adoptatio à Regis filia, educatio in aula Regis, & institutio in variis scientiis. Bellum item adversus Æthiopas Pharaonis jussu gestum de quo Joseph. l. 2. Antiq. c. v. Et Eusebius ex Artapano, l. ix. præparationis cap. ult.

Ad secundam quadragenam, referatur, quod 1. renuit vocari filius filia Pharaonis, & gentem suam liberè est professus.

II. Cæde Ægyptii prolusit liberationi Israelitarum à se præstandæ. Act. vii, 25.

III. Vitæ suæ consulens, & ut futuris temporibus se servaret fugit ad Madianitas. Neque enim piis Deo confis
omit

omittenda sunt humanæ prudentiæ consilia;

IV. Regis iram hac fugâ sibi concitatum spreuit, Dei providentiæ innitens. Ad Hebr. xi. §. 27.

V. Exulare maluit, quam peccare. Ep. ad Hebr. xi, 26. Pastoralem in exilio vitam egit; in Philosophia ingenium atque animum exercens & futurum quoque Messiam fide con-
tuens. Ep. ad Hebr. xi, 26.

VI. Principi gentis Madianitarum, ita se in exilio isto probavit, ut ille & filiam daret in uxorem, & tandem unum Deum cum ipso adoraret Vid. Exod. cap. ix. v. 21. & cap. xix, 10. 11. 12.

VII. Memoriam sui exilii & divini auxilii filiorum nominibus impressit, atque conservavit. Exod. 11, 22.

IIIX. Ibidem librum Geneseos scripsisse, & ut Hebræos asperissima servitute in Ægypto afflictos solaretur in exemplum patientiæ Iobi librum vel vertisse vel scripsisse, & cum gentilibus suis communicasse putatur.

In tertia quadragena omnium plurima & maxima occurrunt laudum argumenta, primò enim divinitus vocatus, & dono miraculorum, divinæ opis promisso, fratris collegio ad officium Ducis fuit instructus.

Secundò: Decem plagis coërcer Pharaonem, ut populum Israëliticum tandem dimitteret.

III. Transit cum totâ gente sua, per sinum Arabicum.

IV. Legem è manu Dei accipit in monte Sinai.

V. Fœdus inter Deum populumque solenniter sancit. Exod. xiv, 3. & seqq. Ad Hebr. ix, 16.

VI. Culum divinum & temp. instituit.

VII. Magistratus ejus confirmatur insigniter, seditionis, igne & terræ hiatu absumentis: Num. xvi.

IIIX. Denique annos centum & viginti natus, corpore

atque animo vegetus, sensibus integris successorem designat, & postquam Dei jussu canticum de divinis beneficiis, de futura Israelitarum idololatria, atque afflictionibus composuisset; ac singulis tribubus Israel benedixisset, obiit mortem & à Deo angeli ministerio sepelitur, ita tamen, ut Satana licet repugnante, incognitum maneret ejus sepulchrum, atque hac ratione, populus Israeliticus, corpori Moïsi, tot miraculis illustri, divinos honores conferre excluderetur. Deut. c. ult. §. 5. & 6. Epist. Iudæ §. 9.

Moratæ orationes plerisque enthymematibus convenientes passim interseri poterunt, hujusmodi, quæ Dei reverentiam, providentiæ divinæ agnitionem accultum, operum illius admirationem, fidem in ipsum immotam, erga beneficia divina gratum animum, pium legibus obsequium in dicente arguat.

Affectus rempestivè cieri hic debebunt, metus iræ divinæ, amor Dei, odium peccati, & contumaciæ, æmulatio piorum operum. Quæ quomodo oratione excitari in animis aliorum queant, docetur: 2. Rhet. IV, V. & XI. capitibus.

Epilogus ad virtutum Moïsi admirationem excitet auditores, & simul ostendat, quantum sit beneficium, quod ea quæ ex ipsius optimi maximi Dei ore Moïses accepit, nos hodieque in venerabili volumine ipsius perscripta legere queamus.

XV.

LAUDATIO HERODOTI.

Qui Herodotum laudare constituerit, ante omnia Herodotum legisse oportet, ex ipso enim Herodoto Herodotus omnium optimè cognoscetur. Ex antiquis de eodem scripserunt Dionysius Halicarnasicus, in responso ad Cn. Pompeii epistolam & in iudicio de Thucydidis historia, Plu-

Plutarchus peculiari commentario, Photius in Bibliotheca sua §. 60. E recentioribus Henr. Stephanus peculiari apologia pro Herodoto, item Gerardus Vossius in libro de Hist. Græcis.

Exordium è secundo procemiorum demonstrativorum loco l. 3. Rhet. xlv. 18. duplici enthymemate ostendat decere, ut in cœtibus nostris illustrium virorum, qui scriptis suis nos erudiunt, memoriam celebremus, hoc enim, 1. grati animi est, & 2. excitat nos ad illorum lectionem, studiis & vitæ nostræ longe utilissimam. Prima periodus, conclusionem utrique enthymemati communem contineat, sequatur duplex illa minor, periodis totidem pluribusve. His subjungatur propositio, qua de patre Historiæ Herodoto te dicurum promittas.

Confirmationis partes sunt tres, in prima, historiæ Herodoti argumentum breviter narretur, idemque amplificetur 1. è secundo loco amplificationum l. Rhet. ix. §. 57. *Si primus &c. Exstiterunt equidem & ante Herodotum, qui Persicas res in litteras referre sunt conati, ut Dionysius Milesius, Hellanicus Mitylenus, Charon Lampfacenus, sed horum scripta tenuia fuerunt & minus ornata. Primus Herodotus & luculenter & politè hoc argumentum tractavit. Idque jam olim Theophrastus, acer scriptorum censor judicavit, cum ab Herodoto, primum historiam commorantem testatus est, ut auderes uberius, quam superiores, & ornatus dicere. Refert Cicero in Oratore ad Brutum c. xii.*

Secundò è primo amplificationum loco, l. 1. Rhet. ix. §. 57. *Si solus &c. Ex omnibus qui post eum vixerunt, scripseruntque, uni illi Persicarum regum memoriam debemus. Unus ille, quæ de Babylone sacris vates Veteris Testamenti prædixerant, ita evenisse luculenter est testatus, quæ quidem perpetuis tenebris essent damnata, nisi ille servasset.*

Tertio

Tertiò ex octavo amplificationum loco i. Rhet. ix. §. 60. præferatur aliquot celebribus historicis, Thucydidi ob perspicuitatem, T. Livio ob veritatis studium, & quod nihil blanditur Græcis suis, ut Livius Romanis. Vid. Dionys. Halic. loco citato.

Quartò, è loco assumpto generis deliberativi, i. Rhet. vii, '16. *Cujus privatio major. Multo majus damnum foret, Herodoti libros perisse, quam Tullij aut Senecæ, quam Platonis & Aristotelis. Philosophicæ & Oratoricæ res deperditæ humano ingenio iterum queunt inveniri. At historia si semel interciderit, nullius ingenij ope restitui potest.*

Quintò, Herodotus historiz suæ recitatione, excitavit Thucydidem ad simile studium, ut memorant Photius, Suidæ, Marcellinus.

Epilogus summam laudum Herodoti breviter colligat, & ad utilissimi scriptoris lectionem cohortetur.

XVI.

VITUPERATIO THEMISTOCLIS.

Themistoclis vitæ cursum, cognoscere licet, ex Herod. lib. vii. & ix, è Thucydidis libro I^{mo} Diodori Sic. lib. vi. è Plutarchi libro peculiari de Themistocle & denique è Cornelio Nepote aliisque.

Modus vituperandi ab Aristotele nostro i. Rhet. c. ix. §. ult. breviter indicatur, nempe si propositiones de honesto, magno numero illic perscriptæ mutantur in contrarias.

Utriusque hujus & vitæ Themistoclis & modi vituperandi diligens præmeditato expeditiorem faciet scriptiorem.

Exordium è l. 3. Rhet. c. xiv. §. 8. & 9. Ostendat utile esse magnorum virorum dedecora, in apricum proferre.

ne vi-

ne videlicet splendor nominis illorum ad parta nos invitet opprobria.

Confirmationem ordiatur morata oratio, qua meritis viri laudibus nihil te detractum cupere contesteris, unum enim illius praeclarum factum in bello, & alterum in pace esse in confesso, nempe, pugnam Salaminiam & munitionem Athenarum. Ceterum si vitam ejus omnem à natali ad emortualem expendas, differi hanc possis plenam esse turpitudinum. Hoc demonstraturus attendat ad generis demonstrativi, tres generales propositiones, quæ extant l. 1. Rhet. c. ix. §. 6. 15. 16. Etenim 1. vitia Themistoclis, 2. vitiorum causæ, 3. vitiorum signa atque opera hanc turpitudinem abundè demonstrant. Primo itaque ad secundæ hujus propositionis ductum, genus, & indoles & educatio Themistoclis vituperentur. Ab his enim fere principiis vitia promanant. *Quod genus attinet, spurius fuit, natus obscuro quodam ultimi nominis cive Neocle ejusdemque scorto Thracio. Plur. in Themist. c. 1. At verò è squilla non nascitur rosa nechyacinthus, ut est apud Theognidem, neque imbellem feroces progenerant aquilæ columbam.*

Educatio & prima adolescentia par natalibus fuit, de quo adite Valer. Max. l. 6. c. 9. Plutarch. in Themist. c. 2. & 3. & in de serâ numinis vindictâ c. 12. & apophtegmate 56.

Valuit equidem ingenio, sed eo ad turpes voluptates ad ambitionem, ad avaritiam, vâ prodicionem est abusus. Hic in thesi ostendatur hominem ingeniosum & malum multo esse perniciosiorem, quam hebetioris ingenij. sed probi animi virum.

Secundò, è prima & tertia propositionibus demonstrativis jam citatis è l. 1. Rhet. ix, 6. 16. vitia ejus vitiorum signa atque opera enumerentur, amplificenturque. *Intemperantiâ tantâ erat, ut spreto liberalibus studiis continuè potaret, baccharetur per forum, scortaretur, & tam profligatè vive-*

ret, ut pater eum exheredaret, mater verò ob id suspendio vitam finiret &c.

Ambitionem ejus arguit, quod adolescens primas in rep. affectavit, populum concitavit contra optimates &c. Aristidem ex urbe ejecit, non id spectans quod optimum, quod iustissimum esset, sed sua tantum gloria serviens. Plutarch. c. 8. & seqq.

Avaritiam & sordes: quod cibos sibi missos vendidit, quod cum ne tria quidem talenta haberet ab initio, postea ultra centum possedit, quæ iusto iudicio in ærarium publicum tandem sunt redacta &c.

Perfidiam suam ostendit mendacio, quo Lacedæmonios circumvenit, maxime autem patriæ suæ proditione, & ad regem Persarum defectione. Plutarch. in vita cap. XL. & XLI. Diod. Sic. L. XI. c. 54. & 55.

Moratum erit si virtutes vitiis istis contrariæ, suis quæque locis laudentur, & singularum pulchritudo ita commendetur, ut dicenti illas cordi esse ex oratione appareat.

Affectus hic cieri opportunus fuerit odium adversus enumerata vitia: & adversum eos qui his sunt inquinati. Vid. l. 2. Rhet. IV. §. 38.

XVII.

LAUDATIO THEMISTOCLIS,

EXordium è primo demonstrativorum proæmiorum loco (l. 3. Rhet. c. XIV. §. 6.) vituperet eos qui humanitatis immemores, paucos aliorum errores operose reprehendunt, eorundem verò magnas ac multas virtutes, aut si silentio premunt aut maligne laudant.

Partes fidei duæ sunt, prima confutet ea quæ Themistocli superiori oratione sunt objecta, ex præcepto Aristotelis l. 3. Rhet. c. XVII. §. 24.

Genus equidem Themistocles obscurum fuit, at virtus clarissima. Præstantius autem est propria virtute viti, quam gloriâ majorum. Dilatari poterit, tum è propositionibus quæ extant l. 1. Rhet. vi 1, 25, 39, 52, & cap. ix. §. 44. 57. Tum sapientum sententiis, quæ virtutem generi longè præferunt. Pertinet huc inter alia scitum Iphicratis dictum apud Plutarch, apophthegm. 46.

Fuerit Spiritus, at tales quoque fuerunt Hercules, Aneas, Homerus, Romulus, Alexander M. aliique &c. atque eo vel maximè ostenditur viri virtus si nec improborum parentum exemplo de statu dimoveatur.

Educatio si recta non fuit, vitium est parentum, at Themistocles eo laudabilius, quod non obstante prava educatione, tamen ad frugem pervenerit. Hoc enim maximè arduum est, & generose mentis minime fallax specimen.

Inde vitia ei objecta excusentur, intemperantia quidem quod illam emendaverit, siccus & sobrius postea redditus &c.

Ambitio autem & avaritia è locis qui habentur, l. 1. Ther. c. 9. §. 37. & seqq.

Defectionis crimen diluatur, l. 3. Rhet. xv. §. 5. & 8. Necessitas enim fugam suavit, & idem integra fama, multi alij fecerunt.

Altera pars fidei laudet è secunda propositione demonstrativa l. Rhet. ix. §. 15. ingenium, animum, doctrinam, industriam, exercitationem Themistoclis.

Et primò quidem, ingenio maximè valuisse liquet 1. testimonio Thucydidis & Corn. Nepotis c. 1. §. 4. 2. exarguta interpretatione oraculi Delphici, Corn. Nep. c. 2. §. 6. & 7. 3. quod intra anni spatium literas ac sermonem Persarum ita didicit ut multò commodius apud Regem verba faceret, quam hi poterant qui in Perside erant nati, Nepos, c. x. §. 1.

4. singulorum civium nomina memoriter recitare potuit. Plutarch. in vit. Themist. c. ix. Denique argutè dicta ingenii acumen arguunt. Legite illa apud Plutarch. in vit. Themist. c. 32. item in apophthegmatibus.

Secundò ahimus Themistoclis generosus apparuit primo cum contumeliâ exheredationis non fractus, sed ad virtutem erectus est. Nepos. in vit. Themist. c. 1. §. 3. 2. unus omnibus resistere ausus est cum mare relinquere & terra dimicare ceteri cuperent. Nepos. c. iv. §. 2. item cum pecuniam publicam è metallis collectam, & dividi inter magistratus solitam, ad triremes parandas converti debere contenderet Plut. c. vi. & Nepos. c. 2. §. 2. 3^{io}, muros Atheniensium cum maximo periculo suo invitissimis Spartanis construxit Corn. Nepos. c. vii. Plut. c. xxxiii. 4^{to} ad Miltiadis tropæum lacrymatus est. Plut. c. iv. Cic. quæst. Tuscul. lib. iv. cap. 19.

Quod (3.) ad doctrinâ ejus attinet Musicam equidè non didicit, sed Politicam, (Plut. c. 2.) Oratoriam, & scientiâ militari.

Quartò, Virtutis efficiens in ipso fuit, industria singularis, de qua vid. Nep. in vita Themist. c. 1. §. 3.

Denique quintò exercitatio, virtutis & ipsa parens, Themistocli vel maxime fuit curæ, tum in judiciis privatis, tum in concionibus & deliberationibus de rep. in primis autem in re bellica.

His oratoriè explicatis porro è prima & tertia propositione demonstrativâ virtutes & virtutum ejus opera atque signa afferantur, atque è locis sæpius citatis amplificentur.

Virtutes ejus præcipuæ fuerunt 1. prudentia tam in pace quam in bello, 2. fortitudo, 3. justitia, 4. patriæ ejusque concordie amor ac cura, 5. modestia &c. Has vero virtutes in Themistocle fuisse ex operibus & signis harum virtutem
osten-

ostendendum atque amplificandum erit. Ita enim docet Rhetor. noster. l. 3. Rhet. cap. xvii. §. 4.

Opera autem & signa istarum aliarumque virtutum in Themistocle fuere, quod prævidit pugnam Marathoniam, non finem belli Persici, sed novum initium fore. Plutarch. in vit. cap. 4.

II. Pugna ac victoria Salaminia, omnium est præclarissimum virtutis illius opus, in qua Xerxen bis elusit & consilio, prudentia, animi magnitudine atque modestia sua potius quam Græciæ armis, Græciam liberavit.

III. Portuum & murorum exstructio provida, quantum etiam pace Themistocles polleter, demonstravit, vid. Nep. c. vi. §. 1. & 2.

IV. Prætor Simonidem Ceum, iniquum quiddam tentantem, arguto verbo rejecit, quod vid. ap. Plut. in vita Themistoclis c. ix. Arguit autem hoc quam justitiæ tenax fuerit Themistocles.

V. Intestina Græciæ bella sustulit, quod patriæ amorem atque curam vel maximè ostendit, nihil enim salutis reip. magis est adversum atque perniciosum, quam discordia civilis. Nihil bonum civem virumque tam decet, quam semina dissensionum tollere atque fibras istas perniciosas evellere, vid. Plut. in vita Themistoclis c. xi.

VI. Modestiae Themistoclis specimina insignia recensentur à Plutarcho in vita c. xii. & xx.

Denique invidia quâ cives sui cum sunt persecuti, & præmia ab æmulis Lacedæmoniis illi tradita, de quibus Plut. in vita c. xxx. & tandem Regis Artaxerxis favor atque benignitas satis amplum virtuti ejus præbent testimonium.

Mores suos ostendendi hic passim obvia Oratori est occasio, dum vel diluuntur Themistocli objecta, vel ejusdem

virtutes dilaudantur. Ad singula enim ista capita quid sentiat orator, quid animi ipsimet sit demonstrare erit opportunum.

Ex affectibus æmulatio commodè hic excitabitur quod quæ fieri ex arte possit ac debeat, docetur, 2. Rhet. xi.

Epilogus è 2^{do} & 4^{to} loco perorationum Aristotelico 3. Rhet. xi. §. 7. & 9. breviter colligat laudes Themistoclis, & magnitudinem atque pulchritudinem illarum imitationi nostræ proponat.

XIIX.

LAVDATIO ROMANÆ MORVM CENSVRÆ.

DE Romanorum publicâ morum censurâ legendi sunt ex antiquis Plutarchus in Carone maiore cap. xxx. Livius passim, Valer. l. 2. c. 9. A. Gellius l. 4. cap. 12. & 20. & l. 7. c. 22. Florus l. 1. c. 18. §. 22. Dio Cassius l. 40. p. 146. & lib. 54. ab initio. Ex recentioribus Lipsius in de Magistratu Romano cap. 4. & iv. Polit. 11. Alexander ab Alexandro l. x. cap. 13. Wolfgangus Lazius Commentar. de repub. Rom. lib. 2. c. 12. Petrus Gregorius Tholosanus in Syntagmate Juris l. 47. c. 16. & lib. 4. de repub. c. xii. Petrus Crinitus l. 4. c. 3. & lib. 20. c. 9. Scipio Amiratius in Tacitum l. xi. c. 2. Carolus Sigonius lib. 1. de jure civium Romanorum c. 14.

Exordium è primo demonstrativorum præmiorum loco l. 111. Rhet. c. 14. laudet breviter, Romanos à studio omnis virtutis, quod cum aliunde tum vel maximè ex instituta morum censurâ eluxit.

Confirmatio habeat partes tres, in quarum primâ Censorum institutio, officium dignitas è citatis autoribus narratur, & è locis Rhetoricis supra sæpius memoratis amplificetur. In secundâ parte exempla Censuræ severius acta recensentur.

censeantur. In tertia, comparatio instituat^r Censuræ Romanæ cum veteri Græcorum & hodierna nostrâ Ecclesiastica atque Academica, iisque multum præferatur.

P A R S I.

Romani ergo (verba sunt Plutarchi in Catone majore c. 30) neque nuptias cuiusquam, neque liberorum procreationem, neque victus rationem, neque convivium, examinis & iudicii immune singulorumve hominum voluntati aut cupiditati liberum relinquebant, verum rati in domesticis hisce rebus certius, quam in publicis & omnium conspectui expostis actionibus, uniuscujusque mores conspici, constituerunt duos viros, unum patricium, plebejum alterum, qui in observando, castigando, plec^{ti}endoque curarent, ne quis à Romanâ & consuetâ vitâ per voluptates diverteret. Hi Censores dicebantur, quibus licebat aut equum adimere aut senatu ejicere, si quis intemperanter vixisset &c. Hæc^{te}us Plutarchus. Plebejos verò, (quod Plutarchus hic omittit, at alij retulerunt) si delinquerent, iidem Censores aut tribu movebant, aut faciebant ærarios, h. e. aut ex honestâ tribu, rusticâ videlicet, in minus honestam, urbanam, rejiciebant, suffragii ferendi jure privabant, ad hoc tantum in civium numero relictos, ut tributi nomine æra penderent. Gellij verba sunt lib. iv. Noct. Att. cap. 12. Si quis agrum suum passus fuerat sordescere, eumque indiligenter curabat, ac neque araverat, neque purgaverat: si ve quis arborem suam vineamque habuerat derelictâ, non id sine pænâ fuit, sed erat, opus Censorium, Censore^{is} que ærarium faciebant. Item si quis eques Romanus, equum habere gracilentum aut parum nitidum visus erat, impolitiz notabatur &c. Hæc Gellius. E duobus istis locis narratio prædicta, sed verbis commutatis contexi à studioso oratoriz poterit.

Sequi-

Sequitur ut ostendamus quomodo amplificari ista debeant, rerum enim narrationi proximum est adungere magnitudinem & pulchritudinem, ut docetur l. i. Rhet. ix. 64 & 3. Rhet. xvii. 14. Amplificationes autem nihil aliud sunt quam enthymemata, quæ demonstrent rei magnitudinem, i. Rhet. ult. §. 3. Horum principia aut ingenio sunt excogitanda aut ex Rhet. locis sæpius memoratis petenda. Enthymemata ergo hujusmodi hoc loco erunt ista:

I. Magnum est & prædicatione dignum, quod populus perpetuis bellis districtus, domesticis tamen civium moribus formandis, & ut hi æquanimi mariti, boni patresfamilias, providi parentes essent, seriam adeo curam adhibuerit &c. E loco amplificationum qui extat lib. i. Rhet. ix, 44.

II. Liqueat ex instituta morum Censura, præclare intellexisse Romanos, quantum mali, è civium luxu & perversis moribus ad ipsam rempub. redundaret. De hoc argumento adi Piccarum, ad lib. v. Polit. Aristot. cap. vi. p. 711.

III. Eadem indicio est non fugisse sapientissimos hos viros, multa in civitate committi, quæ bonorum oculos offendant, nec tamen, vel legis, vel judicis, vel accusatoris defectis in iudicium veniant. Huiusmodi autem vitia Censoria animadversionis erant &c. Certum signum prudentia. Signa autem virtutis inter laudabilia sunt l. i. Rhet. ix, 16.

IV. Aprè verò hanc curam illis demandarunt Romani, qui facultates civium censebant. His enim quantum sumtum ferre quisque posset perspectius erat. Principium hujus amplificationis extat l. i. Rhet. vi, 93.

V. Etiam illud prudenter factum, quod duobus arduum hoc negotium commiserunt. Unus enim potestate sua facile abutitur, & minus cum videtur tum potest in his quæ ad publicam pertinent salutem.

VL. *Magna prudentia & illud argumentum erat, quod non nisi optime meritis & spectata virtutis atque autoritatis virâ hic magistratum deferbatur. M. Cato sanè decimo demum à consulari anno, Scipio Africanus non nisi post victum Hannibalem, Censores facti sunt. Plutarch. in Catone maiore cap. 31. Livius l. 32. cap. 7.*

Enthymematibus his opportunè interponentur moratæ orationes quibus luxus detestationem, frugalitatis verò & omnis virtutis amorem singularem præ se ferat orator.

Secunda pars orationis exempla Censuræ severius actæ è laudatis scriptoribus commemoret & amplificet. Primum exemplum esto illud Cassij Longini & Cæpionis Censorum, qui Lepidum Æmilium augurem, quod sex millibus aëdes conduxisset adesse iusserunt, ut est apud Vell. Paterc. lib. 11. c. 10. Amplificatio hujus exempli inde peti potest, primò, quod non tantum in infimi nominis cives sed & in summos Censura excerceretur. Secundò: quod Auguri Lepido tanti habitare non liceret, quanti ævo Vellgij Paterc. vix habitaret Senator. Hinc enim & prisca frugalitas & ævi posterioris luxus apparet. Tertiò: Rectius norant Censores viri hujus facultates & melius illi consulebant, quam ipse sibi, qui tamen Deorum internuncium se proficiebatur.

Secundum exemplum, Cornelij Ruffini à Censoribus Senatu moti, quod haberet decem libras argenti facti. Gell. lib. 14. c. 8. Valer. Max. lib. 11. c. 9. Liv. epitomè lib. xiv. Amplificabitur inde, quod ne summo quidem huic viro Censoria severitas pepercit. Erat sanè Ruffinus manu strenuus, & bonus imperator, bis consulatu, bis Dictaturâ functus. Idem habebat opes illas nulli detractas, nec alieno sanguine cruentas, sed labore suo sibi partas. Tertiò: Merito itaque M. Cato apud Senecam de virâ beatâ, cap. 21. illud se-

culum laudat, in quo Censorium crimen, erant paucæ argenti lamellæ &c.

Tertium exemplum, M. Porcij Catonis, qui Manilium Senatu movit, quod is interdum filia vidente uxorem esset osculatus, ut est apud Plutarch. in Catone Maiore cap. 34. Amplificetur, 1. Quia severitas hæc est sine exemplo, 2. non ædes nec suppellectilem sed ipsam conjugum conversationem spectat.

Quartum exemplum, ejusdem Catonis, qui in Censura sua, pretia earum rerum quæ luxuriæ instrumenta erant, decuplo auxit, ut commemorat idem Plutarchus loco citato. Estque hoc singularis sapientiæ viri signum luculentum, dum per ambages efficit, quod recta viâ impetrare non poterat.

Quintum exemplum esto Scipionis posterioris, qui juveni cuidam equum ademittit, quod eo tempore quo Carthago oppugnabatur opipare epulatus, mellitam placentam Carthaginis instar (quod nomen etiam illi indiderat) sodalibus proposuisset diripiendam. Memorat Plutarch. in Apophthegmatibus cap. 22.

Cetera exempla, dum vel ob prædia nimium sumtuosa, vel ob ferreos annulos gestatos vel ob strigosos equos, vel ob incompósitos in judicio mores, vel ob verbum temere jactum &c. ordine suo moti sunt, strictius commemorentur.

Illud reticendum non est, Censores interdum ne fratribus quidem pepercisse, tantum abest, ut propinquis aliis commissa indulgerint. Fulvius sane Flaccus. Censor, ipsum fratrem suum, & quidem domesticum, quia legionem in qua Tribunus militum erat in iussu Consulis dimiserat, è Senatu movit, ut narrant Vellejus Patere. l. 1. c. 10. Liv. lib. XL 1. c. 27. Frontinus lib. IV. Strategematum cap. 1. §. 32.

Excm;

Exemplis istis interponere meminēritis moratas orationes, quæ singularum ex his exemplis elucetium virtutum amorem ac studium dicenti cordi esse ostendant.

Tertia pars comparationem instituatur, & primo Romanos Græcis præferat, quippe qui hujusmodi morum Censurâ publicâ destituebantur. Comœdia quidem, vetus præsertim, quædam civium vitia correxit, sed nimiam licentiâ optimos quoque & innoxios laceſſivit, ut Periclem, Socratem aliosque. Quæ de re vide insignem locum Ciceronis, inter fragmenta lib. iv. de rep. ab August. de civitate Dei l. ix. cap. 9. nobis servatum.

Deinde cum nostris rebus pub. Romanam ira conferat: *Nos Christiani, illi gentiles erant. Illi ductu solius rationis, nos Dei ipsius monitu regimur: Nos æterni præmij spes manet, illi beata immortalitatis ignari fuerunt, atque exortes: Et tamen multo accuratior apud illos quam apud nos in ceteros mores viguit animadversio. Hoc demonstratur digressu per exempla superiora: Equis enim in regnis, provinciis aut civitatibus Christianorum vel ob aditum splendorem nimium, aut ob suppellectilis copiam, aut ob lusus adolescentum, aut ob epulorum lautissimas, aliave hujusmodi, à magistratu plectitur? &c.*

Denique addatur inveſtiva in malos mores hodiernos ad exemplum comparationis Tullianæ in Oratione pro Lege Manilia cap. v. ubi ait: *Majores vestri sæpe mercatoribus injuriosus tractatis &c.* Quæ inveſtio ut cum animi motu instituatur, è lib. ii. Rhet. cap. vi. adhibeantur propositiones, pudoris affectui concitando accommodatæ.

Epilogus breviter repetat laudes Romanæ reip. & moratâ oratione, se non seculi nostri contemptu, sed admiratione vetustatis & boni publici causa ista omnia protulisse lan-
quæ asseveret.

LAVDATIO SCIPIONIS AFRICANI POSTERIORIS.

Scipionem hunc laudaturus primum omnium dicta & facta ejus cognoscat ut Aristoteles præcepit l. 11. Rhet. xxii. §. 9. & 13. Recensuerunt illa sparsim Plutarchus in Paulo Emilio & Apophthegmatibus, Cicero in Bruto, in Lælio, lib. 1. Tulc., lib. 1. ad Quintum fratrem, lib. 2. de Oratore, Livij epitome c. 35. & seqq. Sextus Aurelius Victor cap. 111x. Gellius passim, Valerius Max. passim. Vell. Patérc. l. 1. c. 13. Appianus, in Ibericis & Lybicis, Paulus Orosius lib. iv. Eutropius lib. iv. Justinus lib. 38. E quibus omnibus justam vitæ Scipionis hujus historiam, patrum memoria, concinnavit Carolus Sigonius.

Secundo loco noteretur ex Aristotelis primo Rhetoricorum cap. ix. §. 63. & seqq. enthymemata in demonstrativo genere ejusmodi adhibenda esse qua magnitudinem ostendant.

Proœmium è l. 3. Rhet. c. xiv. §. 8. *Magnorum virorum dicta factaque sibi & aliis in memoriam revocare, haud exiguum est virtutis adjumentum &c.* In Ephesiorum literis præceptum fuisse narrat M. Antoninus Imperator in vita sua, quod jubebar quovis die reminisci alicujus ex antiquis, qui virum coluissent &c. *Dote hoc mihi ut hodie no die Scipionis Æmilianî memoriâ celebremus. Dicam autem primò de Scipione hujus studiis literarum, secundò de rebus bello, tertio de rebus pace præclarè gestis.*

PARS PRIMA.

E secunda propositione demonstrativi generis lib. 1. Rhet. c. 9. §. 15. per præteritionem: *Non dicam de genere hujus viri, quanquam illud haud parum ad virtutem facit, & Scipioni clarum.*

clarissimum fuit. Nihil enim Romæ gente AEmilia, è qua natus, nihil familia Scipionum, in quam adoptatus, illustrius fuit &c.

Inde è prima propositione demonstrativa l. i Rhet. c. ix. §. 6. *Ceterum virtute decet non sanguine nisi &c. Itaque ipsummet virum qualis quantusque fueris videamus.*

Ingenus disciplinæ & honestis artibus, cura providi parentis fuit institutus (ex Plutarchi Paulo Aemilio cap. ix.) in primis eloquentia, quæ illa tempestate expedita erat ad honores civiles via. Item Græci literis, quarum ut nostro ævo rarior tum erat Romæ cultura. Literas autem Romani non ad pompam, sed ad usum discebant, itaque maturè in publico dicere & pacis bellisque functionibus admodum adolescentes interesse consueverant. Scipio quidem septendecim annos natus in bellum Macedonicum contra Persum comitatus est parentem, ut quæ ex libris didicerat, in rem conferret. Vide Caroli Sigonii Scipionem Aemilianum num. 5. 6. 7.

Adultior & sui juris factus, adolescentia studio nequaquam fastidivit, sed mirifice colere perrexit; cujus res illud argumentum est, quod nemo Romæ ingenij & doctrinæ laudæ paulo celebrior exisist, cujus Scipio non aut familiaris, aut non assiduus auditor esse capiverit. Hic enumerentur quæ de Scipionis cum C. Lælio, cum Panætio, cum Polybio, cum Terentio familiaritate, locis ab initio citatis, Cicero & Vellejus, tum invita Terentii Donatus retulerunt. Nec domi tantum sed & foris atque in ipsis castris, viros secum eruditos habuit suque usus est, ut Panætium & Polybium, de quibus Vellejus loco citato & Ammianus Marcellinus l. xiv.

Ex mortuis doctoribus maximè delectatus est Xenophonte, Cic. ad Quintum fratrem l. i. ep. i. c. 8. & l. 2. Tusc. quæst. cap. penult. Addatur elogium Xenophontis.

A doctrinâ Scipionis pulcherrimæ ejus virtutes emanarunt, quas compendio enumeratas vide ap. Sigonium n. 60. & seqq.

Bellicarum virtutum speciem exhibuit primum in Hispaniâ, sub Lucullo. Sigonius num. 14. Deinde in Africâ sub Manio Manilio Consule, Sigonius ibid. num. 16..

Tum suo ductu in Africa, cum Carthaginem evertit, Sigonius ibid. num 19. & seqq.

Demum ad Numantiam, quam & ipsam subegit, Sigonius num. 45. & seqq.

TERTIA PARS.

Pacis artes, quam calluerit, ostendunt legatio ad Mausinissam de qua Sigonius num. 18. Item legatio in Ægyptum, Syriam, Asiam & Græciam ibid. num. 35. Censura ejus ibid. num. 37. & seqq. Sententia in tumultu Gracchano ibid. num. 58.

His subjiçitur narratio excessus ejus, de quo idem Sigonius libro toties laudato num 39.

Epilogus perbreve *ἀνακρίσιν* contineat virtutum Scipionis & affectum æmulationis exciter è lib. II. Rhet. cap. xi.

XX.

ROMULI VITUPERATIO.

Romuli res præter Florum luculenter descripsere Dionysius Halicarnassensis lib. 1. cap. 88 & seqq. & lib. 2. cap. 1. & seqq. Livius l. c. 1. Plutarch. libello peculiari, & è recentioribus Albericus Gentilis lib. 1^{mo} de armis Romanis cap. 2.

Exordium è loco qui extat lib. 3. Rhet. c. 14. §. 10. veniam sibi dari petat, si Romuli variam injustitiam demonstrare instituens, id dicat, quod sit auditorum præconceptæ de hoc viro opinioni fortasse adversum. Solius enim veritatis

tatis amore se adduci. Morata oratio procemio convenit, talis autem est, quæ fabulis spretis, rerum veritatem se indagare, & in precio habere fidem facit.

Propositio: *Longè alius atque vulgo existimatur Romulus fuisse, Spurius, Latro, parricida, consensor Deorum, & ut paucis multa dicam, improbus ac inustus.*

Primum enthymema: *Spurius fuit. E. illaudabilis*: Hoc enthymema è secunda propositione demonstrativa lib. 1. Rhet. h. 9. §. 15. & 67. versâ in contrariam est peritum. Impurienim natales magnorum vitiorum fomites sunt. Stupro genitum fuisse Romulum non obscurè innuunt auctores. Dion. Halic. l. 1. c. 78. Plutarchus in Romulo c. 5. in fin. Liv. l. 1. c. 4. Justinus l. 43. cap. 2. Amplificari tripliciter potest. Primò; *Non è vulgari stupro, sed ex incestu natus fuit Romulus, è magno scilicet patrio suo Amulio.* Secundò è *virgine Vestali.* Tertiò, *ad Deum relato crimine.*

Secundum enthymema: *Latronum manipulo collecto, ipse dux, alienum agrum occupavit, in quo urbem conderet.* Hoc factum fuisse & probandum erit, & amplificandum, ut præcipitur lib. 3. Rhet. xvii, 4. Romulum servorum ac desertorum turbam secum habuisse, narrat Plutarchus in Romulo cap. xii. Alienum agrum occupasse inde constat, quod nihil ipse habebat proprium. Amplificetur è loco comparisonis l. 1. Rhet. c. ix. §. 60. *Considerunt & aliæ urbes, ut Thebes Athenas, Teucer Salamina, sed in suo agro, nec latronum sed civium suorum manu stipati.*

Tertium enthymema: *Asylum aperuit, in quod facinorosissimum quemque recepit, ita, ut neque dominis servos fugitivos neque aris alienis causa nexos creditoribus, neque homicidas magistratus dederet &c.* Quod hoc & sit factum, & quale illud sit, ac quantum porro venit ostendendum, monitu Aristotelis

lis l. 3. Rhet. c. xvi. §. 2. Factum esse, liquet è scriptoribus supra citatis. Quale, hoc est, quam injustum, & quam turpe illud sit, è morali philosophia demonstratu obvium est. Magnitudini ostendendæ serviunt propositiones capituli vii. lib. i. Rhet. Cum primis vero illud, quod crimini huic suo, Romulus Deum prætexuit. Pythiæ enim oraculo omnibus hujusmodi sceleratis convenis impunitatem confirmari Romulusungebat, ut refert Plut. c. xii.

Quantum enthymema: *Vt solus regnaret innocentem fratrem occidit, causam frivolam prætexens, quod nova mania transiliret.* Quale verò & quantum hoc sit crimen, itidem è morali philosophia, & locis amplificationum Rhetoricis, toties jam allegatis, demonstrare hic erit opportunum. Adite Ciceronem lib. 3. off. cap. 10. Aug. de Civ. Dei l. 3. cap. 6. Horatium Epod. Od. 7. *Patrazo sanè scelere magnitudinem illius Romulus ipse intellexit, adeo ut, quinob id manus sibi inferret, parum abfuerit,* Dion. lib. I^{mo} cap. 90.

Quintum enthymema: *Rapuit Sabinas.* Hic primò causæ negatiæ finitimis matrimonii tanquam legitimæ, è laudatis autoribus memorentur, nempe I^{mo}, quod convenæ isti, vilissimi essent, scelerati, servi, homicidæ, transfugæ, obæ-rati, ac inter hos vix centum, qui patrem suum nominare possent, 2^{do}, quod potentiam illorum jam tum suspectam non sustinerent augere. Inde raptus Sabinarum ipse narretur, sed ita ut Romuli traus & iniquitas ex ipsa narratione eluceat. Narrationi huic subjiciantur argumenta, quibus jura divina, gentium, hospitii, violata esse demonstretur, dum Dei consilium & sacraspectaculorum sceleri prætextit, dum desponsatas, destinatas, maritas, ad se bonâ fide invitatas, parentibus, sponsis, maritis perfidè eripit, &c. Vide Minucii Felicis Octavium pag. 56. Editionis Wowerianæ, item August. l. 2. de Civ. Dei c. 17.

Sex-

Sextam enthymema : Tiri Tatij collega sui eadem Romulus procurasse videtur, nec enim ultus est.

Septimum : Bella Fidenatibus, Veientibusque intulit sola regnandi libidine, quod quidem nihil aliud est, quam publicum latrocinium.

Moratum erit si illorum criminum, quorum Romulus hic arguitur seriam detestationem, & contra virtutum, his adversantium, amorem ac studium passim præ se ferat orator, atque hunc suum animum, post enthymemata pleraque aptis sententiis exprimat.

Epilogus enumerata Romuli dedecora eorumque magnitudinem strictim repetat, atque ad odium illorum exciter auditores, suamque in ulceribus his tangendis sinceritatem, & veri studium denuò exponat. Vid. l. 3. Rhet. cap. ult.

XXI.

ROMULI LAUDATIO.

Prooemium eos reprehendat, qui famam magnorum virorum amant arrodere, maledictis suis, speciosum nomen studij veritatis prætexunt &c.

Ad primum Romulo objectum crimen respondeatur: *Incerto patre natum esse, non culpam, non crimen, sed infortunium esse, quod nemo præstare, & calumnia expers esse debeat. Nates porro similes Herculi, Eneæ, Themistocli, Alexandro M. aliisque spectatissimis viris haud quaquam obliterunt quo minus res magnas gererent. Adite Vossii institut. orat. l. 1. cap. v. sect. 14.*

Ad secundum: *Romulus urbem in solo avi sui Numitoris condidit inque eam avi permissa coloniam deduxit. Ut in alieno solo id fieret, non passi fuissent vicini.*

Ad tertium: *Asylum per divina & humana jura licet constituisse, eadem omnibus gentibus, etiam Christianis, sancta sunt*

Et inviolabilia, nec servus qui in crimen prolapsus fugit domino reddendus est; quod Deus ipse sanxit. Deut. cap. 23. §. 15.

Ad quartum: Remus in turbâ, quam cum alii ipse concitaverat, est occisus, invito Romulo & plangente. Ovid. l. 4. Fastorum paulo ante finem.

Ad quintum: Connubia iniquè negata iusta sunt belli causa. Dolus autem an virtus, quis in hoste requirat?

Ad Sextum: Titum Tatium non Romulus, sed Lavinienfes occiderunt, nec ultio requirebatur, quia cædes illa erat iusta.

Ad Septimum: Fidenates ipsi bellum concitarunt per rapinas & populationes, Vejentibus verò licebat esse tutis, ni bellum ipsi quoque maluissent.

De his omnibus legite Albericum Gentilem, lib. 1. & 2. de armis Rominiis primis capitibus. Post criminum Romulo objectorum confutationem sequatur laudatio ejusdem, ad hæc capita revocanda, 1^{mo} autoritate suâ ingentem multitudinem virorum fortium collegit, atque in eos imperium exercuit. Quod sane magnum est, quia rarum, difficile, singularis ingenij, generosi animi, multorum bonorum origo, à præclarâ animos hominum ducendi scientia ortum, à sapientibus dilaudatum, atque expetitur &c. Omnes hos & his plures amplificationum locos suppeditat cap. vii. lib. i. Rhet. Aristotelis. Singulis autem immorari & eosdem dilatare oratorem oportet.

Secundum: Condidit urbem: Amplificetur è locis jam enumeratis, & pluribus aliis, quos cum citatum caput vii. ejusdem libri caput nonum exhibet.

Tertium: Remp. Formavit ad populi genium, & salutaribus cum pacis tum belli institutis firmavit. Hæc è Dionysii & Plutarchi locis supra citatis probanda, & è politicis ac locis amplificationum Rhetoricis illustranda sunt.

Quar.

Quartum: Contra Sabinos, Fidenates, Veientes bella gessit iusta, necessaria, fortiter, caute atque feliciter.

Quintum: Singulari prudentia argumentum est, quod bello victos, aut in civitatem suam recepit, aut coloniis immissis obsequio astrinxit.

Sextum enthymema: Eo autoritatis est provectus, ut externis admirationi esset, à civibus verò suis divinus haberetur.

Septimum enthymema: Condidit regnum, omnia totius orbis terrarum imperia magnitudine sua supergressum, atque divinitus pradielum.

Octavum enthymema: Iniquè verò Deorum contemptus illi obijcitur, cum satis constet Deorum cultum, inter prima regni sui præsidia habuisse. Vid. Dionysium lib. 2. cap. 6. & 18.

Nonum: Tantis rebus gerendis à Deo destinatum, mirum non est, & in infantia, & in regno ipso inter acerrimos hostes divinitus fuisse conservatum.

Epilogus laudes Romuli breviter colligat, & optimam de urbis æternæ conditore sententiam in animis auditorum aut excitet, aut confirmet.

XXII.

ENCOMIUM CAROLI M.

CAROLI M. vitam & res gestas cognoscere licet ex Fgin^o Chartro, & annalibus Francorum a Petro Pythæo editis. E recentioribus Joh. Henrici Bœcleri, V. Cl. de rebus seculi noni & decimi Commentarius, nuper vulgatus erit instar omnium.

Exordium Germaniam inde laudet, quod & ipsa summos heroas produxerit, virtute ac fortuna Græcis & Romanis principibus haut quaquam inferiores. Hujusmodi locum exordio demonstrativo inter alios assignat Aristoteles l. 3. Rhet. cap. xiv. §. 6. Tantum eâ re nostri exteris fuisse

52.
infeliciores, quod rerum gestarum multò pauciores ac minus disertos nacti sint scriptores.

F I D E S.

Primum enthymema esto de majoribus Caroli, per præteritionem: *Non attinet imagines majorum hic recensere, quanquam illustres eos habuit; non indiget enim laudis aliena, qui propria est conficiuus. Et genus & proaves & quæ non fecimus ipsi, vix ea nostra voco.*

Secundum: Studia artium liberalium non puer tantum & adolescens, sed & Rex atque Imperator coluit, eorumque doctores, in precio habuit.

Dilatetur, 1^{mo} enumeratione disciplinarum, quas excoluit, lib. 1. Rhet. cap. vii. §. 50. *Sunt autem Logistica, Dialectica, Rhetorica, Geographia, Historia, Astronomia, Theologia, & Latina pariter ac Græcæ linguæ notitia. His omnibus Carolus operam dedisse, oculatus testis est Eginhartus.*

Secunda amplificatio: *Fuerunt quidem qui literarum & artium expertes, bene tamen remp. gesserunt. Dio de Trajano lib. 68. Bonarum artium expertus & ignarus fuit, licet vere ea quæ ad virum doctum pertinent, intelligere & facere videretur. Idem de Ottone 1^{mo} commemoratur, de quo Vid. Chronicon Spirense Lemanni, pag. 396. At si natura ductu interdum res recte geruntur quanto rectius & felicius id fieri par est, cum ad naturam ars accedit & doctrina. Huc pertinet locus Ciceronis ex oratione pro Archia eap. 7. Ego multos homines &c. Itaque hac scientiarum multarum peritia Carolus imperio aptiorem fuisse merito existimabimus vid. lib. 1. Rhet. cap. vii. §. 23.*

Tertia amplificatio: *Carolus itaque & mortuos & vivos adhibuit doctores. Bibliotheca illius magna mortuorum doctorum copia instructa memoratur in ejusdem Testamento, apud Eginhartum.*

tum. *Vivi doctores Caroli ab eodem recensentur, in quibus eminet Albinus Alcuinus, cujus elogium vide apud Gerhardum Voss. lib. 2. de Hist. Latinis cap. 30. Locus iste amplificati-
onis extat apud Aristot. lib. 1. Rhet. cap. v. 11. §. 18. Adeo
cupide verò utrisque usus est Carolus, ut ne quidem inter cœnandum
abstineret, quo minus aut eruditi familiaris sermone, aut lecti scri-
ptoris auditione, animum simul pasceret.* Testis Eginhartus.

Quarta secundi enthymematis amplificatio; *Ab hoc li-
beralis doctrina exercenda, & propaganda studio, profectum est
ut conderet Academiam Parisiensem.* Elogium hujus Acade-
miæ legite apud Julium Middendorpium lib. vi. de Acade-
miis p. 358. & seqq. Locus è 1. Rhet. v. 11. §. 11.

Erit hic opportunum in thesi de bono Academiarum
dicere, & fructum qui in Ecclesiam & in remp. inde dima-
nat prædicare.

Denique moratum erit, & studii veritatis in dicente in-
diciu, si non dissimulet Grammaticæ tamen, vel artis li-
teras pingendi, ignarum fuisse Carolum. quod non omisit E-
ginhartus. Hic quam minime velis, ars sit Grammatica
in thesi ostendatur è Gerh. Voss. lib. de quatuor artibus po-
pularibus cap. 2. §. 3. & lib. 1. de arte Grammaticæ cap. 3.

Tertium enthymema principale, prudentiam Caroli
in regni administratione, dilaudet. Vbi primò regni ejus
magnitudo, atque hmites memorentur. Describit illos E-
ginhartus p. 327. *Nam cum prius non amplius &c.* Adite & Cla-
rissimi Conringii nostri, de Finibus imperii librum 1. cap. 2.
& lib. 2. cap. 29.

Has tam latè diffusas provincias, acquirere & retinere
magnæ molis erat, & exquisitæ prudentiæ. Eluxit illa o-
mnium maxime, 1^{mo} è pietate Caroli & curâ rerum divina-
rum. Hæc autem quam necessaria ac firma regnorum mu-
nimen.

nimenta sint è genuina Politica disci & doceri potest. Vide inter alios Lipsi. lib. 4. Polit. cap. 2. Quam vero Carolo ista cordi fuerint liquet ex historia, cujus Compendium vide in citato Clarissimi Bœcleri commentario.

Secundò: eadem prudentia patuit è curâ finium tuendorum, quorum causa *disposuit per congrua consiniorum loca*, (verba sunt Eginharti) *praesidia, ut coërceret incursiones*. Hæc origo Hamburgi & aliorum ad eundem fluvium, item ad Lippiam, ad Salam, ad Britannicum, Hispanicum, Gallicum, Germanicum Oceanum, & ad Italiae littus Castellorum. Adhibere laudatum Cl. Bœcleri commentarium p. 8. & seqq.

Tertiò: Eandem prudentiam ostendit amicitia cum exteris regibus contracta, de qua Eginhartus p. 329. *Auxit etiam gloriam regni sui &c.* Fructum hujus rei compendio recenset Bœclerus loc. citato pag. 10.

Quartò: Leges vel maxime arguunt Caroli prudentiam, ut in quibus ipsa salus reip. consistit. De his idem Bœclerus dicendi materiam abundè subministrabit pag. 10. & seqq.

Quintò: Eodem pertinent laudatissima ejus judicia quorum recensio ex historia, amplificatio è Polit. & locis Rhetoricis petenda. Adhibete itaque Contingianam de judiciis reipub. Germanicæ disputationem & Bœcleri commentarium toties jam citatum p. 12. & seqq. Lipsi. l. 11 Polit. c. x. & xi.

Sextò: Est & hoc Carolinæ prudentiæ signum haud postremum, quod, quanquam potestas ipsius verè regia erat, tamen crebros procerum instituit conventus, ut cum iis vel communicaret res actas vel deliberaret de agendis, vel solenniter jus diceret. Id sæpius factum docebunt vos, quæ è scriptoribus collegit Bœclerus pag. 14. Quam vero Principi salutare sit proceres adhibere in consilium è civili scientiâ

entiâ hic erit inculcandum. Inter alios vide Lips. l. 3. Polit. cap. 2. & 3.

Quartum enthymema principale, seorsum prudentiam militarem Caroli extollat, hoc ordine: 1^{mo} ostendatur quam sit principi necessaria prudentia militaris. Enthymemata suppeditabit Justus Lips. lib. v. Polit. cap. 2. Deinde recensentur breviter ex Eginharto bella ab ipso gesta, nempe Aquitanicum, Langobardicum, Saxonicum, Hispanicum, Italicum, Beneventanum, Bajoaricum, Sclavonicum, Pannonicum, Bohemicum atque Danicum.

Porro demonstretur, quam in omnibus his bellis impleverit quinque illas optimi ducis partes, à Lipsio v. Polit. cap. 15. enumeratas. Sunt illæ: scientia, virtus, providentia, auctoritas, felicitas, quas plerasque etiam Cicero in Maniliana Oratione requirit in duce exercitus, & in Pompejo prædicat.

Seorsim vero in Saxonico bello commendetur, 1^{mo} animi ejus magnitudo, qua Saxonum, tam diu tamque pertinaciter reluctantium ferociam & perfidiam tandem expugnavit, 2^{do} prudentia in bello isto finiendo, dum videlicet per Galliam & Germaniam Saxonas à solo suo avulsos distribuit atque hac ratione tandem perdomuit.

Tertio: Laudetur vel maxime, quod iisdem armis Saxonibus nostris & dæmonum cultum excussit, & Christianæ fidei salutarem veritatem eos docuit.

Post quatuor ista præcipua enthymemata quinto & ultimo loco virtutes ejusdem ceteræ, breviter commemorentur, videlicet liberalitas in pauperes, magnificentia in publicum, mixta gravitati comitas, pietas in matrem, amor in sororem, item in fratrem imperii per biennium consortem, educatio & disciplina liberorum, victus sobrius, & à luxa alienus,

nus, vestitus parabilis, & peregrinitatis expertus &c.

Epilogus, quatuor anteriora enthymemata strictim repetat, & quantum Germania atque inprimis Saxonia nostra, principi huic debeat in fine orationis paucis extollat.

XXIII.

CAROLI M. VITUPERATIO.

PROæmium, laudes Caroli M. jucundum *augustinus* fuisse fateatur, suave enim accidisse tam varios vitæ actus, & nunc studiis, nunc reip. nunc bello intentum Regem recolere. Ceterum ut vitiis nemo sine nascitur, ita & labes hujus Principis haur exiles fuisse, est in aperto. Quæ cum ab oratore anteriori silentio tectæ sint, nunc, citra tamen tanti Imperatoris contumeliam, ac cum veniâ auditorum, breviter ostenduntur, Præcipuæ sunt, 1^{mo} injustitia in bellis, 2^{do} crudelitas, 3^{io} nimius amor peregrinorum, 4^{to} impudicitia.

F I D E S.

ORdiatur à morata oratione, quæ neutiquam vituperandi libidine, sed amicæ veritatis studio se adduci, asseveret, ut, post prolixas adeo Caroli laudes, pariter & labes ejus aliquas, historicis minime dissimulatas, breviter recenseat.

Primò itaque strictim repetantur partes laudationis superioris, & veritas illarum, denuo confirmetur, inde pergatur ad capita vituperationum ipsa vid. l. 3. Rhet. c. xv. §. 16.

Primi ergo enthymematis medius terminus esto Caroli injustitia in suscipiendis bellis. Hæc autem & probanda & amplificanda erit. De Langobardico bello, faterur ipse Eginhartus, *suscipiendi ejus consilium, adeo displicuisse primoribus Francorum, ut se Regem deserturos, domumque redituros liberâ voce proclamareat. Neque vero Longobardi, Carolo nocuerant, sed Papa Romani precibus adductus, iniqua hac arma sumserat,*

rat. Saxonici belli frivolam causam Eginhartus memorat, terminos videlicet utriusque gentis in plano contiguos, in quibus cades, rapinæ, & incendia à finitimis miscerentur. Neque solos Saxones perfidæ vicinitatis autores fuisse, vel è Græcorum in Francos proverbio apparet: *Francum amicum habeas non vicinum*. Extat apud Eginhartum, p. 331.

Amplificetur inde, quod bellum ne ex justis quidem causis temere sit suscipiendum, In quam rem enthymemata Hugo Grotius suppeditabit lib. 11. de jure pacis & belli cap. xxiv.

Secundi enthymematis medium terminum præbeat Caroli crudelitas. Præmittatur autem majoris dissimulatæ probatio. Major dissimulata est: *Crudelus princeps est illaudatus*. Probatio hujus afferatur è loco communissimo contrariorum: *Clementia enim prima dos est principum*. Hæc probatio dilatarì poterit, è Lipl. l. 2. Polit. capp. 12. & 13.

Mox enthymematis antecedens exemplis Carolinæ crudelitatis demonstretur. Primò enim Saxones 4500 uno die ad Verdam oppidum decollati sunt. Annales Francorum Monachi Benediçtini anno Christi, 782. p. 95. & Pithœani p. 246. item Regionis ad annum 782.

Augeatur inde, quod *dedisti effens*, à rege *VVidelindo* inducitur, *supplices, & veniam impetratâ benevoli ac fideles futuri*.

Secundò *Thuringi*, qui in Carolum conspiraverant, crimes confessi & ad fidelitatem jurandum circum loca sacra dimissi, in reditu exilio, cæcitate, publicatione bonorum, contra fidem, atrociter sunt multati. Annales Francorum à Cl. Boeclero p. 4. citati. Annales Pithœani p. 11.

Tertiò *Fastrada* uxori indulsit *scire in innoxios*. Eginhartus p. 340.

Tertiùm enthymema principale, *reprehendas primum*

amorem atque cultum peregrinorum, de quo Eginhartus p. 141.

Dilatetur demonstratio hujus thescos, ciues peregrini à principe anteferendos esse, nec regni opes in externos esse profundendas.

Quarti entymematis medius terminus esto, Caroli impudicitia, quæ partim è nuptiis quinquies repetitis, partim verò & omnium maxime ex octo concubinarum agmine demonstrari, à turpitudine autem hujus vitij, & commendatione pudicitia, dilatari poterit. Eandem labem arguit, quod filia suæ Immæ furtivum cum Eginharto amorem indulsit.

Epilogus breviter repetat, has Caroli labes earumque magnitudinem ostendat. Virtutes tamen ejus majores esse, atque harum intuitu condonandum, si quid humani admiserit, nec socius magnum merito Imperatorem & Christiani nominis strenuum propugnatorem habendum esse.

XXIV.

ORATIO JUDICIALIS CONTRA ABSALOMVM FRATRIS SUI AMNONIS PERCVSSO-

REM, è l. 2. Samuelis cap. 13.

EXordium à proprio munere proœmij, quod lib. XII. Rhet. c. XLV. §. 19 designatur, petitum, *coram Rege se commisisse memores hac de causa, ut innoxij sanguinis fusi pœnam à capite & liberis Regis ac toto regno avertat. Averruncari autem posse una eâ ratione, si fratricida pœna tanto crimini debita afficiatur.* Addatur morata oratio: *Periculo, quod se, actorem, maneat, salutem regis ac regni se anteferre.* Sequatur rei gestæ narratio, perspicua & verisimilis. Eidemque intexantur, cum quæ actoris optimos mores arguant, tum è secundo Rhetor. II. & IV. capp. quæ iram ac odium judicis adversus reum

reum excitare possint. Omnia enim ista in narratione Rhetor requirit lib. III. cap. XIV. §. 8. 9. & 26.

Propositio, fratricidam jurium hospitalitatis, & majestatis regiae, ac pacis publicae violatorem ad supplicium esse trahendum, se ostensurum promittat.

Fides quinque enthymematibus constet. Primum enthymema: *Absalom est homicida, ergo capitale supplicio afficiendus.*

Dilatetur hoc enthymema 1^{mo} majoris omissae probatione: Homicidam morte puniri poscit primò naturalis aequitas. Iustum enim est ut qui mortem intulit mortem capiat. Idem 2^{dò} lex Dei decernit quam & 3^{tiò} optimi quique principes religiosè observarunt, & (4.) in liberis quoque suis sunt exsecuti.

Idem enthymema dilatetur 2^{dò} probatione antecedentis, ubi primò per hypotyposin describatur, Ammonis in ipso convivio truculenta, & cum omnium stupore atrociter patrata caedes, non manu quidem, sed autoritate atque jussu Absalomi, cui à ministris non poterat non obsecundari. Absalom itaque caedis autor est, & tanquam parricida puniendus.

Prolepsis; *At Regis filius est Absalom.* Hujus solutio secundum enthymema principale constituat, hujusmodi: Regis filium occidit, ipsum fratrem suum: Omnium maxime itaque supplicio dignus. Diducatur demonstratione, quam grave sit 1^{mo} lædere regem, 2^{dò} parentem, 3^{ro} in proprium sanguinem, in fratrem, Caini exemplo, sævire, 4^{to} quod à lege homicidis lata, nemo omnium & ne Regis quidem filius sit exemptus.

Tertium enthymema: *Violavit Absalom jus hospitij, dum percussores immisit fratri ad epulum invitato.* Dilatetur primò commendatione juris hospitalis, quod ab ipsa natura, & hu-

jus autore Deo nobis insitum est. Secundò idem ab optimis quibusque est observatum. Vt à Lotho Genes. xiv. v. 7. & seqq. à sene Gibeano, Judic. cap. xix. à Rahab Hierichuntina Josuæ cap. 2. 3^{io} ne piratis quidem aut latronibus neglectum. Quartò, *bus lauro est qui hospitum ladit.* Quintò, *nocere supplices, hospitique, par scelus, & vindex utriusque Deus est.*

Quartum enthymema: *Regia majestas graviter laesa est, dum filius Regis tam atrociter trucidatur.* Hic in thesi Reges sanctos esse, quippe Dei vicarios, nec minus familiam illorum inviolabilem esse demonstratur.

Quintum enthymema: Pax publica est violata. Dilatetur è loco communissimo consequentium. *Cedes & violentia passim irrumpet, nec hospes ab hospite deinceps tutus erit. Quin nec ipse Absalomus ab atrocioribus in quemvis alium injuriis abstinabit. Atque ad supplicium tracto cessabit utrumque.*

Epilogus itaque iudices ab iram adversus Absalomum concitet è lib. 2. Rhet. cap. 2. & ut debito supplicio hunc parricidam plectant, atque Regum autoritatem fartam tectam conservent, exhortetur.

XXV.

ABSALOMI DEFENSIO.

EXordium excuset susceptam hanc Absalomi apologiam, adhibita morata oratione hujusmodi: *Non esse se eorum numero, quibus omnia Principum honesta atque subonesta laudare, mos sit, sed tamen amore justis & aequi se adductum, non posse non acerbiores istam in Regis filium orationem diluere.*

Ad primum itaque enthymema orationis anterioris respondetur: *Occidit, sed justè.* Incestus enim mortem meretur, ex lege Dei qua exas Levit. XX, 17. Ad secundum: *Regis filius*

lium eundemque fratrem suum peremis, fateor, ac cum qui non obsequio sed stupris & adulteriis filium Regis ageres, & qui sorori casta ac pudica, dum agrotante, fraudis secura, efficiosè ministras, turpi libidine incensus, veniens, & sanctius inter Israelitas agi debere memori, visum per vim obtulis, & ita violatam domo contumeliosè expulis. Multiplicem aded injuriam sorori illatam ulcisci pars pietatis censeri debet. Si enim eadem ausu privato occisi propinquus ulcisci poterat, cur non liceas dulcissima sorori illatum scelus germano fratri vindicare.

Tertio zelus hujusmodi non caret exemplo. Vide Genes. xxxiv. Num. xxv. Judic. xx.

Ad tertium: *Imposturam Amnon fecit & passus est. Specie humanitatis sorori famam visa patrem eripuit, ipse pariter illusus. Quod si homicidam ne ara quidem. (Exod. xxi, 12, 14. Levit. xxiv, 17. & 21.) nec incestus reum tueri hospitium debet.*

Ad quartum: *Excanduit rex audito scelere Ammonis 2. Sam. xiii, 21. itaque punitum voluit. Quod verò ob affectum paternum pater distulit, vice ipsius filius peregit. Itaque Regis majestatem Absalom non laesi, sed ab Amnone prius laesam asseruit ac rursus est. Quàm verò Regia Majestatis reverens sis Absalom, fuga & exilio suo est restitutus.*

Ad quintum: *Pacem publicam Amnon prior violaverat. Equa enim virgo rursus eris si ne à Regis quidem filia impurus frater abstinet? Qui in sororem tam est injurius, quid non in civem sibi licere existimes? Non consistent enim exempla ubi caperunt.*

XXVI.

BASILII IMPERATORIS MINISTER ACCVSATVR LÆSÆ MAJESTATIS.

Iohannes Zonaras Annalium tomo 3. de Basilio Imperatore

tore Constantinopolitano, hæc refert: *Cum venatum exisset (Imperator) in cervum incidit inusitatâ magnitudine elata in alium cornu gestantem, quem persequendo affecus cum stricto gladio percussurus esset, bellua se defendis, & ramo uno cornuum, zone imperatoris infixo, illum sublimem fers, cornibus suspensum, ac forsitan ita perisisset, nisi à quodam dissecta ense Zonâ fuisset ereptus. Cui mercedem salutis sue præclaram reddidit ille, capitis truncationem: speciosâ causâ qua sitâ, quod ensen contra Imperatorem strinxisset, neque reputavit pro Imperatore potius strinxisse, ac remuneratione magnisq; premiis esse dignum. Hæc Zonaras.*

Exordium ex re & dicente, & adversario, & auditore petatur, lib. 3. Rhet. cap. xiv. §. 20. Ex re: *Morsiferam plagam à corpore Imperatoris divinitus nuper prohibitam esse, omnes merito gaudemus.* Ex dicente & adversario: *Me verò fides ac religio, qua Imperatori sum devotus, compellit, ut contra temerarium illum non tam baltei quam Augusti lateris, quin imo majestatis violatorem cogar hodie accusationem insinuare.* Ex auditore: *Vos iudices eam fidem, quam nunquam non probastis, etiam in hac ardua causa lubentes meritoque demonstrabitis.*

Narratio rem gestam è Zonara verbis antea citatis, sed ornatus & luculentius, & ut cum mores dicentis appareant, tum affectus audientis commoveatur, judicibus exponit: *Exiverat cum comitibus & satellitio suo in proximam sylvam Imperator, ut quotidianas & longe gravissimas imperij curas, ferarum agitatione paulum disinteret, atque ad ardua regni consilia alacrior rediret &c.*

PROPOSITIO.

Cum hæc itaque ita, ut diximus, gesta esse, nemo ignoret, nemo dubitet, Vos quam grande crimen temerarius il-
legit-

le gladiator admiserit expendite quæso, & meritum supplicium illi decernite.

FIDES.

Primum enthymema: *Regis majestas tam est sancta ut adversum corpus ejus nullo casu gladium stringere liceat.* Probetur: 1^{mo} è lege naturæ ipsa lib. 1. Rhet. cap. x. §. 3. & cap. xi. §. 3. & cap. xiv. §. 17. *hec enim dicat, reverentius habendum esse Regem, nec gladio feriendum.*

Secundò: sententiis sapientum, quibus Rex viva imaque Dei, alter Deus, & similibus elogiis ornatur.

Tertiò etiam vultu ladi pietatem vetus verbum est, multo magis id fiet manu, omnium maximè vero sic à intemperatà adversus cum qui parentibus superior & Deo in terris proximus est.

Secundum enthymema: *Non in Regem tantum, sed & in totam Remp. peccavit,* lib. 1. Rhet. cap. xi. §. 6. Dilatetur 1^{mo} probatione antecedentis. *Totum enim corpus ladi, qui caput violat, totam navem periculo exponit, qui navarchum imperit.* Secundo: Reipub. facies sub Basilio Imperatore breviter describatur ex historiâ: *Remp. antecessoris ignaviâ perditam Basilius recreavit, optimis quibusque mandavit magistratus. Horum fide jura integerrimè dici caprum est. Iudicia nonnunquam exercuit ipse. Saracenos & Manichæos felici bello fregit &c. Hunc adeo florentem reipub. nostra statum temerarius ille gladius petiit & concussit &c.*

Tertium: *Magna recordia est, periculum minus periculo maximo depellere. Vt festinatio nunquam non improvida est & cæca, ita sanè & hic accidit. Non carebat equidem periculo impetus cervi in Imperatorem, sed periculum periculo majore alio depellere maximum est periculum. Nec adversus hoc cæcus furor hujus satellitis, qui cum bellum petere debuisset, ipsum larum*
Prim-

Principis percussis. Augeatur exclamatione.

Quartum enthymema: Res est pessimi exempli, & prodicioni opportuna. Dilatabitur hoc modo: Inter comites principum nunquam desunt maligni & animo à principe alieni, quibus si causa huiusmodi indulgebatur, nunquam Princeps eris tutus. Nam ut in proverbio est, prætexit tantum eget improbitas l. 1. Rhet. cap. xii. §. 36. Ergo si aut equus cessites, aut iactetur curvus, aut vacillet gressus, manum satellitis sui suspectam habere Princeps cogetur &c.

Inferatur hic conclusio omnium horum enthymematum. Ergo capite plectendus est minister & coniungatur cum ultimo enthymemate, quod tale erit: præsens cum iusta suspicio sis in animo habuisse principem inuicere. Signa animi huius sunt. 1^{mo} quod cum manu auxiliari posset strictum gladium adhibuit, 2^{do} quod latus principis cecidit, cum cervum ferire debuisse. Tertiò, quod ceterorum ministrorum qui certatim accurrerunt nemo, sed ille solus suspectum hunc tutandi modum arripuit. Quartò si tormentis exquiratur Saraceborum emissarius, aut Manichæus deprehenderetur esse, quorum in nos hostilis animus nuperis nostris victorius magis est exacerbatus. Vid. l. 2. Rhet. cap. xix. §. 33. & seqq.

Plura enthymemata suppediet cap. xiv. l. 1. Rhet. Epilogus recordiam, temeritatem, insidias huius percussoris repetat, & inde augeat, quod Rex hinc belluâ, istinc percussore petitus in lethalem morbum ob animi consternationem inciderit, atque ut debitum supplicium sicario illi decernant, iudices exhortetur.

XXVII.

DEFENSIO MINISTRI.

EXordium duos procemiorum locos lib. iiii. Rhet. cap. xiv. §. 21. indicatos adhibeat. & primò quidem adversarij in-

tii inhumanitatem, atque contra infontem ministrum immam acerbitatem perstringat: inde veniam petat si innocentiam suam animosè ipsius defendat.

F I D E S.

Prima pars adversarii criminationibus respondeat ex lege Aristorelis lib. 111. Rhet. cap. xvi1. §. 14. & 27.

Ad primum è 3. lib. Rhet. cap. xv. §. 2. *Strinxi gladium, sed meritò, non tamen in corpus Imperatoris, sed in cornu cervi, zona Imperatoriæ implexum, ardore liberandi Dominum meum incensus &c. eaque re id, quod natura ipsa jubet, & sapientes præceperunt, præstiti. Cingulo enim dissecto belluam à corpore Imperatoris in memet concitavi, ut meo sanguine vitam Imperatoris redimerem.*

Ad secundum: *Ego vero qui Principem à presenti morte eripui, etiam temp. nostram hac ratione sartam tellus conservavi, ut non à Rege tantum, sed & à patriâ universâ gratia mihi debeantur &c.*

Ad tertium: *Viri fortis est, tum cum periculum non nisi periculo explicari potest, quidvis periculi animosè subire. Ecquod autem potuit majus esse periculum, quam cum bellua sublimem ferret Imperatorem. Hic per Agatónomou spectaculum illud Regis in altum sublatis describatur.*

Ad quartum: *Nusquam erit Principum tuta fides, non cibus, non potus, non ullum obsequium, si tam optimè cogitata suppetiæ tam malignè accipiantur.*

Ad quintum: *Atrox calumnia est, in animo me habuisse Dominum meum intetimere, primo enim nulla causa mihi erat, cur tantum scelus patrarem lib. 2. Rhet. cap. xxiii §. 89. Quippe benignum, indulgentem, ac munificum habui principem; Secundò, si id in animo habuissem, fecissem dudum, cum occasiones longè commo-*

*modiores offerrentur lib. 2. Rhet. cap. xxi. §. 92. Tertiò: quid
 pidinem hoc scelus patrandi unquam subivisse animum meum, quia
 nam, quando, quo signo unquam deprehendit. Lib. 2. Rhet. c. xix.
 §. 26. Quartò: Nec alieno ab Imperatore animo unquam me fu-
 isse, quinquam probaverit. Lib. 2. Rhet. cap. xix. §. 26. Quintò.
 Ridiculum est commentum à Saracenis aut Manichæis me esse sub-
 missum, cum nihil unquam mihi cum huius commercij fuerit, à puero
 in Imperatoris servitio fideliter versato &c. Sextò: quod cete-
 ris cessantibus ego solus accuri non culpâ tantum caret, sed & lau-
 dem meretur.*

Secundâ parte innocentiam suam ulterius demonstrat,
 adhibitis locis qui extant lib. 3. Rhet. cap. xv. 1. *Factum ne-
 gare nequeo, in omnium quippe conspectu patratum, at rectum illud
 est, & iustum, quia legibus divinis & humanis, & data fidei est
 conveniens. Neque enim sine scelere Imperatorem patriâ tam ne-
 cessarium, mihi verò tam benevolum, cum periclitaretur destituere
 potui lib. 3. Rhet. cap. xv. §. 2.*

Secundo: *incidi balneum, sed servavi Imperatorem, lib. 3.
 Rhet. cap. xv. §. 4.*

Tertiò: *Et vero necessarium erat, ut hoc modo liberaretur,
 quæ enim alia via esse potuisset? Lib. 3. Rhet. cap. xv. §. 5.*

Quartò: *Testor verò Deum immortalem, id unum mihi fu-
 isse propositum, ut zonam secarem l. 3. Rhet. cap. xv. §. 6. Quod
 si fortuito altius gladius penetrasset, haberent forte malevoli, quod
 in speciem objicerent.*

Quintò: *Contra calumniam in thesi dicatur, lib. 3. Rhet.
 cap. xv. §. xiii.*

Sextò: *Exempla similia impune habita conquirantur.
 Lib. 3. Rhet. cap. xv. §. 8.*

Epilogus primò misericordiam sui moveat è locis qui
 extant lib. 2. Rhet. cap. 8. Deinde obtestetur ac imploret
 Deum,

Deum, Imperatorem, iudices, ut tueantur innocentiam, aurem calumniæ nullam præbeant, nec vitam tantum, sed & præmium sibi tam optimè merito, donent.

XXIIX.

ACCVSATIO HORATII SORORICIDÆ
CORAM TVLLO HOSTILIO
REGE ROMANO.

DE Horatii parricidio legendi sunt Dionys. Hallicarnass. lib. 3. c. 24. & seqq. T. Livius l. 1. cap. xvi. Plutarchus in parallelis cap. xvi. Val. Max. l. vi. c. 3.

Exordio benevolentia Regis paretur, & attentio. Benevolentia quidem gratulatione victoriæ ab Albanis reportatæ. Attentio vero promissione orationis, quæ rem ad Regis regnique salutem maxime attinentem proponat. Ita enim benevolentiam & attentionem parari, docetur lib. 2. Rhet. cap. iv. §. 14. & lib. 3. Rhet. c. xiv. §. 28.

Narratio cædis exordio subjungatur eo brevior quo illa Regi erat notior. Narrationi inferatur ἡθῶς & πείθῶς, c. lib. 3. Rhet. cap. xvi. §. 9. & 26.

Propositio: *Tantum scelus inultum auferat Horatius?*

In Confirmatione enthymemata afferantur, hæc enim judicialibus causis maximè conveniunt, lib. 1. Rhet. cap. ix. §. 66. Sed ejusmodi quæ id quod in controversiam venit demonstrent lib. 3. Rhet. cap. xvi. §. 1. Non quæritur autem, num occiderit sororem Horatius, sed an jure occiderit. Posteriores artis hujus magistri statum qualitatis appellant.

Primum enthymema, è loco proprio hujus generis, qui extat lib. 1. Rhet. cap. x. §. 2. & c. xiii. §. 9. *Horatius sponte contra legem occidit sororem, Ergo injustè occidit.*

In prædicato antecedentis duo veniunt probanda & am-

plificanda, 1^{mo} patricidium esse contra naturæ, gentium & scriptas Romuli Numæque leges. De naturæ & gentium jure legatur Hugo Grotius l. 1. de Jure Pacis & Belli c. 1. & 2. Romuli & Numæ leges recitantur in Antiquitatibus Rosini l. 8. c. 5. Harum autoritas confirmanda est è lib. 1. Rhet. cap. xv. §. 12. 2^{do} probetur spontè occidisse è loco communissimo definitionis, quia sciens volens occidit. His addatur conclusio enthymematis, in eaque amplificetur, quod germanam sororem, eodem sanguine, iisdem parentibus ortam, ob muliebrem planctum, nulli contumeliosum, truculentè occiderit.

Secundum enthymema ex eodem loco proprio generis judicialis. *Innocentem sororem occidit, ergo injustè: Antecedens probetur è xiii. loco communissimo qui extat lib. 2. Rhet. cap. xxiii. §. 49. Quod tantum in se crimen admisit Horatia? quam legem violavit? non vitæ fratris insidias struxit, non hostem juvit, non patriam prodidit, sed muliebri errato, ad portam fratri in turba obvia, demortuum sponsum deploravit &c.*

Post hæc inseratur iterum conclusio, per *ἐξερπια* duplicata, cum eaque connectatur major propositio hujus enthymematis.

Tertiò facinus hoc variè amplificetur è locis qui monstrantur lib. 1. Rhet. c. xiv. §. 4. 7. & 10. Interponatur morata oratio, quæ procul odio, solo justitiæ amore hæc ita exaggerari ostendat.

Tandem Tullus Rex metu divinæ vindictæ terreatur, è l. 2. Rhet. c. v. §. 6.

Epilogus è 2^{do} & 3^{io} perorationis loco Aristotelico l. 3. c. ult. §. 5. & 7. repetitâ magnitudine delicti Regem ad supplicium more patrio de patricida sumendum exhortetur.

DEFENSIO HORATHI, A P. HORATIO
PATRE INSTITUTA.

VT oratio moribus senis conveniens effingi rectius possit, legatur primò caput XIII. l. 2. Rhet. quod est de moribus senum.

In Proœmio itidem ut actor Regi victoriam, sibi vero quod victorem genuerit, pater gratuletur. Utrumque ad benevolentiam conciliandam est comparatum.

Narratio omittitur. Propositio in hanc sese sententiam formetur: *Patierine verò Rex, publicum hoc de victoriâ gaudium gloriosi victoris, filij mei, cæde contaminari?*

In fide duo actoris argumenta prius confutentur, ex præcepto Aristotelis l. 3. Rhet. c. XVI. l. §. 24. Vide autem 2. Rhet. c. xxv. §. 1. & 3. & primò affer *ἰσχυόν*: *Non omne homicidium est contra Reges, alioqui ne filio quidem meo Curiatios occidere licuisset.*

Secundò ἀποσυλλογισμόν: *Filia mea patria hostis fuit, eundemque in nos cum Curiatius animum habuit, ergo non fuit innocens. Erga similem cum Curiatio mortem merita.* Antecedens huius syllogismi dupliciter poterit dilatari, 1^{mo} si in thesi ostendatur patriæ amorem omnibus privatis amoribus esse anteferendum: secundò si accusetur Horatio, quod praefurtivo amore adolescentis, qui cum clam patrem se deponſaverat, non patriam tantum sed & parentes & fratres spreverit, & contra laudetur Horatius, ut qui non suam tantum, sed & sororis vitam praefore patriâ contemserit.

Præcipuum verò in hac oratione argumentum erit commotio affectus misericordiæ & deprecatio. Deploret itaque pater tot liberorum subitum interitum, commemoret sua

in remp. merita & quod similia mala domestica Regi ipsi evenire, aut à Diis ultoribus immitti queant. Modum hunc affectum concitandi, præclare docuit Aristoteles l. 2. Rhet. c. 11x. Exemplum illustre habetis in hac ipsa historia, apud T. Liv. l. 1. c. xxvi.

Epilogus peroret, ut si non jure causæ, saltem ob lacrymas, orbitatem & atrocem casum domesticum, filio commissum facinus condonent, paratum se esse quovis alio piaculo, sibi imperato, eadem luere.

XXX.

THOMÆ MUNCERI PERDVELLIVM DVCIS IN CASTRIS AD MVLHVSIVM CA- PTIVI ACCVSATIO.

Thomæ Munceri dicta ac facta nefanda, dignusque iis exitus narrantur à Joh. Sleidano l. viº. Luculentius à Petro Gnodalio l. 3. rusticanorum tumultum, tomo 2. operis historici de Germaniæ rebus, à Simone Schardio collecti.

Exordium è duobus locis, auditore, & re petitum (3. Rhet. xiv, §. 20.) Primò victoriam à perduellibus ad Frankenhusium reportatam, gratuletur Principibus. Inde Thomam Muncerum jam captum, ultimo supplicio afficiendum esse contendat.

Gratulationi, quia factum extollit, demonstrativi generis loci inserviunt. De eadem fusius agit Gerhardus. Voss. l. 3. institut. Orat. c. 7. num. 12.

F I D E S.

Initio voces sceleratæ Munzeri demonstrantur 1. è litteris ejus interceptis, 2. ex iis quæ per tormenta confessus est. Facta verò ejus ex iis quæ palam patrata sunt.

Proximum est ista omnia amplificare, in quam rem enthymē.

thymemata ducantur è XIV^{to} cap. l. i. Rhet. Primum esto ex §. 1. *A maxima Münkeri impietate, scelus ipſius emanavit. Ergo graviter plectendus eſt: Probatur antecedens 1^{mo}, Deum enim ipſum contempſit, dum ordinem divinitus inſtitutum, ac Dei ipſius Vicarium nequiter evertere voluit. Secundò, ludibrio quoque habuit Deum opt. max. dum ejus affatus ac juſſa mendaciter ſinxit, iſque ad multorum mortalium perniciem ſcleratè eſt abuſus. Tertiò, eaque omnia ex deſtinatà malitià ab ipſo ſunt patrata, ut præter alia liquet, è riſu, quo jam captivus verba Saxonia Ducis excepit.*

Secundum enthymema è l. i. Rhet. c. xiv. §. 4. *Damnum intulit irreparabile, Ergo graviſſimè puniendus. Evertit arces, urbes, villas, ac tot mortalium millia, ipſe dux, in perniciem ac mortem præcipitavit.*

Addatur conclusio novo enthymemate veſtita è l. i. Rhet. c. xiv. §. 5. *Nullæ cruces, nulla ſupplicia tanto ſcelere digna queunt reperiri &c. ne tamen impune auferat, optemus vel putreſcat in ſublimi, vel in aqua ſuffocetur, aut igne uſuletur.*

Sequatur morata oratio, in hanc ſententiam; *Nihil tamen præjudico nobis, Principes, nec ad meum arbitrium rem revoco, tantum hoc monſtrum quanto citius è medio tollendum eſſe admonco, illo pænæ genere, quod à ſimili ſlagitio alios queat detertere.*

Tertium enthymema ex §. 10. *Nemo haſtenuſ ita ut Münkerus inſanivit, Quare inſigniori pænà officiendus eſt. Dilatetur 1^{mo} probatione antecedentis multiplici: In Germania noſtrâ ſolus Münkerus eſt, qui perduellioni ſuæ juſſa divina prætexit. Habuit Roma Græchos, Spartacos, Catilinas, ſed Münkeri diſſimillimos, hic enim vecors & inſanus, illi callidi, hic rei militaris rudis, illi ſcientiſſimi, hic omnem ubivis magiſtratum abelitum, illi paucos quosdam in civitate ſua hoſtes everſos cupiebant.*

Secundò additione majoris propoſitionis ejusque probatio;

batione: *Scelus quod est sine exemplo, novo quoque & exquisito genere supplicij est puniendum. Tum enim demum pœna delicto respondet.* Vid. Grot. l. 2. c. 20. §. 2.

Antequam ad quartum enthymema procedatur, interponatur morata oratio, quæ à *savitia & crudelitate in supplicio se abhorre*re, at *sceleribus tamen justam pœnam exoptare, profiteatur.*

Quartum enthymema ex §. 11: *Diu jam & saepe seditiones contra magistratum est molitus. Ergo gravissimum meretur supplicium.*

Dilatetur hoc enthymema 1^{mo} probatione antecedentis, quam suggeret historia Münckeriana ipsa, ex ea enim liquet turbonem hunc jam olim Pragâ, Marchiâ, Zviccaviâ, Alstero, ob seditiosas voces actionesque, ejectum esse.

Secundò additione conclusionis, cui novum enthymema sit intextum, ex inciso 14.

Attexatur & huic enthymemati morata oratio, quæ sceleratissimorum hominum hos esse mores aperiat, ut diu animo versent ac interim tegant nefanda proposita, interdum tamen erumpant, & mox in latebras se recipiant, ad id usque tempus, cum patrandi tempus opportunum adesse animadvertunt.

Quintum enthymema ex §. 18. ista propositione: *Qui eum injuriâ afficit à quo beneficium accepit, gravissime peccat, Atqui Münckerus id fecit, Ergo &c.* Tractetur hoc ordine; primo loco statuatur conclusio, copiosius prolata, & variè repetita: Sequatur major cum sua probatione; Bis enim peccat talis, 1^{mo} quod non reddat beneficium, 2^{do}: quod pro bono malum reddat &c. Subjiciatur minor, eique probandæ atque illustrandæ diutius insistatur, inprimis enumeratione beneficiorum quæ à magistratu in subditos longe, maxima proficiuntur.

ciscuntur. Post illa denuo inculcetur conclusio, nempe gravissimo supplicio Muncerum esse afficiendum.

Sextum & ultimum enthymema ex §. ult. citati capituli xiv. lib. i. Rhet. *Contra apertum Dei optimi maximi interdictum, sacro codice promulgatum, nefarie deliquit Muncerus. Ergo gravissimè est puniendus.*

Antecedens probetur iis sacrae scripturae testimoniis quibus autoritas magistratus divinitus asseritur. Cumque historici ab initio laudati commemorent, Philippum Hassiae Landgravium testimonia ista Muncero occentasse, hujus Principis pietas & sacrarum literarum peritia obiter hic laudabitur.

Addatur conclusio hoc ferè modo dilatata: *Si contra non scripta, sanis tamen omnibus nota jura deliquisset, impune ferre nequiret, nunc cum ea quae tam expresse Deus mandavit violavit, cur cessavit trahere eum ad supplicium?*

Enthymematibus his subiciatur exemplum de Coreh, Dathan, & Abiram, qui cum magistratui resisterent, cum centum & quinquaginta sociis perduellibus partim terrae biatu, partim igne divinitus immisso sunt absorpti. Num. c. xvi. §. 31. & seqq.

Tandem irae affectus commoveatur Prin. ipibus, quod contemptu, maledictis, contumeliâ, damnis, et ultimarum nebulone illo sint affecti, quod quidem ex historia Muncerianâ ipsa facile poterit demonstrari; talia vero iram ciens, ut docetur l. 2. Rhet. cap. 2.

Epilogus è quatuor locis Aristotelicis 3. Rhet. cap. ult. primò summam dictorum brevissimè repetat, secundò immanem nequitiam Munceri vituperet, ac tertio exaggeret. Quartò iram atque odium cum Principum praesentium tum bonorum omnium, adeoque ultimum supplicium promeritum esse ostendat.

HEROVM FILII NOXÆ.

Questio est infinita cognitionis è locis topicis qui extant lib. 2. Rhet. c. xxiii. in primis dilatanda.

Exordium è proprio munere proœmij, item ex dicente & ex auditore (l. 3. Rhet. c. xiv. §. 19. & 20) petitum, *dolendum esse contendat, viros, virtute, literis, opibus magnos, degeneres ut plurimum filios post se relinquere. Propositum sibi esse hoc nunc demonstrare, non quod insectatione aliorum gaudeat, sed quod causas rei admirabilis investigare, cognitu dignum pariter ac iudicandum sit futurum.*

Fidei prima pars loco communissimo inductionis è 2. Rhet. c. xxiii. §. 35. & seqq. adhibito variis exemplis veritatem thesæos hujus demonstrabit. Hujusmodi exempla sunt filij iudicis Israelitarum Heli 1. Samuel. ii. §. 12. & 17. Davidis Absalom, Salomonis Rehabeam, Cyri Cambyses, Socratis item, Alcibiadis, Cimonis, Periclis liberi, de quibus vide Aristotelis iudicium 2. Rhet. xv. 7. Inter Romanos Ciceronis, Hortensij, Cornelii Tacitiorumque filij, quam fuerint degeneres, è Ciceronis lib. vi. ad Atticum ep. 3. Plinio l. vii. naturalis hist. c. 16. Valer. Max l. v. c. 9. Ælio Spartiano in vita Septimij Severi satis constat. Denique & nostri temporis experientia erit alleganda: quippe quæ ejusdem thesæos veritatem, abundè poterit demonstrare. Ceterum exempla hæc non ad Historiæ modum tenuiter narranda, sed grandiori charactere, exornanda erunt Characteris autem hujus elocutio & compositio cujus modi esse debeat ex antiquis docuerunt Demetrius, Dionysius Longinus, Hermogenes & è recentioribus Gerardus Vossius J.v. Partit. c. 4. & l. 6. Institut. orat. c. 3. & seqq.

Fidei

Fidei pars altera causas defectionis hujus aperiat, hoc ordine, ut primò duæ falsè ab aliis allegatæ removeantur, cujus modi sunt, 1 siderum positus in natali 2 mundi quædam senectâ: neutra enim harum huc facit, cum eodem fide-re nati diversissimis sæpe moribus sint, & stirpium animaliumque vi-res nostro ævo aequè sint valida atque ante bi mille annos fuerunt. Quas enim facultates seminibus, herbis, radicibus vetustissimi Medicorum jam olim adscripserunt, eadem hodieque deprehendun-tur in eisdem: & quod de ætate hominum Moses pronuntiavit, i-dem iis qui temperanter vivunt etiamnum cernimus contingere. Falsis causis rejectis veræ subjiciantur istæ. Prima: Improvi-dum conjugium. Vxor enim animi & corporis dotibus destituta pa-rilem ferè prolem edit.

Sequatur morata oratio, qua plures hujus rei causas natu-rales ideo se notire censurum asseveres, quod fieri illud nequeas sine verbis nuptiis, quæ tamen adolescentem minime deceant.

Secunda causa: imperitia educationis, ubi integer iste syl-logismus oratoriè explicetur. Qui educationis imperiti sunt, nequeunt patriæ præclaros dare liberos, At Heroes e-ducationis ferè sunt imperiti. Ergo præclaros liberos reip. dare nequeunt.

Majoris dilatandæ causa demonstretur quanta sit vi edu-cationis. Esse peculiarem quandam illius disciplinam, totius reip. & singulis familiis necessariam; hanc disci debere, nec enim nasci no-biscum &c. Vide præter alios Arnisii Polit. l. 1. c. 18.

Ad minorem ostendatur: plerosque mortalium in scitis edu-cationis laborare; heroes vero excelsæ animo ad summa quæque ferri & puerilis ætatis informationem longe infra suas putare curas.

Tertia: non in scitis tantum sed & neglectus educationis genu-ina causa est, cur liberi degenerent. Neglectus autem iste oritur in he-roibus à multis atque summis magnorum virorum circa publica nego-ria occupationibus &c.

Quarta: *Indulgentia nimia vel maxime liberos corrumpit. Heroes autem erga liberos fere Misioni Terensiano similes sunt.*

Quinta: *Ex paterno honore liberis fastus accedere & pigritia soles, veri profectus in virtute graves remora.*

Sexta: *Omnium rerum in paternâ domo affluens liberis esca voluptatis est. Voluptas autem ab ardua virtutis via longissime avocas mortales.*

Plura de hac quaestione lecturus adeat præter autores paulo ante allegatos Erasmus in Adagio *Heroum filij noxia*, Hugonem Grotium Annotatis ad lib. 1. Samuelis c. 2. v. 12. Matthiam Berneggerum ad Cornelij Taciti *Agricolam* quaestione 181.

XXXII.

FORTES CREANTVR FORTIBVS ET BONIS.

Sententia est ex Horat. l. xv. Carm. oda 4. notissima, & superiori contraria.

Exordium iusto liberius in heroum filios anteriorem Oratorem declamasse conqueratur. *Neque enim quod rarsus contingit, omnibus exprobrari debuisse &c. Paucorum omnino heroum unum alterumve degenerem fuisse, plurium liberos paternam virtutem non exequasse tantum, sed & interdum superasse &c.*

Atque hoc se nunc demonstraturum proponat.

Fides primò exempla afferat filiorum minime degenerum, deinde exemplis superiori oratione allatis respondeat. Etenim si frequentius fortes fortibus creari quam heroum filios noxas esse fuerit demonstratum, verisimilior erit hæc posterior oratio. Vide Aristotelem l. 2. *Rhet.* cap. xxv. §. 20. & seqq.

Ergo

Ergo si plerique eminentes viri jam inde à primâ rerum origine expendantur, multò maxima illorum pars filios hancquam degeneres, quin interdum parentibus ipsis præstantiores genuisse deprehenditur.

Primò enim nibilo parentibus suis pietate, prudentia, fortitudine inferiores fuisse Isaac, Iacob, Iosaphat, Xerxes, Cimon, Pericles, Antigonus, Hannibal, Q. Fabius Maximus, L. AEmilius Paulus Macedonicus, M. Porcius Cato, Germanicus Drusi fil., T. Vespasianus, &c.

Secundò: Parentibus suis superiores evaserunt, Abraham Iosephus, Moses, Iosias, Iudas Maccabeus, Cyrus, Alcibiades, Pausanias, Agesilaus, Pyrrhus, Alexander M. Masinissa, L. Tarquinius Priscus, Valerius Publicola, M. Marcellus, Scipio uterque, M. Atrilius Regulus, Lucatius Catulus, Papirius Cursor, Cn. Pompejus, Julius Caesar, C. Caesar, Octavianus, Constantinus M., Theodosius, Iustinianus, Carolus M., Fridericus I., Carolus V. &c.

Tertiò: considerentur integra gentes apud Romanos, ut Valeria, Fabia, Claudia, AEmilia, Cornelia, Caelia, Metellorum, atque; deprehenditur sane degeneres paucissimos, amulos autem avirtutis longe plurimos existisse.

Reperatur conclusio, nempe ex his quæ enumerata sunt liquere, optimas parentes bonæ frugis filios, ut plurimum procreasse, quin imò quorundam parentum virtutem à liberis longè fuisse superatam.

Ad exempla superiori oratione allata respondeatur in genere, quod quemadmodum una birundo ver non facit, ita nec unus alterve degener filius toti familia notam inurere queat, præsertim cum defectu unius plurimum patris sanctum virtute in eadem domo compenseetur. Iniquum autem sit ob unum malum spicuum totam segetem culpare.

II. In specie: Nihil mirum esse si Heli iudicis Israelitici

filij degeneraverint, quippe quibus omnem lasciviam Mirio ille indulgebat; ut autem quisque suum esse vult, talis est. Præterea Caino Setoum & Abelum, Absaloimo Salomonem & alios Davidis minime perduelles filios opponere oportet. Neque vero cæterorum ibidem enumeratorum parentum liberi ad unum omnes degeneros fuerunt, sed unus tantum itemque aliter, quod autem rarius fit minus est verisimile l. 2. Rhet. c. xxx. §. 20.

Subjiciatur iterum conclusio: *verissimam igitur esse illam à Poëta prolata sententiam: Fortes creari fortibus ac bonis, præsertim cum aliorum sapientum testimonio eadem confirmetur, ut Platonius, qui in oratione funebri, eos qui pro patria occubuerant, bonos fuisse memorat, quia ex bonis erant prognati, Aristotelis, qui lib. 3. Polit. scribit, esse probabile, viros præstantiores esse eos qui è præstantioribus nati sint: item Poëtarum, qui quantum ad ingenium & mores inferendos stirps valeat declaratur, immissis ingenij homines è saxis, è rupibus, è leonibus, natos dicunt; Apud Virg. l. 4. Æneid. v. 365. Dido ad Æneam:*

*Nec sibi diva parens generi nec Dardannus autor
Perfide, sed durus genuit se causibus horrens
Caucasus, Hircanaque admorant ubera tigres.*

Et Catullus de nuptiis Pelei & Thetidis:

*Quanam te genuit sola sub rupe Leana?
Quod mare conceptum spumantibus exspuit undis?
Quæ Syren, quæ Scylla vorax, quæ vasta Charybdæ &c.*

Peroratio argumentorum enumeratorum vim brevissimè repetat, & magnorum virorum generositatem, per quam similes sibi liberos gignere solent, extollat. Hi enim sunt præcipui perorationis loci ab Aristotele l. 3. Rhet. cap. 19. §. 9, 2 & 5. indicati.

PRO ASTROLOGIA JUDICIARIA.

Prooemium laudet cœli pulchritudinem & in hæc inferiora influxum. l. 3. Rhet. c. xiv. §. 11. Inde proponat ostendere prædictionem ex astris nequaquam esse commentum inane, sed ratione & experientia niti.

Confirmatio primum hujusmodi adhibeat enthymema: è loco communissimo l. 2. Rhet. c. 23. §. 89: *Cælum ac sidera non frustrâ ambiunt rei inferiores, sed foveant illas, movent, reguntque, Ergo effectus illorum prædici possunt.*

Dilatabitur enthymema, primò: probatione majoris intellectæ, nempe si causa ejusque operatio probè cognita fuerit, cognoscetur quoque & prædici poteris effectus. Secundò luculentâ probatione minoris: Mirabilis illa corporum cœlestium pulchritudo, magnitudo, multitudo, varietas nequis esse inutis. Sol causa est lucis & caloris, accessu, recessuque suo inducit vicissitudinem tempestatum anni, procreat plantas, animalia, & cum homine hominem ipsum. Excitat è terrâ fumos qui concrevunt in aqua, abeunt in ventum. Luna & complex & vacuas conchyliis, ossaque animalium, ac plurimum potest in omnes res humidas, in mare positissimum, cujus astus ad lunæ motum semperatur. Pariter & astra cetera vires suas exerunt in hæc inferiora, neque enim otiosa esse possunt, splendida adeo & vasta corpora. Huc accedit, quod effectus multi sunt qui ad nullas alias causas præterquam ad sidera referri queunt, ut crises morborum, inæqualitates tempestatum qualicet sol uniformiter moveatur, uniformes tamen non sunt, sed nunc calidiores, nunc frigidiores, nunc humidiores nunc sicciores.

Post luculentam probationem minoris repetatur conclusio syllogismi: Ergo effectus hi prædici possunt, cum eaque connectatur secundum enthymema. Et verò à pastorebus agrico.

gricolis, nautis, effectus siderum pradicuntur, multo magis itaque id fiet ab astrologis, qui accuratius omnia ista rimantur.

III. Enthymema effectus hos ad res quoque humanas extendat : *Cælum causa est omnium transmutationum quæ sunt in aëre. Ergo & sterilisatum & morborum, & affectionum, non corporis modo, sed animi etiam, quippe qui corporis sequitur temperiem, ergo & amorum & irarum, hæc enim animi sunt affectiones. Ex amore porro conjugia & liberi, ex ira bella atque cades oriuntur. Ergo & harum causa à cælo sunt petenda. Ingeniorum denique vis ac tam varia studia, fata item mortalium tam diversa, tam inexpectata, tam interdum immerita, quo referas nisi ad hanc cælestem causam?*

Quartum enthymema è loco communissimo, cui extat lib. 2. Rhet. c. xxiii. §. 41. eorum judicio qui Astrologiæ periti fuerunt, artis usum & prostantiam comprobet. Hi sunt Ptolemæus, M. Manilius, Julius Firmicus Maternus, Lucas Gauricus, Hieron. Cardanus, Cyprianus Leovicus, alique. Elogia horum vidè in lib. Gerardi Vossij de scientijs Mathematicis. Manilij versus sunt sub. init. l. 3.

*Principium rerum, & custos natura latentum
Cum tantas strueres moles per mœnia mundi
Et circumfusus orbem concluderes astris
Undique pendentem in medium diversaque membra
Ordinibus certis sortares corpus in unum
Aeræque & terras flammæque undamque nascentem
Mina in æternum præbere alimenta juberes
Ut tot pugnantes regeret concordia causas,
Staretque alterno religatus ædere mundus,
Exceptum à summa ne quid ratione maneres
Et quod erat mundi mundo regeretur ab ipso:
Fata quæque & vitas hominum suspendis ab astris,*

*Quæ summæ operum partes, quæ lucû honorem,
Quæ famam assererent &c.*

V. Enthymema: *Nec singuli tantum viri, sed & integræ eaque cultissima nationes Astrologiam hanc in præcio habuerunt, ut Babylonij, Æthiopes, Ægyptij, Athenienses, quorum hi Berofo ob divinas prædictiones publicè in Gymnasio statuat inauratâ linguâ posuere, ut refert Plinius l. vii. hist. nat. c. 37.*

Sextò denique exempla afferantur verarum prædictionum quæ artem hanc in primis commendant. *Omitto prædictiones Alexandro, Antigono aliisque à Chaldaeis factas, illu intentus, quæ circa Augustum, aliosque Imperatores contigerunt, de quibus vide Svetonium in Augusto c. 49. in Tiberio c. 14. in Caligula c. 57, in Nerone c. 40, in Domitiano 14 & 15. capp. De Plotino Firmicus l. i. c. 3. affirmat quod & ipse licet Astrologiæ contemptor eum tamen exitum habuerit, quem stellarum judicia monstraverant. Idem de Joh. Pico Mirandulæ Comite, qui xii. libris Astrologiam impugnat, Lucas Gaucicus refert.*

Epilogus breviter colligat allata argumenta & mox hujusmodi addat moratam orationem: *Veniam mihi dabitis quod sententiam à vestrà fortassis ac plurimorum mente alienam tam calidè propugnaverim &c. Paratus interim sum audire docentem rectiora, nec pertinaciter reluctabor, si pro adversâ sententia argumenta offerentur firmiora.*

XXXIV.

CONTRA ASTROLOGIAM JUDICIARIAM.

Astrologiæ divinatricis vanitatem inter alios luculenter demonstrarunt Thomas Erastus in defensione libelli Hieron. Savonarolæ de hoc argumento, Benedictus Pererius

in Genesin, Petrus Gassendus animadvers. in lib. xii. Diog.
Laert. de meteorologia Epicuri à pagina 947. usque ad 979.
Tobias Wagner in disp. de astrol. Genethliaca edita Sturgar-
diæ Anno 1656. Gerardus Vossius l. 2. de Idololatria cap.
XLIX. & lib. de scientiis mathematicis cap. 38. Cujus ul-
timo paragrapho. longe plurimos recenset qui artis hujus
vanitatem ostenderunt.

Proœmium in *Ψογ* l. 3 Rhet. c. xiv. §. 11. vituperet
quorundam curiositatem, qua rerum futurarum præscien-
tiam, nulli mortalium quocunque se vertant penetrabilem,
soli autem Deo obviam, stulcè effectant.

Proponat itaque se impietatem & vanitatem fallacis-
simæ hujusartis demonstraturum & argumenta illi stabilen-
dæ allata confutaturum.

Confirmationis primademonstratio sumatur è divinæ
mentis interprete scripturâ sacrâ quæ sanè clarè testatur so-
li Deo futura esse nota. Vide Esaïam à cap. xli. ad xliix.
Astrologos vero & prædictionem ex astris disertè damnat
Deut. xviii. 10. & seqq. Esaïæ xiv. vers. 25. & cap. xlvii.
§. 10. & 13.

Dilatetur cum explanatione horum cœlestium edicto-
rum, tum additione & explicatu propositionis majoris, reli-
giosè videlicet assentiendum esse iis quæ Deus ipse docet.

II. Enthymenâ, sanctos Ecclesiæ Christianæ doctores
idem sensisse demonstret. Locus est communissimus 2. Rhet.
c. xxi. §. 41.

Præclarus omnino est locus Origenis, sed prolixior quā
ut exscribi possit, extat autem apud Eusebium lib. vi. præ-
parationis Evangelicæ c. 9. S. Basilus item sextâ Homiliâ in
ἐξάνυσσιν, susè contra Astrologos disputat, & eò quidem lu-
culentius, quoniam plerique homines istius ævi hoc errore
erant

erant præoccupati. S. Augustinus sæpe hoc argumentum tractat ut l. v. de Civitate Dei, cap. 4. ubi exemplo Esavi & Jacobi Genethliacos refellit, item cap. vi. ubi eosdem confutat exemplo gemellorum suarum & cap. vii. ubi scitè admodum docerne in granis quidem eodem tempore seminatis, sidera eundem præstare effectum, cum *spicas alias rubigo interimat, alias depopulentur aves, alias homines aveillant &c.* Extat etiam integra oratio ejusdem Augustini, in Mathematici ejusdam reconciliatione cum ecclesia, in qua vanissimæ hujus artis impietas à sanctissimo doctissimoque viro acriter reprehenditur.

III. Enthymema è loco communissimo l. 2. Rhet. cap. xxiii. §. 51. *Astrologia judiciaria tollit arbitrij humani libertatem, Ergo absurda est & impia.* Major dilatetur 1^{mo} quod arbitrij libertate sublata, homo definit esse homo, 2^{do} quod qui eam negat Catholicus non est, ut affirmat Hieronymus, in Esaiæ caput 47.

Minor probatur: *si enim astrorum necessitati subiecta est voluntas, definit esse libera.*

IV. Enthymema: *Tollitur reip. salus, hæc enim mandatis & interdicitis, premiis & pœnis constat, at his locus non est, ubi Chaldaicum fatum regnat &c.*

V. Enthymema: *Omnis religio & ipsa adeo Christiana tollitur, si à fiderum positu, & non potius à liberrimâ electione alicuius hominum oriuntur.*

VI^{to}. Vanitatem hujus artis clarè demonstrant tot aberrationes, sive potius mendacia Genethliacorum, tantum non infinita. Exempla plurima recensent Cicero l. 2. de divinatione & omnes qui contra Astrologiam judiciariam scripserunt, eademque magno numero suppeditat nostri temporis experientia,

VII^{mo}. Et illud expendendum est, malè sibi consulere qui aurem Astrologi præbent, mala enim prænuntiata torquent ante tempus, bona securos & negligentes addunt. Cic. l. 2. de divinatione cap. 9. *Quæ vita Priamo, inquit, fuisset, si ab adolescentia scisset, quos eventus senectutis esset habiturus?* Marcône Crasso putas utile fuisse tum cum maximus opibus, fortunæque florebat, scire, sibi, interfecto Publio filio, exercitiq; deleto, trans Euphratem cum ignominia, & dedecore esse pereundum? An Cn. Pompejum censes, tribus suis consulatibus, tribus triumphis, maximarum rerum gloria, letaturam fuisse, si scisset se in solitudine Egyptiorum trucidatum iri, amisso exercitu: post mortem vero eo censecutura, quæ sine lacrymis non possumus dicere? Quid vero Cæsarem putamus? si divinasset fore, ut in eo senatu, quem malare ex parte ipse cooptasset, in curia Pompeja ante ipsius Pompej simulacrum, tot centurionibus suis inspeculantibus, à nobilissimis civibus, partim etiam à se omnibus rebus ornatis, trucidatus ita jaceret, ut adejus corpus non modo amicorum, sed ne servorum quidem quiquam accederet, quo cruciatu animi vitam ælurnam fuisse? Certe igitur ignoratio futurorum malorum utilior est quam scientia. Vide & Horat. l. 1. od. xi. & Gell. xiv. c. 1.

Alterà pars argumenta superioris orationis refellat. Ad 1. ergo respondeatur, ex vero ac specioso antecedente, elicere illos absq; ulla vi consecutionis falsum consequens. *Non sunt quidem fidera tam multa, tam magna, tam varia ullo modo otiosa, cum luceant nobis ac nos foveant. At hæc ælii generâlis est, neque ex illa effectus ullus singularis producitur, nisi quatenus accedit causa singularis. Itaque ut cognosci possit, qualinam effectus singularis futurus sit, nihil juvat generalem illam cognoscere, nisi cognoscatur & ælii dispositioque singularis, utpote quæ determinet tribuatque effectui, ut talis potius quam talis sit.* Vide Gassendi Epicurum p. 964. Dum explicamus, verba sunt ejusdem Pe-

tri Gassendi ibid. p. 921, *cur in viridario hic ista planta non illic crescat, illa illic non vero hic, id tribuimus seminibus, quorum unum hic aliud illic severimus, non verò aqua qua irrigantur, utpote quæ causa solum generalis indifferensque utrique sit, ita & circa illos effectus qui tribuntur sideribus videtur esse philosophandum.* Hæc Gassendus.

Ad secundum: Nautæ, pastores, agricolæ, tempestates prædicunt, tum cum causæ singulares jam operari incipiunt, & tamen sæpe hallucinantur, multa magis itaque hallucinantur qui diu ante causarum existentiam effectus prædicere conantur.

Ad tertium: Non negatur varia esse hominum studia, varios eventus, fata varia, sed Deum ab astris ista suspendisse, id vero negatur, oriuntur enim ab aliis causis nempe à liberâ hominum electione, à causis aliis singularibus ac manifestis, à divinâ dispositione speciali.

Ad quartum: Sapientissimi doctissimique viri aliter senserunt, Cicero l. 2. de divinatione & testibus & rationibus & experimentis, hanc imposturam refellit. Idem facit Favorinus apud Gellium l. xiv. cap. 1. Sextus Empiricus contra Grammaticos c. 10. eandem refert inter artes quæ nomine tantum, non autem re artes sint. Ptolomæum verò immeritò sibi vendicant Astrologi, ut demonstrat Gassendus in Epicuro suo p. 963.

Ad quintum: Barbaris gentibus, & curiosis Græcis vel soli Romani opponantur, qui M. Popillio Lænate & Cn. Calpurnio Consulibus genethliacos intra decimum diem urbe & Italia exire jusserunt, ut testatur Val. Max. l. 1. cap. 3. Idem postea factum Imperatorum edictis, quæ vide apud Dionem Cassium l. 49. p. 417. in fine & l. 56. p. 583, in fine & l. 57, p. 609. in fine. Svetonium in Vitellio c. 14.

Ad sextum: Exempla partim esse ficta, partim dæmonis astu prædicta & impleta, partim fortuito evenisse. Vi. de Gerardum Vossium l. 2. de Idololatriâ c. 48. p. 571. & Petri Gassendi Epicurum, p. 966.

Epilogus vanitatem hujus artis breviter amplificet, & ne unquam hujusmodi imposturæ credulam aurem præbent auditores dehortetur.

XXXV.

ELOGIVM HISTORIÆ.

Proœmium dilaudet apophthegma Agesilai, quod in Laconicis c. 18. recitat Plutarchus: *Interrogatus enim ille quo quis maxime pacto inter homines præclarum invenire nomen posset, respondit: si optima dicat & pulcherrima agat.* Utrumque hæc ut consequamur maxime juvat historia. Hic proœmii locus ab Aristotele monstratur l. 3. Rhet. c. 14 §. 6.

Propositio: Cum multiplex sit historiarum utilitas, præcipua illa est, quod primò ad pietatem, secundo ad prudentiam, tertio ad eloquentiam nos informat, de quibus ordine dicendum.

Pars 1^{ma} hoc Enthymemate constet: *historia speculum est divinæ providentiæ, Ergo multum facit ad pietatem.* Enthymema omne duobus præcipuè modis potest dilatari, primò si addatur intellècta major, ejusque probatio sive, quod eodem recidit, enthymematis consequentia probeatur. Secundo si minor syllogismi, quæ enthymematis antecedens est, varie comprobetur. Prior modus quandoque omitti potest, nunquam autem ille posterior, antecedentis enim probationi necessario & diutissime est insistendum. Historiam autem divinæ providentiæ speculum esse liquet primo si singulos spectemus mortales. *Quod si enim ne passer-*
culus

tulus quidem in terram cadit, citra voluntatem Patris cœlestis, quanto minus casuum humanorum ille incuriosus est censendus? secedat ergo in se quisque & serio expendat quoties ab incunabulis divino beneficio liberatus sit à lapsu, ab igni, ab aqua, à ferro, veneno, infidiis Satane & hominum, aliisque periculis. Atque ut periculum semel evasisse casui fortassis tribuatur, ita per omnes vitæ annos constanter præstari tutum, non potest nisi à provida mente & vi majore proficisci.

Intuere & exempla aliorum ex. g. Josephi patriarchæ: hunc cum fratres invidia stimulati, perditum, iie vellent, vendebant Ismaëlitis, at Deus hoc scelus ad Josephi gloriam, ad fratrum & Iacobi salutem, ad Egyptiorum, ipsiusque Pharaonis Unum dirigit. Somnium quod Deus Josepho immiserat invidiam illi fecit, somnium Pharaoni immisum Josephum è carcere exemit. Cum nihil pastoribus esset apud Egyptios invisus, Rex Egyptius Israëlitis optimos regni agros assignat. Pariter & in aliis divina providentia elucet, si singulorum historiam & vitæ actus penitemus.

Secundo clarius eadem illa se exerit in imperiorum per tot secula conservatione, multo enim tenuior est humana cum sapientia tum potentia, quam ut tot casuum incerta, tot improberum millimina, quibus imperia sunt exposita prævidere & avertere possint, atque hæc manifestiora sunt quoties Deo visum est transferre imperia de gente in gentem. Excitat enim ille, tam Cyrum aliquem, aut Alexandrum, aut Casarem, cui illa quoque que extra rationem agit, sæpe non ex voto tantum, sed & supra votum fiunt. Unde autem hoc sit nisi à provida ejus curâ, qui temperat hoc universum; Opponunt Epicurei veterem querimoniam, Bonis male esse, malis bene, Respondetur querelam esse iniquam & vanam. Primo enim nimis propere isti judicant, nec rerum exitus opperiuntur. Venditur optimus Josephus, regnat pro patre nefarius

Alfoso.

Abfolomus, hic fiste iudicium tuum, dum quem eventum res fit habiura vel tibi vel pofteris appareat. Adi Pfalmum xiv. §. 1. & Claudianum initio l. 1. in Rufinum. Secundò, Qui ita queruntur, bonos pronunciant qui ut plurimum sunt mali, Tertiò idem bona fape habent pro malis, mala pro bonis. Malum non eſt honoribus & opibus cum fraudari, cui viam virtutis illa præluderent. Nec Socrates morte ſuâ miſer eſt, quippe qui paucorum annorum defectum ſempiterna nominis gloria penſavit, & exemplum conſtantia Athenienſibus reliquit, quod ad metum numinis ſtimulos adderet. Hæc & his ſimilia plura de hoc argumento ſcitè ſcripſit Gerard. Voſſius lib. de Philologia c. xiv. §. 14.

Secunda pars: Hiſtoria prudentiam conſert, Ergo maxime eſt utilis.

Dilatabitur hoc Enthymema primò additione majoris propoſitionis: *prudentia in omni vita eſt ſummè utilis.* Probatũr primo è definitione prudentiæ; nihil enim illa eſt aliud, quam vivendi agendique ſcientia, qua & præſentibus conſult, & in futurum providet. Secundò à diviſione, ut & tibi & domui & reip. recte conſulere poſſis, prudentia præſtat. Tertiò contrario, imprudentes ubique impingunt, & ſuam pariter & publicam rem perdunt.

Idem Enthymema, porro dilaretur multiplici probatione antecedentis. Quod ergo Hiſtoria prudentiam conferat probatur primo inde, quoniam ſuggerit tot. negotia hominum, eorumque conſilia, cauſas, prætextus, & eventus, veluti in tabula propomit, unde de futuris rebus; omnium optimè capitur conſilium. Vide l. 1. Rhet. c. iv. § 17. & l. 2. Rhet. c. xx. §. 22.

Secunda probatio antecedentis, exempla eorum recenſeat, qui hiſtoriarum cognitione prudentiam ſibi paraverunt, ut Scipio Africanus poſterior, apud Cic. l. 1. ad Quintum Fratrem ep. 1. c. 8. & l. 2. Tuſcul. quæſt. c. penult. L.

Lucullus,

Lucullus, ap. Ciceronem in *Lucullo*, cap. 1. *Augustus Imperator* apud Suetonium c. 89. *Alexander Severus* apud Lampri-
dium p. 218. *Alphonſus Arragonia rex* Livij & *Caſarū* lectione
ſe oblectavit & interrogatus, quosnam optimos ac fideliffimos Con-
ſiliarios ſibi vendicare, mortuos reſpondit. Panormitanus.

Tertia probatio; ſapientiſſimi viri ita pronunciarunt,
Polybius l. 1. *Nulla eſt mortalibus ad proſciendum via expedi-
tior, rerum ante actarum ſcientia.* Ciceroni l. 2. de orat. c. 9.
Hiſtoria dicitur vita magiſtra. Diodorus Sic. l. 1. c. 1. *Aliarum
erratis ad rectam vitæ institutionem pro exemplis uti, & ad varios
in vitâ eventus, non quod gerendum ſit quarere, ſed quod rectè ſa-
lum eſt imitari, ſcitum atque pulchrum eſt.* Liv. præſar. hiſto-
riæ ſuæ: *Hoc illud eſt præcipue in cognitione rerum ſalubre ac fru-
giſerum, omni te exempli documenta in illuſtri poſita monumento
intueri, inde tibi tuæque reip. quod imitere capias, inde ſædum in-
ceptu, ſædum exitu, quod vites.* Occupatio. *Nitar propria ex-
perientia.* Subjectio. *At hæc primo ſeram ſapientiam gignit, ſe-
cundo multius periculum eſt obnoxia.* Vide Diodorum Siculum
l. 1. cap. 1.

Tertia pars: *Hiſtoria eloquentia quoque eſt magiſtra*, pri-
mò enim varia exempla ſuppeditat, quæ magnâ ſunt dicen-
di materia. Vide l. 1. Rhet. cap. 2. §. 21. & 25. & l. 2. Rhet.
cap. 10. §. 23. & 24.

Secundò, orationes quæ paſſim hiſtoriæ inferuntur, ra-
tiones, mores & affectus ſuppeditant, atque ut illa confor-
mari, cieri aut ſedari debeant, commonſtrant.

Tertiò gravi & politâ dictione à præſtantiffimis autori-
bus hiſtoria eſt perſcripta.

Quartò, Hiſtoriarum lectione proſecerunt & aliis pari-
ter in dicendo proſciendum eſſe cenſuerunt diſertiſſimi qui-
que, Demotheſenes, Iſocrates, Cicero, Quintilianus.

Epilogus attexi potest è duobus locis l. 3. Rhet. c. ult.
§. 7. & 9.

XXXVI.

PRINCIPIIS OBSTA.

OVidii istud confirmari & dilatarì poterit, primò enthy-
mematibus, ex Aristotelis l. 5. Polit. c. 3. & 8. ubi præci-
pit in rep. *μάλιστα τὸ μικρὸν φιλάειν*

II. Sententiis: Polybius l. 3. p. 164. edit. Græcolatinæ in
fol. *Sæpe res maxima à parvis principii oriuntur, ubique autem pri-
mi aggressionibus & cogitationibus facilius medicinam facias.*

Cicero Philip. v. *Omne malum nascens facile opprimitur,
inveteratum fit plerumque robustius.*

Vell. Patere l. 2. c. 3, § 4: *Non ibi consilium exempla unde
cæperunt, sed quamlibet in tenuem recepta tramitem latissimè eva-
gandi sibi viam faciunt. Et ubi semel recto deerratum est, in præceps
pervenitur.*

Tacitus l. 4. Annal. cap. 32. v. 4. *Non sine usu fuerit in-
trospicere illa, primo aspectu levia, ex quæu magnarum sæpe rerum
motus oritur.*

Persius Sat. III. v. 63:

Hædeborum frustra cum jam cutis agra tumebit

Poscentes videas: venienti occurrere morbo.

Ovid. l. 1. de remedio amoris.

Vidi ego quod fuerat primo sanabile vulnus

Dilatatum longa damna tulisse moræ.

III. Similitudinibus: è Seneca l. 3. de beneficiis c. 29:

*Nulla non res principia sua magno gradu transit; Semina omnium
rerum causa sunt, tamen minima partes sunt eorum quæ gignunt.
Aspice Rhenum, aspice Euphratem, omnes denique inclutos omnes,
quid sunt si illos illic unde effluunt asstimes? quicquid est quo timen-
tur,*

sur, quo nominantur in processu paraverunt. Tolle radicem, nemora non surgent, nec tantimontes vestientur &c.

Et lib. i. de ira cap. 8. In primis finibus arcendus est bos, qui cum intravit & portus se intulit, modum à captivis non accipit.

Curt. l. vi. c. 3. §. 11, Parva saepe scintilla contempta magnum excitavit incendium.

Chrysostomus homil. 19. ad populum Antiochenum, p. 247. Hoc exiguum neglectum & omne reliquum destruit. Saepè namque domos adificantes homines, & unius tegula excussa curam non gerentes, totam domum perdididerunt. Et in vestimentis parva facta scissura, nec resarcita, magnam fecit disruptionem. Hoc & in torrentibus multoties evenit, etenim & illi, si vel minimum ceperint ingressum, totum introducunt fluentum.

IV. Pertinet huc illa Æsopi fabula de cane parturiente, apud Phædrum numero xix. quæ incipit: Habent infidias hominis blanditiæ mali &c.

V. Exempla duo Cæsar recenset apud Salustium in Catilina, cap. li. Tertium addatur è Tacito l. i. Hist. cap. lxxx. §. 1. Quartum è Livii l. iv. cap. 2. ubi Consules dicunt: Certum habere, majores quoque, si divinaissent, concedendo omnia non mitiorem in se plebem, sed asperiores alia ex aliis iniquiora postulando, cum prima impetrasset, futuram: primo quamlibet dimicationem subituros fuisse potius, quam eas leges sibi imponi paterentur. Quintam esto Manuelis Comneni Imp. qui, ut est apud Nicetam vii, 2, vel exiguum somitem, ut magnam incendii causam suspectam habebat & suborientia incommodorum semina statim extirpabat, optimi agricola more, qui spinas adhuc teneras & degeneres frutices runcare solet.

CONTRA SOMNI ET CIBI INTEM-
PERANTIAM.

EXordium laudet in C. Iul. Cæsare, quod semper & somno & cibo in vitam, non in voluptatem fuerit usus, ut est apud Vell. Paterc. l. 2. c. 41. Locus iste exordii exstat l. 3. Rhet. cap. xiv. §. 11.

PARS PRIMA CONTRA SOMNVVM
IMMODICVM.

HUic dissvadendo sufficiet multiplex enthymema Platonis, l. 3. de legibus, p. 892. *Somnus multus nec corporibus nec animus neque rebus gerendum naturâ conducit*, è loco communissimo 2. Rhet. c. 23. §. 51, & 49.

Probationes sunt quia primo labefactât sanitatem, dum nimium humectat, accumulât crudorum humorum copiam, enervat vires, spiritus & calorem nativum obruit, ac suffocat &c.

Secunda probatio: mentem & sensus hebetat atque obtrundit &c.

Tertia: opportuna negotiis tempora intercipit. Verè enim Plato loco jam allegato: *Nemo dum dormit alicujus pretij est, non magis quam si non viveret* &c.

Tertia hæc Enthymematis pars dilatetur inductione: *paterfamilias qui à servis excitatur rei domesticæ parum satagit, & nocet exemplo. Magistratus totam noctem dormiens, negligit publicam rem & hostibus malisque civibus occasionem præbet. Adolescenti cui non arctiora sunt somni quam noctis tempora parum in studiis sapientiæ proficiet. Hæc enim ardua sunt & multarum vigiliarum.* Pertinet huc Senecæ epistola 122.

Post enthymema hoc mediocriter dilatatum, afferan-

surexempla, Pythagoræ ejusque auditorum, de quibus videtur Laërtium in vitâ Pythagoræ p. 577. Euclidis ap. Gellium l. vi. c. 10. Demosthenis apud Ciceronem l. 4. Tusc. quæst. cap. 19. *Cui non sunt audita Demosthenis vigilia &c.* & apud Strobæum serm. 29. p. 206. ex Aristotelis Chriis, Demosthenes interrogatus quo pacto sibi oratoriæ facultatem comparasset, respondit; *Plus olei quam vini consumpsi.* Juliani Imperatoris apud Ammianum Marcellinum l. 16. *Julianus nobiles ad officia dividebat tripartita, quietis, & publicæ rei, & musarum.* Et denique Gerardi Vossii, de quo Caspar Barlæus in epigrammate:

Sufficit acta dies aliū non sufficit illi

A solida studiū tempora nocte petit.

PARS SECUNDA.

FRUstra vero ab immodico somno dehortamur nisi & causa ejus tollatur. Ausonius initio Ephemeridis:

Tibi causa somni

Multa quod potas nimiaque pendis

— — — *mole saginam.*

Huic intemperantiæ dissuadendæ passim occurrit materiæ affatim, tantum digerenda ordine est, quod nunc quidem ista enthymematum serie fiat.

Primum enthymema: *Intemperantia cibi gravat corpus, ejusque & vires & formam imminuit.*

II. Enthymema, *Ingenium, judicium, memoriam, animumque omnem corrumpit.*

III. Enthymema; *Alacritatem illam quæ justis laboribus exantlandis necessaria est intervertit.*

IV. *Omnibus sapientum vocibus est damnata.*

V. *Ipsius summi Numinis edictis prohibita.*

VI. *Æternam miseriam parit.*

h 9. in oratione ista ultro exister; laudare enim virtutem & reprehendere vitia per se est moratum, præsertim si modestè fiat, & ita ut benevolentia erga auditores ex oratione cluceat.

Epilogus, hortatione constet, insertà amplificatione, & moto affectu verecundiæ l. 3. Rhen c. 19. §. 5. 6. 7. & l. 2. Rhet. cap. vi. § 4. 5. 12. 20. &c.

XXXIX.

CONTRA IGNAVIAM.

Primum enthymema, ignavia corpus debilitat eique morbos inducit, ergo est fugienda. Videte insignem locum Plutarchi, in de sanitate ruenda c. 44.

II. Enthymema: Ignavia mater est egestatis & famis.

III. Eadem animum quoque reddit inquietum. Huc pertinent elegantissimi versus Enniani apud Gellium l. 19. c. 10. pronunciati a choro Græcorum militum, cum ob maris tranquillitatem Aulide morarentur, *Oti qui nescit uti &c.*

IV. Denique animum plane dissolvit & corrumpit. Adite Johannis Stobæi eclogas. 29. & 30.

XXXIX.

SILENTII BONUM.

Primum enthymema: *Deus & sapientissimi mortalium silentium commendant.* Probatur ex initio psalmi xxxix, & historia Pambonis Eremitæ à Socrate descripta l. 4. hist. eccles. c. 18. It. ps. 141. v. 3. it. ex illustri loco epistolæ Jacobi c. 3.

Pythagoras quoque nihil prius discipulos suos docuit quam tacere, idemque gentium philosophi plerique diligenter commendarunt.

Secundum enthymema: *Fabrica humani corporis silentium commendat, os etenim unum homini attribuit natura, aures verò oculos.*

oculosque binos; Eadem duplici vallo cinxis linguam, osseo quidem dentium, carneo verò labiorum.

III: Enthymema è loco communissimo l. 2. Rhet. c. 23. §. 51 *Garrulitate multa sibi pericula mortales conciliant &c.*

VI. Enthymema: Simonidis verbum: *Silentij nunquam se paenitentiam egisse, sæpe vero sermonis.*

Plura enthymemata suggerent Plutarchi de garrulitate libellus, & Stobæi eclogæ 33, 34, 35, 36, Adhibete & garruli characterem à Theophrasto tribus capitibus descriptum, Item Horat. lib. 1. sat. 9.

XL.

JEJUNII COMMENDATIO.

EXordium è libro 3^{to} Rhetoricorum c. xiv. § 6. commendet illorum studium, qui summam curam habent pietatis, & eorum omnium, quæ istuc faciunt, sunt observantes. In confirmatione primum enthymemata, postea exempla, tandem & argumenta pathetica afferantur. Morata per totam spargantur orationem, quod fiet si ubique pietatem suam & serium studium virtutis, tum amorem auditorum suorum atque eos juvandi studium præ se ferat, qui dicit.

Enthymemata duo è communissimo effectorum loco ducantur. I. *Jejunium ad pietatem conducit. Extenuato enim corpore mens ad preces & rerum cælestium contemplationem magis redditur idonea. Dilatetur è loco communissimo contrarium.*

— — — *corpus onustum*

Hesterni vitii animum quoque praegravat una.

Secundum enthymema: *Facit etiam ad prosperam valetudinem. A morbis enim innumeris, quos luxur gignit, jejunium nostuetur; quin & morbos ipsos aut tollit, aut leviores reddit, efficacius nonnunquam, quam medicorum pharmaca.*

III. En.

III. Enthymema è loco communissimo l. 2. Rhet. c. 23. §. 41. A iudicio nempe sapientum, loelis 1. §. 14. c. 2. §. 12. Matth. 6. §. 17. c. 17. §. 21. 2. ad Cor. c. 6. §. 6.

Post enthymemata afferantur exempla veteris ecclesiæ, cum Judaicæ tum Christianæ 11. Chron. c. 20. §. 3. Esra. c. 8. §. 21. Psal. 35. v. 13. Jerem. c. 36. §. 9. Luc. 2. v. 37. Actor. 13. §. 23. Item hodiernæ & Occidentalis & Orientalis Ecclesiæ. Denique affectus pudoris concitetur è locis qui exstant. l. 2. Rhet. c. vi. & ad exempla Livianarum orationum publicè nobis expōsiturum,

XLI.

E SVMMIS REGVM MINISTRIS, NONNVLLI INTERDV M MALE TANDEM PEREVNT.

PROœmium conficiatur è l. 3. Rhet. c. xiv. §. 8. *Multum prodesse rerum eventus observare atque in illorum causas inquirere, hanc enim præcipuam esse viam parandi prudentiam.*

Dilatetur è loco contrariorum: *Siquis eorum quæ in vita accidunt, aut olim acciderunt, planè sit incuriosus, eorumque causas rimari pigretur, ne hominis quidem elogio dignus est, non enim utitur suâ ratione.*

Propositio: *Mibi per varias temporum vices & consignatas rerum memorias oculos circumferenti, cruenti exitus summorum in aulis ministrorum plurimi occurrerunt, quos attendere, & ad genuinas suas causas revocare, opera pretium est visum.*

Fides primò enumeret illustria quædam hujus rei exempla, ut *Hermia* Antiochi M. ministri de quo Polyb. lib. vto *Sejani* apud Cornelium Tacitum l. iv. & vi. *Annalium*, is cum operum Tiberii Imperatoris præcipuus adiutor esset, malè tandem cum omni familia sua perit, item *Plautiani* apud Herodianum l. 3. qui cum apud Imperatorem *Se-*
primum

ptimum Severum hujusque successorem Bassianum Caracallam præcipuo loco, hujus etiam socer esset, tandem omni honore exutus ac malè mulctatus est. Plura his similia & Græca & Romana historia suppeditat.

Post exempla, enthymemata afferantur, quæ causas infelicitis exitus in medium producant. Prima causa est quod fortunâ suâ moderate uti nequeant, sed arrogantia intolerabilis illorum animos fermè soleat occupare. Vnde fit ut res bene gestas, quas Regum auspiciis debebant, sibi præposcere tribuant. Clitus apud Curtium l. iix. c. i. §. 28. *Malè instituisse Græcos quod tropæis nomina Regum duntaxat inscriberentur, alieno enim sanguine partem gloriam intercipi.* Josephus l. xix. antiquit. cap. 7. de Agrippæ Regis præcipuo ministro, Sila, Gravabatur Regi aliquo modo cedere, semperque licentius agebat cum eo, interdum extollens se immodicè, nunquam non labores in ejus gratiam exhaustos memorans, quæ cum sine modo repeteres, opprobare videbatur, ita ut Rex tandem offenderetur immodicâ libertate hominû &c. Antonius Vespasiani Imperatoris minister apud Tacitum l. 3. Hist. se Pannonicas, ait, legiones in arma egisse, suis stimulis excitos Masie duces, suâ constantiâ perruptas Alpes, occupatam Italiam & quæ sequuntur. De Philota Curt. l. 6. nimia jactatione gravem fuisse Alexandrî auribus memoras, & ob ea non quidem sceleris sed contumacia tamen suspectum.

Ceterum malè atque imprudenter hoc fieri inde probatur, perinde enim hoc est, ac si post curule certamen equum ex-postulare cum sessore velis, quod non & ipse coronetur. Agrippa Augusti Imperatoris gener apud Dionem Cassium l. 49. duo hac cum qui sua ipsius incolumitatis curam gereres, observare jubebas, unum, ut negotio præfectus rerum difficultatibus, se ipsum explicares, aliterum, ut rei bene gestæ nomen, Principibus reservares.

Chrysoſtomus homil. 3. in Matthæum; *Nos quoque ſamulos habentes tunc eos maximè comprobamus, quando cum bonâ grâtiâ in omnibus obſecræ, nihil ſe grande arbitrantur egiſſe.*

Prudentes itaque ad Regem referunt felices eventus, ut Ioſubus, in obſidione Rabathæ de quo Joſephus l. vii. Antiq. cap. 7. *Hæc per literas, inquit, regi ſignificaviſſi, hortans ut ad excidium urbis ipſe veniret, & hunc quoque titulum victoriæ ſuis apponderet. Eadem mente Craterus in caſtris ad Ariacæna omnibus præparatus, Regis expectabat adventum, captæ urbis titulo, ſicut par erat, cedens, Q. Curt. l. vi, 6, 33. Trajanus apud eundem Joſephum Veſpaſiano Imperatori excidium urbis Iaphæ reſervavit, cumque per nuncios rogavit, ut filium ſuum Titum mitteret, finem victoriæ impositurum l. 3. de bello Judaico cap. 11. Idem Germanicus attendit, cum inſtructo tropæo Tiberij & Auguſti mentionem uſurpavit, de ſe autem (verba ſunt Corn. Tac. l. 2. Annal.) *nihil addidiſſi.* De Achais Polybius l. 2. memorat, quod cum multis maximisque in rebus, ſecum Romanorum fuiſſent, nunquam ſibi quidquam ex rebus geſtû adſcripſerint &c. Sejanus ut eſt apud Vell. l. 2. cap. 127. *actû orioſiſſimillimus fuiſſe, nihil ſibi vindicans, eoque aſſequens omnia ſemper infra aliorum aſſimilationes ſe merſens &c.**

Secunda cauſa mali hujus exitus eſt Regum invidia adverſum miniſtros, proſperè rem gerentes, ut Saulis in Davidem 1. Samuel 18. ſ. 8. Philippi Macedonis, de quo Demotheſtes Olynthiaca ſecundâ : *Qui cum eo verſantur peregrini milites, & ſatellites opinionem illi quidem excitarunt, ſe admirandos eſſe ac ſtrenuos bellatores, ſed ut ego è quodam in Macedonia nato audivi optima fidei viro, nihilo ſervi aliis præſtantes. Nam eſt qui inter eos viri ſunt rei militariæ periti, eos, ut eſt ambitioſus, omnes ab eo repellere dixit, omnia volente facinoræ videri ſua eſſe. Et iterum orat, ad Epiſtolam Philippi, in gloria cupidi:*

*cupiditate inflammatum esse dicunt hi, quibus familiariter notus est, ut omnia praeclara facinora, sua esse videri velis, & magis indigne-
tur ducibus & praefectis qui aliquid laude dignum gesserunt, quam
illis, qui prorsus offenderunt.*

Simile quippiam de Alexandro refert Curt. l. vi. c. r.
§. 18. ubi post memoratam cladem, Laconibus ab Antipatro
illatam, ita pergit : *Nec fallebas Antipatrum dissentire ab ani-
mis gratulantium vultus : sed bellum finire cupienti opus erat de-
cipi. Et quanquam fortuna rerum placebat, invidiam tamen, quia
maiores res erant, quoniam quas praefecti modus caperes, metuebat.
Quippe Alexander hostes vinci voluerat, Antipatrum vicisse, ne
tacitus quidem indignabatur, sua deinde gloria existimans, quic-
quid cessisset alienae. Et l. iix. cap. 14. §. 46. Simplicius sanam
aestimabat Alexander in hoste quam in civē. Quippe a suis credebat
magnitudinem suam destrui, eandem clariorem fore, quo maiores
fuissem, quos ipse vicisset. Eadem peste Tiberium Imperatorem
afflatum memorat Corn. Tacit. l. i. annalium c. 52. Nunciat
ea Tiberium laetitia, curaque affecere. Gaudebat oppressum seditio-
nem, sed quod largiendus pecuniae & missione festinara favorem mi-
litum Germanicus quesivisset, bellica quoque Germanici gloria
angebatur. De Theodosio Zonaras tom. 3. Amentia trans-
laturus & urbem amplificaturus, munus id Cyro praefecto mandat,
qui magno studio & celeritate Ciberseum murum a mari ad mare
pertinentem intra dies sexaginta absolvit. Urbana igitur multi-
tudo & opere delectata, & praefecti celeritatem admirata, publice
exclamat : Constantinus condidit, Cyrus renovavit, quomobrem
Cyrus invisus & suspectus Imperatori vel invisus tenditur ut Cle-
ticus.*

Tertia causa est metus regum, dum verentur ne hu-
jusmodi ducis virtus ac gratia, imperium reddant contro-
versum. Nicetas Choniates, l. 3. de Manuele Imperat: *Dum*

Tarsi agebat, Andronici patrnelis fugâ è carcere illi nunciatur, ejus illi causa fuerant ea quæ supra diximus, sed tamen illa quoque incommoda, quod in dicendo liber, & viribus præstans & forma digna imperio pradius, nunquam animum submittebat. Quæ res omnes Imperatoribus regni amittendi metu suspecta & molesta esse consueverunt. Propter hæc igitur & bellicam virtutem, & generis nobilitatem, maxime observabatur & suspectus habebatur. Idem extimuisse Neronem & Domitianum Imperatores, cum duces ipsorum res egregie gessissent, narrat Cornelius Tacit. l. 16. Annal. c. 15. & in vitæ Agricolaë, c. 39.

Epilogus causas harum calamitatum breviter repetat & ut fortunam suam reverentius habeant, summos Regum ministros cohortetur.

XLII.

REPREHENSIO VOLUPTATIS.

EXordium è duobus locis auditores reddat attentos, 1. propriis, 2. magnis è l. 3. Rhet. cap. xiv, §. 28. Primus ita adhibetor : *Si illi oratores qui res externas, parum sæpe ad nos atinentes proponunt, cupidè audiuntur, multo enixius mihi hodiè attendetis, qui de re ad vosmet ipsos maxime pertinente, de re vobis propria, & maxime necessariâ verba sum facturus &c.*

Secundus locus ita ferè exprimi poterit : *Nec exilè, quiddam, aut minutum elegi quod tractarem, sed tale omnino quod valetudinem, vitam, famam, salutem & animi pariter ac corporis omnimodam felicitatem complectatur.*

Propositio : *Voluptas nimirum blanda illa domina est, quæ ni sedulè evisetur, omnia nobis solida bona, quin nosmet ipsos nobis iripit, quod quidem hanc obscurè mecum intelligens, qui auribus animique volens adesse.*

FIDES

FIDES

Primum enthymema è loco communissimo effectorum:
*Voluptas animum, nobilissimam hominis partem, corrumpit. Ergo
 maxime est fugienda.*

Particulæ hujus enthymematis tractentur hoc ordine:
 primò præmoneantur auditores, per voluptatem hic intel-
 ligi non eam animi delectationem, quæ ex rebus honestis
 petitur, sed illam quæ falsi boni opinione sensus corporis
 præcipuè movet ac titillat, & immoderata est atque immo-
 dica. Hanc enim non vulgus tantum studiosè sectatur, sed
 & nonnulli, quod mirere, philosophorum discipuli sectan-
 dam docent. Vide B. Horneji Civilem de moribus doctri-
 nam l. 1. c. 4. §. 2.

Deinde animi nostri excellentia delineetur, quippe o-
 ptima pars nostri, corpore longè præstantior, omnibus pretiosissimis sub
 sole rebus pretiosior, origine cælestis, Deo similissima, immortalis, & ob
 id præcipuè quidam nostrâ curâ maxime digna.

His præmissis demonstretur tandem ipsum enthyme-
 matis antecedens, nempe hanc tam præclaram, & divinam
 nostri partem, à voluptate corrumpi. Fieri id indeliquet,
 quod appetitus sensitivus cupiditatibus suis totus immersus, &
 intellectus & voluptariis operationes obscurer, deprimat, impediatur,
 & instar tyranni ignobili ac perpetua servituti mancipet. . Plato
 lib. 4. de republicâ : *Voluptas omni viri accrimonia, & calceus
 ad expurgandum rectas legitimasque opiniones acriter.* Seneca
 libro de vita beatâ c. XII. *Non voco sapientem, supra quem
 quidquam est, nedum voluptas, atque ab hac occupatus quomodo re-
 sistet labori, ac periculo, egestati, & tot humanarum vitam circum-
 strepentibus minis ? quomodo consuetum moris, quomodo doloris
 feret ? quomodo mundi fragores & sanium acerrimorum bestium,*

nam molli adversario victus? quicquid voluptas suaseris facies.

Nec in singulorum tantum hominum, sed & integrarum gentium animos, istam vim voluptas exercet. Apud Silium Italicum l. xv. de bello Punico, non procul ab initio, virtus voluptatem ita affatur:

— — — — affice latè

Folrentes quondam luxu quas verteris urbes,

Quippe nec ira Deum tantum nec tela nec hostes.

Quantum sola noces animis illapsa voluptas.

Ebrietas tibi fida comes tibi luxus & airis

Circa te semper volitans infamia pennis.

Justinus lib. vii. 12. Occupato in aliis bellis Cyro Lydi rebellavere, quibus iterum victis arma & equi adempti, iussuque cauponas & ludicras artes & lenocinia exercere, & sic gens industria quondam potens & manu strenua, effeminata mollitie, luxuriaque virtutem pristinam perdidit, & quos ante Cyrum invictos belli prastiterant, in luxuriam lapsos otium ac desidiosa superavit.

Plutarchus in apophthegmatibus Regum cap. vi. Xerxes iratus Babylonis ob defectionem, cum eos in potestatem suam redeisset, interdixit armorum gestationem iussisque fidibus & fistulis canere, lenocinium & cauponam exercere, ac tunicas gestare sinuatas &c. Aristodemus Cumanorum tyrannus ut est apud Dionys. Hal. l. vii. cap. 8. ne in cetorum civium, Cumano- rum ullo animus existeret generosus ac masculus, dedit operam ut effeminaretur tota urbana juventutis educatio, sublati gymnasii & armorum meditationibus, & mutata victus ratione, qua primo utebantur pueri, iussit enim eos more virginum comam alere, flores & cincinnos gerere, reticulisque crinium nodos religare, indus pictis tunicis salaribus, tenuibusque & mollihus amictis laevulis & in umbra degere. In ludum saltatorium & ad sibi cines altiusque mularum thecebrarum artifices comitabantur eos paedagoge mulie-

mulieres cum umbellis & flabellis: ipsaeque lavabant eos, pettines in balnea deferentes & alabaistros unguentarias ac specula. Huiusmodi educatione corruptos usque ad annum aetatis vigesimum, sum demum inter viros censeri passus est. Augusti Imperatoris verbum est apud Dionem Cassium l. 50. Fieri non potest ut is qui regio luxu mollitiei que muliebri indulget, viro aliquid dignum vel consulat vel agat. Est enim necesse omnino ut quibus unusquisque visa rationibus utitur, earum similis reddatur. Onofander. cap. 18. Otio quidem corporis vires mollescunt & languent, desidia vero animi veluti evirantur, socordesque & ignavi fiunt. Nempe blandimenta voluptatum assiduo abusu ferocissima quaeque peiora enervant & absumunt, Claudianus l. 3. de laud. Stilic. v. 160.

— — — nam cetera regna

*Luxuries viriſ odiūque superbia vertit,
Sic malè sublimes fregit Spartanus Athenas
Atque idem Thebæ cecidit, sic Medus adamis
Assyrio, Medoque tulit moderamina Perses.
Subjecit Persen Macedo celsurus & ipse
Romanis.*

Adite Athenæum l. xxi. ubi enumerat populos voluptate eviratos.

Secundum enthymema : *Voluptas corporis nocet. Ergo procul amovenda est.*

Dilatandi causâ primò afferatur elogium corporis, est enim illud animæ & domicilium & instrumentum & imago quædam, cujus fabrica venusta, celsa, erecta, omnium ceterorum animalium corporibus pulchritudine antistat, quin ipsius universi quoddam instar est. Vide Ambrosium *ignarus* l. vi. c. 9. & Maximum Tyrium dissert. 38. p. 380.

Inde loco majoris intellectæ probatio ejusdem afferatur.

ratur; *Impium fueris tam admirabilem & divinitus constructam compagem, illud anima instrumentum ledere, fardare, corrumpere &c.*

Demum accedat probatio antecedentis hujusmodi: *Corporis vires infringit voluptas, inducit morbos, ac prematuram mortem &c.*

Tertium enthymema: *Voluptas pestis est rei familiaris, Ergo diligenter evitanda.*

Probatur antecedens: *Curam enim rei familiari debitam. Proventus item in familia necessitatem impendendos deliciarum cupido ac studium intercipit.*

Quartum enthymema: *Voluptas pecudis potius quam hominis bonum est, Ergo procul summovenda.*

Diducatur hoc enthymema additione majoris ejusque probatione, tum demonstratione minoris, & iteratâ conclusionem.

Quintum enthymema: *Voluptas servitus est, adeoque turpissima, ergo procul fugienda.*

Dilatetur primò demonstratione quam sit res præclara libertas &c. *Secundò* acerbitas servitutis ob oculos ponatur, de qua inter alios agit Laurentius Pignorius lib. de servis p. 5. & seqq. *Tertio* acerbior illa servitus est quæ inferiori & deteriori est præstanda &c. His denique subjiciatur *quarò* probatio minoris, nempe affectibus suis, gula, abdomini effrenatisque cupiditatibus suis succumbere ac mancipatum esse, turpissima servitus est. *Pars enim nostri melior tum succumbit deteriori.* Itaque Diogenes Alexandro se potiorē esse dicebat, quod is affectibus imperaret, quibus Alexander serviebat. Cæsar oratione adversus seditiosos milites apud Dionem Cassium l. 41. *Turpe est modo ea voluptate duci, cujus potest prætereat: indignumque est eos qui hostibus superiores evaserint, voluptatibus*

præstibus succumbere. Agestilaus apud Plutarchum in Apophth. Laconicis; *Malle mihi videor cupiditates vincere, quam populosissimam hostium repugnantium urbem capere.* Melius est enim suam ipsius conservare libertatem, quam alius eam adimere. Isidorus Pelusiota l. 3. ep. 377. *Non qui externos barbaros vincit hic victor meritis vocandus fuerit, sed qui intestinum voluptatum bellum conficit.* Multi enim ab illis devicti, sedum ac miserandum in modum capti sunt.

Sextum: *Voluptas brevis est, ac longum dolorem parit.* Seneca l. 7. de beneficijs cap. 2. *Voluptas fragilis est, & brevis, fastidit abjecta, quo avidius hausta est, citius in contrarium recidens, cujus subinde necesse est aut peniteat aut pudeat.* Idem in lib. de vitâ beatâ cap. 7. *Voluptas cum maximè delectas extinguitur.* Idem ad Polybium, cap. 29. *Circa nos omnis voluptas relinquit, quæ fluit & transit, & penè antequam veniat, aufertur.* Isid. Pelusiota l. 2. epistola 174. *Voluptas in exitiosum ac pestiferum finem desinit, quo circa satius est à laboribus ad requiem, quàm à voluptate ad cruciatum proficisci.* Claud. l. 2. de laud. Stilic. v. 132.

— — — *nec te jucundâ fronte fefellis
Luxuries, prædulce malum quæ dedira semper
Corporis arboribus hebetat caligine sensus
Membraque Circeis effeminat acris herbis,
Blanda quidem vultu, sed quæ nonterior ulla
Interiùs, fucata genas & amicta dolosis
Illecebris &c.*

Denique omnium horum enthymematum conclusio repetatur additâ exhortatione, ut incauti, juvenes inprimis, à blandæ hujus dominæ illecebris sibi caveant.

ENCOMIUM VOLUPTATIS.

EXordium & Propositio in hanc sententiam formen-
tur: *Turpes voluptates nemo sapiens, nemo bonus, unquam
probabit, ac iustas & legitimas, nemo sanus detestabitur &c.*

Primum enthymema: *Est enim à natura ipse appetitus
iucundi vobis insitus &c.*

Secundum enthymema: *Voluptas comes virtutis est.*

Tertium enthymema: *Laborum incitamentum & com-
dimentum.*

Quartum enthymema: *Sapientissimi quique volupta-
tem inter præcipua bona numerarunt.*

Quintum enthymema: *Æterna ac immortalis vita,
quod aspiramus, beatitudo in voluptate consistet, divinitus parata
&c.* Adite Max. Tyrij philosophi Platonici dissert. 33.
qua demonstrat: *Voluptatem omnium finem esse.* Item Flori-
legium Tobia Magiri pag. 2387.

XLIV.

CONSILIA NON SUNT EX EVENTU
JUDICANDA.

PROœcium ix το πρὸ γυναικ. l. 3. Rhet. cap. xiv. §. 20. &
44 reprehendat vulgarem illum morem, quo consilia
ex eventis ferè æstimant mortales. Addatur morata ora-
tio: *Non inani quodam pluribus contradicendi studio, sed gravibus
rationibus adductus à communis hominum sententiâ diver-
sum censeo.*

Propositio: *Liquebit id ex his quæ sum dicturus, dabo enim
operam ut quam iniquum sit ex eventu consilia æstimare omnes
intelligant.*

FIDE S

Primum enthymema è loco communissimo l. 2. Rhet. c. 23. §. 41. *Laududum sapientes viri questi sunt de pravi optimorum consiliorum ex eventu cavillatione.* Plaut. in Pseud. act. 2. sc. 3. vers. 13. *Proinde ut quisque fortuna utitur.*

Ita praelles, atque exinde sapere cum omnes dicimus.

Bene ubi quod consilium dicimus accidisse, hominem eorum

Eum esse declaramus: Solum autem illum cui vorat malè.

Cic. in orat. pro Rabirio Posthumio: *Hoc plerumque facimus, ut consilia eventis ponderemus, & cui bene quid processerit, multum illum providisse; cui secus, nihil sensisse dicamus.* Cornelius Tacitus l. 4. Annal. *Fulgus ex opinione multa, ex veritate pauca judicans, fortuita ad culpam trahit.* Plin. l. 5 epistolà 21. *Est omnino iniquum, sed usu receptum, quod honesta consilia vel sursum prout malè aut prosperè cedunt, ita vel probantur vel reprehenduntur* Boëth. l. 1. prola 4. *Hic etiam nostrum malum cumulus accedit, quod existimatio plurimorum non rerum merita, sed fortuna spectat eventum.*

Sententiæ autem istæ non nudè allegandæ, sed vestiendæ sunt elogiis ipsorum autorum, occasione & causâ, ob quam prolata, commendatione sapientiæ quæ in illis latet, &c.

Secundum enthymema è communissimo causarum loco: *Eventus sape est à fortuna h. e. à causâ humanis consiliis poiore.* Malè igitur inde consilia culpantur.

Explicabitur primò probatione intellectæ majoris: *Quod in manu nostrâ non est visio nobis veri minime debet.*

Secundò: probatione antecedentis: *Quemadmodum naviculus licet artem navis improvide omnem adhibeat, tamen ut tempestatu in avia & scopulo abripi possit, ita consiliator et-*

iam cum maximè salutaria suades atque patrare infus à vi maiore existis saepe fraudatur.

Dilatetur exemplo Pyrrhi, de quo memorabilis locus extat in Dionys. Halicarnassei excerptis Peirescianis: *Bello victus ac profligatus est à Romano Pyrrhus, neque tamen contemnendum aut imperitum rei militaris habebat exercitum, sed optimos totà Gracià milites, ac plurimū bellū exercitatos; atque eorum non exiguas copias, sed ter tanto ampliores Romanū. Neque ipse dux erat vulgaris sed quem omnes ætatis suæ præstantissimum fassentur fuisse. Postremo nec loci iniquitas neque auxilia submissa hostibus ac repente supervenientia; neque ulla calamitas aut fortuitus casus res Pyrrhū afflixere, sed solus indignantis Deæ furor.*

Exempli nuda commemoratio oratori haud quaquam sufficit, sed partes ejus ac circumstantiæ expendendæ sunt & conclusioni applicandæ. E. g. hoc in loco ita terè illud fiet: *Cum omnes boni ducis partes in hac acie Pyrrhus impleverit, nec desiderato eventu sis potius, quodnam ejusdem consilium reprehendes? An locum? aut tempus? at delegeras opportunum. An milites? at veteranus erat, exercitatus, & triplo major hostium numero. An mandata, vigilansiam, acies formam culpabis &c. Vossaris constes consilium Pyrrhi rectum fuisse & sapiens, sed eventum à majore vi præditum.*

Tertium enthymema: *Animi propositum bonum malumve, & rationes negotii conficiendi, provida an vecordes, unum illud sunt unde laudari aut vituperari moralium actiones debent.*

Probatur inde. *quia id unum nostræ potestatis est &c. Quod autem nostræ potestatis non est, visio nobis veris minimè debet.*

Illustretur laudatione legis Ægyptiæ & Carthaginensis.

sis, De illâ Diod. Siculus lib. 1. cap. 82. narrat, Ægyptios de Medicis legem tulisse, ut si quis non servatis præceptis artis Medicæ quempiam suscepisset curandum, quamvis sanatus esset, Medicus securi plecteretur, si vero Medica præcepta observavisset etiam si æger mortuus esset, laudibus tamen ille extolleretur. *Carthaginenses* autem, ut est apud Valer. Max. lib. 2. cap. 7. *duces pravo consilio bellum gerentes, etiamsi prospera fortuna subsecuta esset, cruci tamen suffigebant, quod bene gesserant Deorum immortalium adjutorio, quod male commiserant ipsorum culpa impunes.*

Secundò idem enthymema illustretur sapienti voce Artabani ad Xerxem regem apud Herod. l. 7. *Suadeo tibi, inquit, rex bene delibera, in eo enim maximum est lucrum. Nam etiamsi aliter accidas, nihilominus tamen bene consultum est, & superavis fortuna consilium; qui verò male consilium cepit, si maxime fortuna ei arrideat, & voti sui compos fiat, nihil tamen secius, male consultum est.*

Denique addatur morata oratio: *Non dicam cum Poëta:*

— — — *carcat successibus opo*

Quisquis abeventus facta notanda putat. (Ovid. epistolâ 2.)
Quin imò eam mentem precor bis arbitrio, ut definant hallucinari,
& possit vero suo presso consilia astimare discant &c. Vid.
Piccarti obs. Hist. Polit. 1. 10.

XLV.

USURÆ SUNT ILLICITÆ.

Primum enthymema: *Usuræ repugnant juri naturali, Ergo sunt illicitæ. Probatur antecedens: Pecunia enim sua natura res est sterilis, hac finis tantummodo inventa ut sit instrumentum commutationis. vide Arist. 1. Polit. x. Præterea injustum est*

plus recipere quam dederis, inaequale enim hoc est. Fit autem hoc in usura.

Secundum enthymema: *Lex divina vetat Hebraeos Hebraeis dare pecuniam faenori* Levit. cap. xxv. & Deut. xxiii. Ergo nec Christianus à Christiano exigit, etenim ut Israelita inser se, ita & Christiani fratres sunt.

Tertium Plalino xv^{to}. 5 & Ezech. 18. 8. 13. 17. alijs maximà moralib. annumeratur non exigere usuram, & foeneratores à tabernaculo Domini ejiciuntur ac è monte sancto præcipitantur.

Quartum enthymema: *Quia Servator noster expressè edicit: Mutuum date, nihil inde sperantes.* Luc. c. vi. §. 35. Quod Servatoris verbum de foenore nonnulli priscorum piorumque interpretum acceperunt.

Quintum enthymema: Multa mala è foenore nunquam non fuere enata. Recensent illa Plutarchus in lib. de vitando ære alieno, & ex parte Corn. Tacitus lib. 6. Annal. c. 16. §. 2. & seqq.

XLVI.

USURAS ESSE LICITAS.

PRIMUM enthymema: *Si alius meâ pecuniâ juvetur ac res suas augeat, neque mihi ultra faciem quidquam retribuas, praeter periculum amittendi, rationi consentaneum non est. Licet ergo petere usuram.*

Secundum enthymema: *Dum meam pecuniam alteri do mutuatam, ego interim destitutor occasione, meo illo ære utendi in rem meam. Dicitur autem naturâ non teneri quinquam prodesse alteri, cum detrimento suo. Licet itaque accipere usuram.*

Tertium enthymema: *Pecunia est in eo rerum genere, quâ*

qua locari possunt. Ergo licet pro usu ejus aliquid exigere. Probatur antecedens; Possunt enim alteri concedere jus utendi in eâ pecuniâ, non translatò dominio. At quod eâ lege alteri conceditur locari potest.

Quartum enthymema: Omnis opera qua non est debita, si præsletur, justo precio aestimari potest. Atqui officium mutuandi est hujusmodi opera, qua non est debita. Ergo justo precio, quod videlicet officio illi sit aequale, aestimari potest. Hoc autem presium ipsa est usura.

Quintum enthymema: Jus civile Romanum usuras permittit. Dilatetur elogio juris Romani.

Post εὐκρινὰ hæc enthymemata sequantur ἐλεγκτικά, quibus allata in contrarium refutantur. Ad primum ergo respondetur, nummum commutationis causâ quidem primum esse introductum, at mox oportunitate ipsâ invitante & hominum solertia, rem minime sterilem esse, sed valde fructuosam. Neque plus quam dederas, recipere creditorem, cum debitor non sorte tantum sed & usum sortis in manu suâ habuerit. Sors itaque pro sorte, usura pro usu redditur.

Ad secundum & tertium respondetur: Moſen, Davidem, Ezechielem, non loqui de moderato quodam precio usus, nostra alteri prabita pecunia, sed de eo quod extorquetur cum oppressione proximi, de exactione immitti, atque inhumana, quando vel factus exigitur grave atque immodicum, vel sors eo tempore reperitur quando non nisi maximo suo incommodo debitor solvere illud potest. Id enim si fiat, tum non adjutum, sed ad mortem se esse (hoc significat vox Hebræa qua sacri scriptores utuntur) & mutatione in majores angustias adactum mercis debitor queratur.

Ad quartum respondetur: Servatorem. Luc. 6. v. 36.

Non

Non de usurâ loquî, sed id dicere, etiam cum parem beneficij vicem non expectamus, tamen beneficium exhibendum & munus dandum esse.

Ad quintum: Plutarchi, Taciti, aliorumque sapientum de foeneratoribus verba, non de eo quod intrinsecum est usuræ, sed de hoc, quod illam vitio foeneratorum plerumque consequitur esse intelligenda. Vide Hugonem Grotium l. 2. de iure pacis & belli cap. 12. & Commentario ad evangel. Lucæ c. 6. v. 35.

XLVII.

CONSCIENTIÆ SUMMA RATIO EST HABENDA.

Primum enthymema: *Lasa enim mordes graviter.*

Secundum enthymema: *quin perpetud pungit neque unquam fere nos quiescere sinis.*

Tertium enthymema: *Est iudex incorruptus, qui falli aut eludi minime potest.*

Quartum enthymema: *Levisima rei monitu suam nobis admoveat carnificinam.*

Quintum enthymema: *Neque est cujusquam mortalium tantum animi robur, ut summovere illius vim possit.*

Sextum enthymema: *Fortuna ut ne quosdam malis suis interdum eripias, conscientia tamen tormenta non auerit.*

Sententias & exempla quibus singula ista enthymemata dilatarî queant, collegit clarissimus vir Michael Piccartus observat. historico politicarum decade 7. c. 7.

XLIX.

CONTRA VINDICTAM PRIVATAM.

Proœmium de re nimium quidem vulgari, at magni momenti

menti & quam sollicitè expendi omnium intersit, se verba
facturum promittat. L. 3. Rhet. c. 14. inciso 28.

Hæc prælocutus commemoret vitium nostri seculi,
quo *privatam vindictam non licere tantum, sed & gloriosam esse,*
se, numquam multi stultè sunt persuasi.

Ceterum divinæ humanisque legibus & rectæ rationi
adversam esse spondeat se demonstraturum.

FIDES.

Primum enthymema: *Vindicta privata Deo exosa est & se-*
verè prohibita. Vide Levit. cap. xix. §. 18. Deut. xxxii.
cap. §. 35. Proverb. c. xx. §. 22. & capite xxiv. §. 29. Ezech.
cap. 25. §. 12. Hæc autem loca scripturæ non annumerare
tantum & referre, sed sententiam illarum, vim, auctoritatem
circumstantias expendere, explicare, atque ad demonstran-
dam conclusionem, accommodare oportet.

Secundum enthymema: *Christiana quidem fidei maxi-*
me est contraria, ut constat ex oratione Christi Matth. cap. v.
§. 39. & seqq. Luc. cap. ix. §. 54. Item ex Apostolorum, di-
vinæ mentis interpretum, oraculis ad Roman. cap. xii. §. 17.
1. ad Thessal. c. v. §. 15. 1. Petri 3. §. 9.

Tertium enthymema: *Non tantum contra Dei mande-*
rum delinquis privatus vindex, sed & id quod ipse Deus est, ne-
farte sibi vendicas. Deus enim est injuriarum vindex supre-
mus. Deut. cap. 32. §. 36. Nahum cap. 1. §. 2. ad Roman. 12.
§. 19. 2. ad Timoth. c. 4. §. 14. Apoc. c. 6. §. 10.

Quartum enthymema: *Post Deum magistratus est le-*
gitimus vindex. Ergo quod huius est, non est ultionis huius.

Dilatetur primo additione majoris: *Nefas est magistratus auctoritatem convellere, ejusque potestatem sibi vindicare.* Secundo probatione minoris: *Magistratus Lexi alior vices suas concessit.*

Quintum enthymema: *Vitio privata recta rationi adversatur.* Probatur antecedens: *Habes enim pro fino dolorem inimicitias in solo inimici dolore, ita nudè spectato, nullum est bonum, nisi falsum, & imaginarium.* Dicitur autem ratio, nihil agendum quo noceatur alteri, nisi id bonum aliquid habeat propositum. Vid. Hugonem Grotium l. 2. de iure pacis & belli cap. xx. §. 5.

Sextum enthymema: *Eadem adversatur dictis & factis sapientum virorum, nec Christianorum tantum, sed & externorum.* vide Platonem in Dialogo qui inscribitur Crito, item Senecam l. 2. de ira cap. 32. Maximum Tyrium dissert. 2. Hugonem Grotium l. iv. de verit. relig. Christ. pag. 140. & 492. edit. Paris. in 12. Anno 1640. Ariston Spartianus: *dicenti cuiquam regium esse amicis bene, inimicis malefacere; imò inquit amicis bene facere; inimicos amicos reddere.* Apud Plut. Dion, ille Sicilia liberator, philosophici studij veram demonstrationem in eo ait positam non ut quis in amicos benignus sit, sed si quis injuria affectus sit exorabilis, clemens in eos qui deliquerunt. Mufonius: *Id cogitare quomodo quis remordeat mordacem, & nocenti noceat, fera est non hominis.*

E factis sapientum unum alterumve recensebimus. *Pisaccus potestatem habens puniendi quempiam qui contumeliosus in ipsum fuerat, dimisit eum, inquit: Venia ultione melior est; illa namque mitis est ingenij, hac ferini.* Stobæus sermone 19.

Percusserat aliquis Casonem in balneo insciens: Excusanti postea

& satisfaciendi Cato non memini inquit me percussum. Seneca in de constantia sapientis cap. xiv. & ibi Lipsius.

Phocio Asbeniensis allato jam cicuta poculo interrogatus, filione aliquid manderet: Mando, inquit, ne Asbeniensibus memorem se injuriarum praebeas. Plut. Apophr. 73.

Huc pertinet Thrasybuli lex oblivionis, quam memorat Corn. Nepos in Thrasybulo & laudat Cicero Philip. i. sub initium.

XLIX.

TYRPE EST CALVMNIARI.

Primum enthymema: *Oritur enim à libidine aut mentiendi, aut in pravam torquendi ea, quae in bonum sensum accipi poterant, utrumque autem turpe est.*

Secundum enthymema: *Injuriam infert illi quem calumniatur. Nemo autem bonus alteri nocere cupit.*

Tertium enthymema: *Injuriam illi infert, apud quem alterum calumniatur. Habet enim illum pro vecordi, cui mendacia persuadere possint, & eundem ad pravas suspiciones & male sano cum consilia sum facta propellis.*

Quintum enthymema: *quin calumniator sibi quoque ipse nocet, veritate enim patefacta, sibi infamiam & saepe poenas accelerat calumniator.* Adi Piccartum observationum historicarum Politicarum decade 8, c. 10.

L.

NE QVID NIMIS.

Prooemium laudet morem probe observandi sapien-

Primum enthymema: *Qui modum excedunt peccant in naturam, cui omne nuntium est inimicum, perniciem videlicet, nunc corpori offerens nunc animo, saepe vero utrique.*

Secundum enthymema: *Res, famam, honores & bona sua omnia, periculo exponunt ac ferè perdunt, qui nullà in re, neque in dictis, nec in factis, mediocritatem servare norunt.*

Tertium enthymema: *Idem alienant à se animos bonorum, qui ita ferè sunt animati, ut immodica omnia avertantur.*

Quartum: *Idem iucundissima quaque ob excessum finis acerba.*

Quintum: *Modus contra est natura conveniens.*

Sextum: *Ab optimo quoque & sapientissimo viro commendatur. Huc pertinent sententiæ sapientum de mediocritate servanda passim obviæ.*

Septimum: *Mediocritatem in omnibus & dictis & factis servare difficile est, ac longe optimum & laudatissimum.*

Octavum: *Moderata durant, ea vero qua modum excedunt, cito desinunt.*

Nonum denique: *Omnibus in rebus modus iurissimus est, ac ab omni incommodo & periculo tandem liber.*

Epilogus compendio repetat præcipua argumenta & auream mediocritatem ejusque fructum auditoribus etiam atque etiam commendet.

FINIS DISPOSITIONUM ORATORIARVM.

ADDEN-



ADDENDA

Pag. 7. vers. ult. *post* in his insunt, *adde*: hoc est quæ vel de subiecto conclusionis hujus prædicari, vel prædicato illius subijci queunt.

Pag. 8. vers. 9. *post* referantur, *adde*: *mbava* verò sunt quæ vel rationem aliquam suppeditant, vel affectum cient, vel moratam denique orationem spirant.

Pag. 9. vers. 4. *post* illa §. 35. & 36. *adde*: & l. II. Rhet. cap. xxiii. §. 75.

Ibid. vers. 8. *post* Principium *adde*: sive major propositio.

Pag. 10. vers. 23. *post* reliquum evertet, *adde*: I Rhet. VI. §. 10. & 11.

Pag. 15. vers. 4. *post* intentum *adde*: asseveret.

Pag. 33. vers. 26. *post* probi animi virum, *adde*: Argumenta huic comparationi suppeditabit caput vii. libri I. Rhet.

Pag. 35. vers. 7. *post* Plutarch. apophth. 46. *adde*: Lycus apud Senecam in Herc. fur. vers. 337.

Non vetera patria jura possideo domus

*Sed clara virtus. Qui genus jactat suum
Aliena laudat.*

Galenus in hortat. ad artes disc. cap. 4. *Qui se splendore generis efferunt, & cum bonis, quæ propria sint, careant ad genus ostentandum confugiunt, cum ne id quidem intelligant, splendore generis, quo admirabiles videri volunt, idem usque venire, quod civitatum numismatis, quæ cum apud eas ipsas civitates probata plurimum valeant, apud alias tamen gentes & adulterina haberi, & nihili fieri cernuntur.*

Pag. ead. vers. 9. post, *aliquæ &c.* adde: Enumerat hos & iis similes multo plures Gerard. Voss. lib. 1. Inst. Orat. cap. v. num. 14. pag. 65.

Pag. ead. post Themistoclis, adde: Hæc enim illa sunt quæ virtutem efficiunt.

Pag. 36. vers. 7. post illa cap. 1. §. 3. adde: Adil. 1. Rhet. cap. ix. §. 44. & seqq.

Pag. 49. vers. 2. post ultus est, adde: plura enthymemata suppedirabit locus communis de festo. 2. Rhet. cap. xix. §. 22. & seqq.

Pag. 54. vers. 17. post consistit adde: lib. 1. Rhet. cap. iv. §. 22. & seqq.

Pag. 93. vers. 28. post intervertit, adde: Hæc tria enthymemata è communissimo effectorum loco, item è 2. Rhet. 23. §. 76. sunt petita.

Ibid. vers. 30. post prohibita, adde: è loco communissimo 2. Rhet. 23. 41.

Ibid. vers. 31. post parit. adde: Quæ id quod felicitati contrarium est (est autem miseria felicitati contraria) pariunt, agenda non sunt 1. Rhet. v. 3.

Pag. 97. vers. 19. *post illa*, lib. 3. Hist. *adde* : Cap. 53.
§. 2.

Pag. ead. vers. 22. *post* Curt. l. 6. *adde* : cap. 8. §. 3.

Pag. 108. vers. 4. *post* Peirescianis, *adde* : pag. 544. edit.
Vallofiana Lutet. Paris. Anno 1634.

Pag. ead. vers. 13. *post* *De a furor*, *adde* : Non immeritò
tamen è consiliis Pyrrhi maximè illud reprehenditur,
sacram pecuniam in hujus belli usum destinaverat, ob id,
ut & ipse agnovit hanc cladem passus.

CORRIGENDA.

Pag. 7. versu 16. *pro* animus *scribe* animos.

Pag. 8. vers. 12. *pro* facit, *scribe* faciat.

Pag. 15. vers. 27. *pro* acceperant, *scribe* acceperunt.

Pag. 16. vers. 5. *pro* Tandem *scribe* Denique,

Pag. 30. vers. 15. *pro* arguat *scr.* arguant.

Pag. 35. vers. 2. *pro* *vizi* *scribe* *nisi*.

Pag. 36. *pro* virtutem *scribe* virtutum.

Pag. 44. vers. 17. *pro* qua *scribe* quæ.

Pag. 45. vers. 1. *pro* quæ *scribe* qua.

Ibid. vers. 25. *pro* cicato *scribe* citato.

Pag. 46. vers. 10. *pro* Mausinissam *scribe* Masinissam.

Pag. 47. vers. 13. *pro* incestu *scribe* incestu.

Pag. 48. vers. 17. *pro* Dion. *scribe* Dionys. Halicarnass.
Pag. 53. vers. 21. *pro* Grammaticæ *scribe* Grammatica.
Pag. 56. vers. penult. *pro* proclamaret *scribe* proclama-
rent.

Pag. 63. *pro* imaque *scribe* imago.

Pag. 93. vers. 18. *pro* pendis *scribe* tendis.

Pag. 103. vers. antepenult. *pro* Ambrosium *scribe* Am-
brosij.

F I N I S.



Vol.
150863